

~~Man C~~

Man C

CENTRALE V. II



M

1

30

J. H. B. 32

Am. S. 32

Collegij Societ. Iesv Brux M.B


RELATION
DE LA NOUVELLE
MISSION DES PERES DE
LA COMPAGNIE DE IESVS,
AV ROYAUME DE LA
COCHINCHINE.

TRADVITE DE L'ITALIEN DV
*Pere Christofle Borri Milanois, qui fut
un des premiers qui entrerent en
ce Royaume.*

PAR LE PERE ANTOINE DE
la Croix, de la mesme Compagnie.



A LILLE,
De l'Imprimerie de Pierre de Rache, à la
Bible d'Or, 1631.
Avec Privilege & Approbation.



A NOSTRE TRES-SAINT PERE
le Pape VRBAIN VIII.

TRES-SAINT PERE,

Je n'ay iamais pensé que ce mien petit narré de ces pays, de la Cochinchine, meritaſt d'estre preſenté à voſtre Sainteté, laquelle eſt occupée au gouvernemēt ſpirituel de tout le monde comme Vicaire de I E S V S-CHRIST. Toutesſois parce qu'il y eſt parlé de la conuerſion des ames dont le ſoin a eſté commis à Voſtre Sainteté, & qu'elle meſme m'a teſmoigné qu'elle prendroit plaisir à le voir, c'eſt pourquoy ie le vous viens offrir me proſternant à vos pieds en toute humilité en vous demandant voſtre Sainte Benediction.

C'eſt

Pere Tres-saint

Votre tres-
humble ſeruiteur,

CHRISTOFLE BORRI,

*PERMISSION DV REVE-
rend Pere General.*

Ceste Relation de la nouvelle Mission des Peres de la Cōpagnie de IESVS en la Cochinchine, composée par le Pere Christofle Borri, qui fut vn des premiers Peres qui entrerent en-cē Royaume, se peut mettre en lumiere sous le bō plaisir de Monseigneur le Reuerendissime Vicegerent, & de Reuerendissime Pere le Maistre du sacré Palais, Fait à Rome cē 21. Ianuier 1631.

Aulien † du cachet

Mutio Vitelleschi General,
de la compagnie de IESVS.

Imprimatur, si videbitur Reuerendiss. Patri
Magistro Sacri Palatii Apostolici.

A. Episc. Bellicastren. Vicesg.

Imprimatur.

*Fr. Nicolaus Riccardus Sacri Palatii
Apostolici Magister.*

Vidit etiam & approbat IOANNES PA-
RENT censor librorum Insulis die 6. Octo-
bris 1631.



RELATION

DE LA COCHINCHINE

DIVISEE EN DEUX

PARTIES.

EN L'UNE DESQUELLES IL SE TRAITE
de l'État temporel de ce Royaume , & en
l'autre de ce qui concerne le Spirituel.

PREMIERE PARTIE.

De l'estat temporel du Royaume
de la Cochinchine,

CHAPITRE I.

Du nom, situation, & grandeur de ce Royaume.



A Cochinchine ainsi nommée
des Portugais , s'appelle en la
langue des originaires du pays
Anam , qui vaut autant à dire
comme quartier Occidental, ce Royaume eu
égard

esgard à la Chine tirât véritablement du costé de l'Occident. C'est pour ce mesme sujet que les Iaponois luy ont doné le nom de *Coci*, qui en leur langue naturelle, signifie le mesme que *Anam* en langue Cochinchinoise. Mais les Portugais s'estant introduits dans *Anam*, pour y trafiquer, sont ceux qui de ce mot Iaponois *Coci*, & de celuy de Chine, ont fait, & composé ce tiers nom de Cochinchine, l'appropriants à ce Royaume, comme qui diroit Cocin de la Chine, pour le mieux distinguer de Cochin Cité de l'Inde, hantée aussi des Portugais. Et quant à ce que dans les mappemondes, la Cochinchine se trouve ordinairement marquée sous le nom de Cauchinchine, ou Cauchine, ou autre semblable, cela n'est point prouenu d'ailleurs, qu'ou bien de la corruption du nom propre, ou pource que les Autheurs de ces Cartes ont voulu donner à entendre, que ce Royaume estoit l'entrée & commencement de la Chine.

Ce Royaume du costé de Midy, confine à celuy de Chiampa, en eleuation d'unze degrez du Pole Arctique: du costé du Septentrion, vn peu deuers Northest, il touche le Tunchim. A l'Orient il a la mer de la Chine: & à l'Occidēt, sur le Maestral ou Northouest, le

le Royaume des Lys.

Quant à sa grandeur, ie parle seulement icy de la Cochinchine, qui est vne partie du grand Royaume du Tunchim, possédée par vn Roy grand Pere de celuy, qui tient à present la Cochinchine, & qui se reuolta contre le grand Roy dudi& Tunchim. D'autant que iusques à present les Portugais n'ont negocié qu'en cette Prouince, & que c'est la seule ou les Peres de nostre Compagnie ont trauaillé iusques à present, pour y establir le Christanisme. Bien est vray qu'on nous escrit que depuis mon retour en Europe le Pere Alexādre de Rhodes natif d'Auignon, & le Pere Pierre Marquez Portugais y sont entrées & y gagnent vn grand nombre d'ames à Dieu, sous la faueur du Roy, qui les voit de fort bon œil.

La Cochinchine s'estend donc plus de cent lieues au long de la Mer, commençant depuis le Royaume de Chiampa en la susdite eleuation d'vnze degrez du Pole Arctique, iusques au Golfe d'Aniam en eleuation d'enuiron dix-sept degrez, ou commence l'estat du Roy du Tunchim. Sa largeur n'est pas de grande estendue, se trouuant relerré dans l'espace d'enuiron vingt mille d'Italie tout de plat pays, borné d'vn costé de la mer, & de

A 2**l'autre**

autre d'une grande file & traînée de montagnes habitées des Kemoïs, nom qui signifie sauvages : Car quoy qu'ils soient Cochinchinois, si ne veulent ils reconnoître le Roy, ny luy obeir en chose quelconque, se cantonnant & tenants forts dans leurs montaignes presque inaccessibles.

La Cochinchine se diuise en cinq Prouinces. La premiere ou le Roy fait son sejour, & qui touche le Tunchim, s'appelle Sinuua. La seconde, à nom Cacciam, & en celle cy reside le Prince fils du Roy, en qualité de Gouverneur. La troisieme se nomme Quanguia. La quatrieme, Quingnim, à laquelle les Portugais ont donné le nom des Palucambis. La cinquieme tout ioignant le Royaume de Chiampa, est dite Renram.

CHAPITRE II.

DU CLIMAT ET QUALITEZ DU pays de la Cochinchine.

C E Royaume estant, ainsi comme il a esté dit, entre l'unzieme & dix-septieme degré d'elevation du Pôle Arctique: de la
s'ensuit

ensuit consequemment que le pays est plus
 chaud que froid. Mais quoy que cela soit
 bien vray, si n'est il pas pourtant si chaud
 comme est l'Inde, encore qu'il soit en mes-
 me eleuation de Pole, & sous la Zone torride.
 La raison de cette difference vient, de ce que
 dans l'Inde, il n'y a distinction aucune des
 quatre saisons de l'année. Pour autant que
 l'Esté y dure l'espace de neuf mois continus,
 sans qu'en tout ce temps-là, on se puisse ap-
 percevoir d'une seule petite nuée dans le
 Ciel, ny iour ny nuict: de façon que l'air
 demeure tousiours embrasé par la reuerbera-
 tion des rais du Soleil. Les autres trois mois
 s'appellent d'hyuer, non qu'ils manquent
 de chaleur: mais à raison des pluyes conti-
 nuelles, qui se font pour l'ordinaire iour &
 nuict en ceste saison: Et nonobstant qu'il sem-
 ble que naturellement parlant, ces pluyes
 ainsi continuelles, deuroient vn peu rafrai-
 chir l'air. Neantmoins comme elles tombent
 durant les mois de May, Iuin, & Iuillet, lors
 que le Soleil est en son plus haut point, & au
 Zenith de l'Inde, n'y ayant pour lors aucuns
 vents qui tirent, qui ne soient fort chauds,
 l'air reste si tres-fort estouffé, que telle fois
 les chaleurs, y sont moins tolerables, qu'au
 milieu de l'Esté mesme, durant lequel pour la

pluspart du temps, viennent de la mer des vents gratieux, pour le rafraichissement de la terre. Et sans cela, & si Dieu n'y eust pourueu en ceste sorte, par vne prouidence tres-particuliere, ces pays seroyent tout à fait inhabitables.

Il n'en est pas ainsi de la Cochinchine, laquelle iouyssant des quatre saisons de l'année encore qu'elles n'y soyent pas si parfaitement réglées qu'en l'Europe, elle en demeure beaucoup plus temperée: Nonobstant qu'en son Esté, qui comprend les trois mois de Iuin, Iuillet, & Aoust, elle ait de grandes chaleurs, comme estant aussi située sous la Zone torride, & pour auoir le Soleil en ces mois là, au plus haut point d'eleuation qu'il puis estre sur leur teste. Neantmoins en Septembre, Octobre, & Nouembre qui font leur Automne, les chaleurs cessent, & l'air reste fort temperé, à raison des pluyes continuelles qui ont coustume de choir en ces temps-là sur les montaigne des Kemois: D'où viennent des eaux en telle abondance qu'elles inondent tout le Royaume, & se ioignant avec la mer, on diroit que ce n'est qu'une mesme chose. Au demeurât ces deluges d'eau viennent ordinairement de quinzaine en quinzaine & leur durée est de trois iours par chaque fois

Le

Le bien qu'ils font, c'est non seulement de rafraichir l'air: mais aussi d'engraisser la terre, la rendant plus fertile, & abondante en toutes choses: & sur tout en ris, qui est la meilleure manne, & plus commune nourriture de tout le Royaume. Et en autres trois mois de l'hyuer, qui sont Decembre, Ianuier, & Feurier, il soufflé des vents Septentrionaux, qui amènent des pluyes si froides, qu'elles suffisent pour distinguer l'hyuer, des autres saisons de l'année. Finalement aux mois de Mars, Auril, & May, se voyans les effects d'un agreable Prin-temps, tout se monstrant vert & fleury.

Au surplus, combien que desia nous ayons parlé de ces inondations, si ne veux ie pas finir ce Chapitre, sans remarquer au prealable quelque curiositez qui s'y rencontrent.

La premiere sera, qu'elles sont vniuersellement desirées de tous, non seulement parce qu'ils en ont vn air plus frais, & plus doux: mais bien d'auantage à cause de la Fertilité, qu'en retire leur terre. D'où vient, que si tost qu'ils les voyent, le plaisir, & contentement, qu'ils en ont, est tel & si grand, qu'ils le font assés paroistre: s'entreuisants, & festoyants & s'estrenants les vns les autres, criants tous d'alegresse, & repetants par plusieurs fois

Daden Lut, Daden Lut, c'est à dire voila de la leau venue, la voicy de la venue. Au reste il n'y a personne de quelque qualité qu'il soit qui ne prene part à la feste, iusques au Roy mesme.

Et d'autant que ces inondations viennent tant à coup, & à l'improuiste, que souuent il arriuera, que sans qu'au soir ils y ayent pensé, ils s'en trouueront au matin inuestis de toutes pars, & enfermez dans leurs maisons, & cela par tout le pays. De la naist, que souuent ils y perdront leur bestial, qui n'aura pas eu loisir de se refugier aux montagnes, & lieux plus esleuez.

A cette occasion, il y a vne loy fort gratieule en ce Royaume, qui porte que les Bœufs, Cheures, Pourceaux, & autres bestes, qui seront noyées dans ces eaux, soient perduës pour leurs maistres, & appartiennent de bon droit, à qui le premier s'en pourra saisir. Ce qui est encore vn sujet de grand, & singulier plaisir : d'autant qu'à l'arriuée du *Lut*, ils se iettent tous dans des barques, à la chasse & à queste du bestial noyé, dont par apres ils font leurs festins & banquets.

Les ieunes enfans, y ont pareillement leurs yeux, & esbats proportionnez à leur âge pour ce que ces grandes plaines couuertes de
ris ,

ris, fourmillâts en rats & souris, l'eau remplissant leurs tanières, force leur est d'en sortir à la nage, & se sauuer sur les arbres, si qu'il y a vn plaisir incomparable, de voir leur branches toutes chargées de souris au lieu de fueilles & de fruiçts. Sortent la dessus à l'enuy dans leurs barquerotes les bandes de petits garçons à la secousse des arbres, pour en detacher & noyer ces animaux. D'où vient outre leur esbat & passetemps enfantin, vn grand bien à toute la terre, qui demeure par ce moyen deschargée & repurgée de ceste vermine, qui autrement petit à petit feroit vn merueilleux degast dans ces larges & vastes campagnes.

Pour derniere commodité qu'apporte quant & soyle *Lut*, & qui ne doit pas estre mise au rang des moindres, c'est que chacun fournit & pouruoit sa maison de tout ce qui luy est necessaire: Car dans ces trois iours elle rend le pays nauigable de tous les endroits, & avec tant d'aisance & de facilité, qu'il n'y a rien qui ne se puisse mener & transporter d'vne ville à l'autre. Et aussi pour ce sujet remet-on à ce temps la les foires & marchez plus celebres, qui soient au Royaume: ou alors le concours est bien plus grand qu'en tout le reste de l'année. C'est encor durant ces iours-là qu'ils font amas de
bois

bois pour leur chauffage, & pour leurs bâtimens, s'amenant des montaignes sur leurs barques, qui passent aisement par les rues, & vont mesme iusques dans les maisons, qui sont à cet effet montées sur des rangs de colonnes fort haut esleuées pour donner à l'eau l'entrée & l'issue fort libre. Chacun se retirant cependant au plus haut estage de sa maison iusques ou, ce qui ne se peut assez admirer, iamaïs ne mont le *Lut*, pource qu'ils prennent si bien leurs mesures, dans la longue experience qu'ils ont, de la hauteur des eaux, qu'ils ne les apprehendent pas, estants bien certains, qu'elles demeureront tousiours au dessous de leurs bâtimens.

CHAPITRE III.

DE LA FERTILITE' DE LA TERRE.

ENCORE qu'on puisse aisement iuger de la fertilité de la Cochinchine, par les profits que luy apporte le *Lut*, ainsi que nous venons de dire, si ne laisserons nous pourtant d'en dire quelque chose plus en particulier.

La terre demeure si grasse & si feconde de ce *Lut*, ou desbordement d'eau, qui l'arrouse si a point, que trois fois tous les ans on y recueille

lle du ris, & ce en si grande quantité, & abondance, qu'il ne se trouue personne, qui ne s'aille traualler pour gagner sa vie, chascun content de quoy se nourrir plantureusement. La quantité & varieté des fruiçts y est grande toute l'année, & d'autant d'espece qu'en l'Inde aussi la Cochinchine est elle en mesme climat. Elle a toutesfois en particulier des Orangers bien plus grosses, que celles que nous auons en nostre Europe, & fort succulentes. Elle a l'escorce fort deliée, tendre, & sauoureuse d'une maniere qu'elle se mange aussi bien que le citron dans, qui en est agreable, & de pareille saveur, que les limons en Italie. On y voit encore certains fruits nommez des Portugais manans, & des autres figues d'Inde, quoy qu'il m'assez mal à propos à mon iugement, pour dire que ny l'arbre qu'en l'Inde on appelle figuier, ny celui de la Cochinchine, n'a rien de commun avec nos figuiers, ny en son bois, ny en son fruiçt. Et quant à l'arbre, il est semblable à la plante, que nous appellôs blé de Turquie, bien plus haut toutesfois: & les feuilles n'ont si longue, & si larges, que deux seulement, seroient bastantes de couvrir vn homme de pié en cap, & l'environner de toutes parts, De la est venu que quelques vns ont voulu dire, que ce fut l'arbre du Paradis terrestre.

restre dont Adam prist les fueilles, pour cou-
 urir sa nudité. Cet arbre pousse tout au haut
 de sa tige vne grappe de vingt, trente, ou qua-
 rante fruiçts, attachez ensemble, chascun des-
 quels ressemble, tant en sa forme, qu'en sa lō-
 gueur, & grosseur aux communs citrons d'I-
 talie. Quand le fruiçt n'est point encore par-
 uenu à sa maturité, l'escorce en est verte, &
 par apres elle iaunist, ne plus ne moins que les
 citrons. On n'a pas besoin de couteau pour
 ouurir & peler ce fruiçt : mais son escorce se
 leue avec la melme facilité, que nous leuons
 celle des feües nouuelles. L'odeur en est fort
 agreable, il a la moüelle ou chair de dedans
 route iaune, & assez ferme, comme celle d'une
 poire de bergamotte bien meure, qui se fon-
 droit en la bouche. D'où se voit, que cet arbre
 n'a rien de nostre figuier, que la saueur &
 douceur. Il se trouue aussi vne autre espee-
 ce de ces fruiçts, qu'on ne mange que rostis &
 mis dans le vin. La plante se seiche tous les
 ans, apres auoir donné son fruiçt, laissant au
 pié vn reietton, qui croist par apres pour l'an-
 née suivante. Celuy au reste qu'en Italie nous
 appellons figuier d'Inde, n'a rapport quel-
 conque, ny avec la plante, ny avec le fruiçt
 de ces Bananes, dont nous parlions mainte-
 nant, de maniere que ce n'est non plus celuy,
 qui

se trouue en ces quartiers, & que nous
nmons figuier d'Inde.

Le frui& au surplus est commun à toutes
Prouinces de l'Inde: Mais dans la Cochin-
ne s'en voit vne sorte, qu'on ne trouue
nt ny dans la Chine ny dans toute l'Inde.
est de grandeur esgale aux plus grands ci-
ns que nous ayons en Italie, & de telle
sseur, qu'il n'en faut qu'un pour rassasier
homme, ils ont la chair au dedans fort
nche, & sont pleins de force petits grains,
irs, & ronds, lesquels estants machez en-
mble avec la chair, sont fort agreables au
ust, & tres-salutaires pour les cours de verre
il y a encore dans la Cochinchine vn autre
ui&, que ie n'ay veu nulle autre part dans
nde, ils le nomment *Can*, il ressemble pour
forme & nature de l'escorce à nostre grenat:
mais il a au dedans vne moüelle vn peu li-
vide, qui se prend, & mange avec la cueillier,
a saueur aromatique, & est de couleur pres-
se semblable à vne nefle bien meure.

D'auantage ils en ont aussi qui semblent à
os cerises, sinon que leur goust est comme
eluy du raisin, en leur langage ils luy don-
ent le nom de *Gnoo*.

Ils ne manque pas de melons, mais qui ne
ont pas si bons que les nostres, & ne se man-
gent

gent qu'avec le sucre, ou le miel. Les concombres ou melons d'eau, comme les autres les nomment, y sont fort grands & tres excellents.

Il y naistre encore vn fruit appelé Gyaque qui est commun ailleurs en l'Inde; mais non pas si beau à beaucoup pres qu'en la Cochinchine, il vient sur vn arbre de la hauteur du noyer, & du chataigner, & à les espines beaucoup plus longues. Ce fruit esgale en grosseur les plus grâdes citrouilles d'Italie, & n'en faut qu'un, pour faire la charge d'un homme. Au dehors il a la forme d'une pomme de Pin, mais le dedans est tendre & mol. Il est plain de certains espics jaunes, dont les grains sont plats & ronds, comme un Iule d'Italie ou un teston, & au milieu de chascun grain se trouue l'os, qu'on iette quand on le mange. Ce fruit est de deux sortes l'une appelée des Portugais *Giacabarca*, & quitte le noyau, la chair en est ferme: l'autre ne le quitte point & n'a pas la chair si ferme: mais plustost molle, & comme de la colle. La saveur de celuy la, & de ce dernier encore, approche fort de ce fruit si delicieux qu'on appelle Durion, duquel nous allons parler.

Le Durion est un des excellents fruits qui soit au monde, il n'y en a point ailleurs qu'à Malacca, Borneo; & autres Isles circonuoisines.

Il n'y a gueres à dire entre l'arbre, qui le
 rte, & la Giaque. Son fruit même ressem-
 e encore à l'exterieur, ausi bien qu'à la Gia-
 e, à nostre pomme de Pin, tant en sa gros-
 ur, qu'en la durté de son escorce. La chair
 nt à l'os comme colle, & est merueilleuse-
 ent blanche, & sa saueur & douceur reuient
 blanc-manger des Italiens. Ceste chair au
 Re, & ceste liqueur, est distribuée au dedans
 la pomme en dix ou douze petites cellules,
 aucune desquelles contient son blanc-man-
 er au tour de son os, qui est de la grosseur
 vn gros marron. Et faut sçauoir qu'en la
 mpant, & ouurant, on est seruy d'vne odeur
 rt desagreceable, comme pourroit estre celle
 vn oignon pourri & gasté: encore que le de-
 ans ne s'en ressentent aucunement, & soit tres-
 greable au goust. Auquel propos ie raconte-
 y vne histoire ariüée en ma presence. Quel-
 u'vn eust enuie de faire gouster de ce fruit
 vn Prelat, venu de nouueau à Malacca, & säs
 penser autrement, l'ouurit deuant luy, d'oü
 sortist vne odeur si forte, & si desagreceable,
 ue ce Prelat en prist vn tel degoust, qu'il ne
 ay fut iamais possible de se resoudre à en ta-
 er. Mais comme il se fut mis en table pour
 isner, entre les autres seruices, luy fut pre-
 enté vn plat, où il n'y auoit que le dedäs de ce
 fruit

fruiçt qui en odeur & en saueur, est si éblable au bāc manger, qu'il fut aisé au Prelat de s'y tromper, comme à tout autre qui ne l'auroit veu apprestier. Comme donc il y eut porté la main, au premier morceau qu'il en prist, il le trouua d'un goust tant exquis, qu'en s'estonnant il demāda, qui estoit le cuisinier, qui scauoit faire vn blanc-manger si delicieux. A quoy celuy qui le traittoit en sa maison respondit en souffrant, qu'autre cuisinier n'y auoit mis la main, que le grand Dieu qui auoit pourueu ce pays d'un si rare fruiçt, qui n'estoit autre que le Durion, dont il auoit pris d'abord telle horreur. A ce mot le Prelat demeura merueilleusement estonné, & en mangea de si bon appetit qu'il ne s'en pouuoit saouler. Or ce fruiçt est si excellent, qu'à Malacca mesme où il vient, il se vendra par fois vn escu la piece.

La Cochinchine foisonne encore en vne autre certaine sorte de fruiçts, que les Portugais appellent Ananes. Et jaçoit qu'il n'y ait rien de plus commun en toute l'Inde, & au Brasil: toute fois pource que ie ne le trouue assez bien descrits à mon gré par ceux qui en ont parlé i'ay pensé d'en dire vn mot. Ce fruiçt ne croist point sur les arbres, ny ne viét point de semence,

de semence mais de racine, comme nos artichauts. La tige & la feuille est tout à fait pareille à celle des cardes & artichauts, Il est de figure ronde, en forme d'une colonne de neuf ouces de long, & gros en sorte, que c'est bien pour ce qu'on peut faire si on l'empoigne des deux mains. La charnure de dedans en est creusée & comme celle des raues, mais l'escorce est un peu plus dure, & est fait en escailles, qui ressemblent à celles des poissons. Quand il est meur, il est jaune au dedans, & par dehors se nettoye avec le couteau, & se mange tout nud. Il est d'un goût aigre-doux & pris en maturité, il a la délicatesse de la poire de bergerotte.

Se voit aussi en la Cochinchine vu autre fruit, qui luy est particulier, les Portugais le nomment Areca. Il a le tronc tout droit comme la palme, il est creux au dedans, & ne jette que des feuilles que tout au haut seulement, semblables à celles du palmier: Au milieu d'elles, sortent de petits rameaux, ou pend le fruit, qui est de la forme, & grandeur des noix: la couleur en est verte comme l'est aussi l'escorce des noix, & la moëlle toute blanche, & dure comme la châtaigne, & n'a ny goût ny saveur aucune. Ce fruit ne se mange point tout seul, mais couuert de quelque feuille

les de Betlé, plante fort cogneu dans toute l'Inde; dont les fueilles sont comme de lierre de nostre Europe, & la plante avec, qui s'attache aux arbres, comme le lierre. On decoupe ces fueilles par petites pieces, & dans chacune d'elles, se met vn morceau d'Aareca, tellement que de chasque fruit, on en fera bien quatre ou cinq morceaux. On met encore avec l'Areca de la chaux, qui se fait en ce pays-la non de pierre comme en Europe, mais d'escailles d'huïstres. Et côme icy en chasque maison, il y à des personnes destinées pour faire la cuisine, la despence, & les autres offices: ainsi en la Cochinchine, en chasque maison, il y à vne personne, qui n'a autre mestier que d'envelopper ces morceaux d'Areca avec le Betlé, & les officiers qu'on employe à cela, qui pour l'ordinaire sont des femmes, s'appellent Betleres. Ces morceaux ainsi apprestez se mettent dans des boettes, & en vont maschant tout au long du jour, non seulement quand il demeurent au logis, mais allants & venants par la ville, en parlant mesme, en tout lieu, & en tout temps: mais apres les auoir long temps maschez & pourmenez dás la bouche, sans les aualler, on les crache, n'en gardáts que la seule odeur, & qualité qui conforte merueilleusement l'estomach. Ce fruit
ainsi


ainsi préparé par morceaux, est tellement en usage, que quelqu'un allant en la maison d'un autre, pour le visiter, il en porte avec soy une boëtte toute pleine, & en presente aussi tost à celui qu'il visite, qu'il le met soudain en la bouche. Et deuant que celui qui rend la visite prene son congé, celui qui est visité, commande à la Betlere de sa maison, de luy bail-
ler une boëtte, qu'il offre à celui, qui l'estoit venu voir, comme pour rendre la courtoisie qu'il en a reçu. De maniere que par nécessité il en faut faire sans cesse, & si grand est le profit, qui se tire de cest Areca que le plus grand reuenu de ce pays, cōsiste à auoir des champs plantez d'Areca, comme parmy nous de vignes, & d'oliuiers, l'usage du Tabac, ou Petun y est aussi, mais non pas si frequent, que de leur Betlé. Il y a encore des courges de toutes sortes en abondance : aussi bien que des cannes de sucre. Les fruits de nostre Europe ne sōt point encore venus iusques à ceste heure en la Cochinchine. Je crois toutesfois que la vigne, & le figuier y prendroient fort bien. Nos herbes comme les laitues, la chicoree, les choux & autres semblables viennent en la Cochinchine, comme en toute l'Inde: Elles ne produisent cependant que des fauilles sans porter aucune semence, & quand on en veut

semer de nouveau , il en faut faire venir d'Europe.

La chair y est en tres grande abondance, tant pour le nombre- tres grand des bestes à quatre piez, qu'on y nourrist dans les maisons, comme vaches, cheures , pourceaux, Buffles, & autres semblables, & de sauvages, comme de chers, beaucoup plus grands qu'en Europe, sangliers , & plusieurs autres: qu'à raison encore de la volaille, comme poules, domestiques, & sauvages, dont les campagnes sont couvertes, de tourterelles, de pigeons, de canars, d'oyes, & de gruës qui se trouuent fort agreables au goust, & en fin de plusieurs autres sortes, que nous n'auons point en Europe.

La pesche y est encore fort foisonnante, & le poisson qu'on y prend est d'un goust si exquis, & releué, qu'apres auoir trauersé tant de mers, que j'ay faict, & couru tant de pays. il me semble qu'en aucun autre endroit ie n'en ay point trouué, qui puisse estre comparé à ce luy de la Cochinchine. Et d'autant que comme il a esté dict, le pays s'estend le long de la mer, il y a vn si grand nombre de barques pour la pesche, & si grande quantité de chasse marées qui portent le poisson par tout le Royaume, qu'en toute verité il fait bon voir ces longues files de personnes, qui de la mer
menent

tenent si souvent du poisson iusques aux montaignes, qu'inailliblement des vingt-quatre heures du iour les vingt pour le moins sont employées. Et bien qu'il soit vray que les Cochinchinois font plus de cas du poisson, que de la chair: toutefois ce qui fait principalement qu'ils s'addonnent tant à la pesche, est l'enuie qu'ils ont de se pourvoir d'une certaine sausse, qu'ils appellent *Balaciam*, qui se fait d'un poisson salé ramolli, & destrempé dans l'eau. C'est au demeurant vne liqueur mordante, assez semblable à la moustarde, mais chacun en pourroit sa maison en si grande quantité, qu'ils en remplissent les tonneaux, & les cuues, de mesme façon qu'en plusieurs endroits de l'Europe, se font les provisions de vin. Cette viande prise à part toute seule, ne vaut rien à manger mais elle leur sert pour donner goust, & resueiller l'appetit de manger leur ris, qu'ils trouueroient fade & sans saveur s'ils n'y apportent ceste sausse. Le ris estant donc la plus commune, & ordinaire nourriture de la Cochinchine, il est besoin de faire de ce *Balaciam*, (sans lequel ils n'y auroient aucun goust) en vne prodigieuse quantité, & par consequent que la pesche soit continuelle. Il n'est pas moins abundant en coquillages, huïstres, & autres fruits de la mer,



& principalement d'une certaine sorte, qu'ils appellent *Cameron*.

Mais sur tout ce qui a esté dit la prouidence de Dieu les à priuilegiez d'un certain manger rare, & exquis, qui à mon auis, ne peut estre mieux comparé qu'à la manne, de laquelle fut nourry le peuple choisi dans le desert, & ce manger est si particulier à la Cochinchine, qu'il ne se retrouue nulle autre part. Ce que j'en diray ne sera point par ouir dire, & sur le rapport d'autrui, mais par la propre experience que j'en ay, en ayant veu, & mangé souvent. Se retrouue en ce pays un petit oysson semblable à l'Arondellé, lequel attache son nid aux escueils, & rochers, ou se rompent les flots de la mer. Ce petit animaillon prend avec son bec de ceste escume de la mer, & avec une certaine humeur, qu'il tire luy mesme de son estomach meslant l'un avec l'autre, il en forme une ie ne sçay qu'elle bouë, ou bitume, dont par apres il se sert pour bastir son nid: qui s'estant depuis desseiché, & endurcy, deuiet trāsparāt, & d'une couleur meslee de iaune & de vert. Or ces nids sont ramassez par ceux du pays, qui estants amolis, & defaits dans l'eau, seruent d'affaisonnement aux viandes, soient de chair, de poisson, d'herbe, ou de quelque autre sorte, & leur communique une telle diuersité

ité de gouſt, & ſi propre à chacũ, qu'on diroit qu'il auroient eſté appreſtez, avec poiure, canelle, cloux de giroffles, & toute autre ſorte d'eſpicerie, ſi bien que ce ſeul petit nid, peut ſuffire à aſſaiſonner toute ſorte de viandes, ſans qu'il ſoit beſoin d'y employer ny ſel, ny huile, ny lard, ny autre aſſaiſonnement quelconque. Ce qui m'à fait dire, qu'il reſſembloit véritablement à la manne, qui auoit de ſoy le gouſt de tous les plus ſauoureux mangiers, ſi non que celuy cy n'eſt que louurage d'un petit oyſeau, ou l'autre eſtoit peſtri des mains des Anges du grand Dieu. Et il ſ'en trouue en telle quantité, que moy meſme j'ay veu charger iuſques à dix petites barques de ces nids ramassez le long des rochers, dans l'eſpace de moins d'une demie lieue. Mais d'autant que c'eſt vne choſe ſi exquiſe, il n'y a que le Roy qui en trafique, ils luy ſont tous reſeruez & le plus grand debit qu'il en fait eſt pour le Roy de la Chine, qui les a en tres grãde eſtime

Ils ne ſe ſeruent nullement de laitages, tenants à grand peché de traire les vaches, & autres animaux, donnants, pour raiſon du ſcrupule qu'ils font en cela, que le lait eſt deſtiné de la nature, pour la nourriture des petits. Côme ſi celuy a qui appartient les petits, ne pouuoit diſpoſer de l'aliment qui leur eſt deu.

Ils mangent de certaines choses, que nous auons en horreur parmy nous, & que nous re-
 nons pour venimeuses, comme des cameleons,
 qui sont vn peu plus grands, que ceux, qui
 dessechez, apportez des pays estranges, se
 voyent fréquemment en Italie. L'en ay veu
 acheter par vn mien amy quelques vns, liez, &
 empaquerez qu'il ietta sur la braise, & leur
 lien s'estant brulé, ils marchoiẽt tout belle-
 ment à leur mode sur ces charbons ardents,
 iusques à ce qu'ils sentirent la force du feu, à
 laquelle ils resisterent pour vn pen de temps,
 comme estants grandement froids, mais en fin
 ils s'y rostirent, & grillerent. La dessus ce mien
 amy vous les tire, & raclant avec vn couteau
 ceste peau brulée, la chair se trouua parfai-
 tement blanche, qu'il broya par apres: & les
 fist cuire avec vne certaine sausse, reuenant au
 beurre & les mangea, comme vne viande tres-
 excellente, en m'inuitant d'estre de la partie,
 mais ie me contentay bien de la veüe.

Pour ce qui touce le reste de l'entretien
 de la vie humaine, la Cochinchine en est pa-
 reillement tres bien pourueue, Premièrement
 parlant des habits, il y a si grande quantité de
 soye que les manœuvres & gens de peu s'en
 seruent à tous les iours. D'où vient que i'ay
 pris plus que d'vne fois tres-grand plaisir, de
 voir

ir les hommes, & les femmes trauailler à
rter des pierres, de la terre, de la chaux, & au
es choses semblables, sans se soucier le moins
monde de prendre garde à ne point deschi-
er ny souiller les beaux & riches habits, dont
s sont couuerts. Et cecy ne semblera point
strange, à qui sçaura que ces hauts meuriers,
ont les fueilles nourrissent les vers à soye, se-
ement dans de larges plaines comme icy le
chanure, & ne mettent pas plus de temps à
croistre. De maniere que dans peu de mois les
vers en sortent, & s'en nourrissent a l'air, filent
en leur temps la soye, & forment leuts petits
blots & pelotós, en si grande quantité, & abô-
dance que non seulement les Cochinchinois
en ôt assés pour leur besoin & necessité parti-
culiere: mais en pouruoyent aussi le Iapon, &
en enuoyét au Royaume des Laïs d'où après
elle est encore departie au Thibet. Car bien
que cette soye ne soit pas si fine, & delicate,
elle est neantmoins plus forte, & solide que
celle de la Chine. Pour leurs basimens & edi-
fices quoy qu'il ne soyent que de bois, si n'ont
ils de quoy porter enuie pour ce regrrd à au-
cune autre Prouince: puis que sans aucune ex-
aggeratió, le bois de ce pays est le meilleur qui
soit au reste du monde, au iugement de ceux
qui ont esté sur les lieux. Dás le tres grand nō-
bre,

bre, & tres-grāde diuersité d'arbres qu'ils ont, il y en à deux, qui sont employés plus communement aux bastimens, & sont de telle façon incorruptibles, qu'ils ne s'endommagent ny dans l'eau, ny sous la terre, & sont si solides, & si pesants, qu'ils ne nagent nullement sur l'eau, & seruent d'ancre aux nauires. L'un de ces bois est noir, non pas tant toute-fois que l'Ebene: l'autre est roux, & tous deux estants pelez demeurent si polis & lissez, qu'ils n'ont pas besoing de rabot. Ces arbres s'appellent Tin, & possible que celuy ne se tromperoit gueres, qui diroit que ce fut de ceste sorte d'arbres incorruptibles, dont se seruit le Roy Salomon pour la structure de son Temple, veu que desia nous sçauōs par l'escriture sainte, qu'ils s'appelloient d'un nom fort approchant de ceux cy, *Ligna Thyina*. Les Montaignes de la Cochinchine sont toutes couvertes de ces arbres, extremement droits, & d'une hauteur si desmesurée, qu'on diroit que de leur sime ils touchent les nuées, & de telle grosseur, que deux hommes ne les sçauroient embrasser. C'est de ces arbres que les Cochinchinois bastissent leurs maisons, estant permis à tout chascun d'en prendre sur les montaignes tant que bon luy semble. Toute la structure de leurs maisons, se porte sur
des

colomnes fort hautes, solides, & bien appuyees: dans lesquelles s'enchaissent des planches, qui s'ostent & se mettent, comme ils valent, pour les pouuoir changer avec des pillis de cannes, & de roseaux, qu'ils entreprennent curieusement pour donner passage à l'eau, durant les chaleurs: en partie aussi pour faciliter l'entrée, & l'issuelibre à l'eau, & aux vents, au temps des inondations comme nous disons cy dessus, Il font en outre mille petites gentilleses, & inuentions d'esprit pour enjoluer leurs maisons, ouourageants, & embellissant leurs ais, ce qui les pare à merveilles.

Et puisque nous sommes desia sur le discours des arbres, deuant que passer outre, liousteray quelque chose d'un bois, qui est plus pretieuse marchandise, qui se puisse tirer de la Cochinchine pour estre portée aux estranges. C'est ce tant renommé bois de Calamba, & Calamba: qui sont mesme chose que le bois, mais bien diuers, quant à l'estime, qu'on en fait, comme aussi en leur vertu. Il se trouue quantité de ces arbres, particulièrement sur les montaignes des Kemois, sont, & fort gros, & fort haut. Que si on coupe d'un jeune tronc, c'est l'Ambra, dont il y a asses grande quantité, & tout chascun

chascun en emporte tant qu'il peut. Mais quand le bois est pris d'une bien vielle souche, c'est le Calamba, qui seroit fort difficile à recouurer, si la nature mesme, n'y auoit pourueu, faisant naistre ces arbres à la sime la plus haute & la plus roide des plus difficiles montaignes, ou ils ont tout loisir de se vieillir, sans qu'il leur soit fait aucun tort. Il en tombe de temps en temps quelque branches, qui se rompent, & deprenent d'elles mesmes du tronc, ou par trop de seicheresse, ou par trop grande vieillesse, & partant on les trouue toutes cariées, & vermoulues : & ce-luy cy est le tant prisé & renommé Calamba qui surpassent notablement en vertu, & en suauité d'odeur l'Aquila commud. Tout chascun vend l'Aquila comme il luy plaist, mais le trafic du Calamba est reserué au Roy seul, à cause de l'excellence de son odeur, & de sa vertu. Et certainement il est sur les lieux ou il se recueille, si doux, & si odorant, qu'en ayant voulu esprouuer quelques pieces qui m'auoyent esté données, ie les enseuelis sous terre à la profondeur de plus de cinq piez & nonobstant se faisoient sentir, & cognoistre par leur odeur. Le Calamba pris ou il s'amasse vaut cinq ducats la liure, mais sur le porte de la Cochinchine, ou le commerce s'en-

n fait, il se vend bien d'avantage, & ne l'auton pas à moins de seize ducats la liure, transporté au Japon la liure en vaut deux ou trois ducats. Mais si on en rencontre vne piece de telle grosseur, qu'il puisse servir à faire vn oreiller, ou trauersin de lit, les Japonois l'achètent au prix de trois cés & quatre cens ducats la liure. Et cela vient de ce qu'il ont expérimenté que mieux vaut pour la santé d'air en dormant quelque chose de dur sous la teste, qu'vn oreiller de plume, mal sain, & mal adif, pour l'ordinaire ils se seruent d'vne piece de bois, que chascun selon ses moyens peut estre du plus pretieux, qu'il peuvent se procurer. Et si c'est du Calamba c'est vn bois digne seulement d'vn Roy, ou de quelque bien grand Seigneur. L'Aquila bien plus estimée, & de moindre prix que le Calamba, est bien tel cependant qu'il ne faut vne nauire chargée d'Aquila, pour rendre vn marchand riche, & opulent pour toute sa vie. Et la meilleure recompense que puisse donner le Roy au Capitaine de Malacca, c'est de luy permettre vne traict d'Aquila. Car les Brachmanes & Banians de l'Inde, ayants l'usage de brusler les corps de leurs morts avec ce bois, tres odorant, sont cause qu'il s'en depesche aussi-tost vne infinie quantité.

En fin la Cochinchine a quantité de mines des plus pretieux metaux, & d'or principalement. Et pour comprendre en peu de mots ce qui meriteroit bien d'estre estendu plus au long touchant la fertilité de ce pays. Je concluray ce chapitre avec ce qu'en disent les Marchands Europeens qui y vont, que les richesses de la Cochinchine sont plus grandes, que celles de la Chine mesme, que nous scauons toutefois estre si riche, & opulente en toutes choses.

Il faudroit adiouster en cet endroit quelque chose des animaux, que nous auons desia dit estre en grand nombre en la Cochinchine: mais pour ne me point trop espancher, ie veux seulement parler des Elephants, & Abades ou Rinoceros, qui se trouuent en ces pays la principalement, & beaucoup de choses bien curieuses s'en peuuent dire, que plusieurs n'auront possible iamais ouy.

CHAPITRE. IV.

DES ELEPHANTS ET ABADES

Il y a force Elephâts dâs les bois de la Cochinchine, dont ils ne se seruent pas, pour n'auoir

voir l'adresse de les prendre, & de les ap-
 procher. Ainsi les amène-on desia tous
 ssez, & disciplinez de Cambogia, qui est
 autre Royaume voisin. Ceux-cy sont deux
 plus grands que ceux de l'Inde. Le pas, &
 tige, qu'ils laissent apres eux, n'a pas moins
 un pié & demi de diametre. Les dents qui
 sortent de la bouche, desquelles se faict
 faire ont bien souuent treize à quatorze
 de longueur aux mâles, les femelles les
 de beaucoup plus courtes. D'où il est aisé
 de juger, de combien plus grands sont les Ele-
 mens de la Cochinchine, que ces autres,
 on va menant, & montrant par l'Europe:
 desquels ne passent pas plus de deux
 & demi de long.

ils vivent longues années, & comme vne
 fois j'eusse demandé quel age auoit vn que
 l'on m'apporta, le conducteur me respondit, qu'il
 auoit soixante de Cambogia, & quarante
 de Cochinchine. Et parce que j'ay voyagé
 plusieurs fois sur des Elephâts par ce Royau-
 me, j'en pourray rapporter plusieurs choses,
 qui ont de la nouveauté, mais qui sont
 toutes moins tres-vrayes.

Un elephant porte d'ordinaire treize ou qua-
 tre personnes, qui s'y accommodent en ce-
 façon. Tout ainsi comme nous mettons
 vne

vne selle sur nos cheuaux, ainsi ils agencent sur leurs Elephants vne certaine machine, en la forme d'une grande litiere, en laquelle sont quatre siege, & elle se lie avec des chaines sous le ventre de l'Elephant, comme la selle d'un cheual avec ses sangles. La litiere a deux entrées sur les costez, ou sont six personnes, rangées trois à trois, & vn autre sur le derriere, ou se placent deux autres personnes, & finalement le Nayre, qui est comme le carrossier qui se met sur la teste de l'Elephant, pour le regir & gouverner. Il ne m'est pas seulement arriué de voyager par terre en la façon susdite, mais écore plusieurs fois par eau, passant en cette sorte quelque bras de mer esloigné de la terre de plus d'une demy-lieüe. Et a dire le vray c'est vne chose merueilleuse, à qui ne l'a iamais esprouué, de voir vne si grande, & vaste masse de chair, chargée d'un si grand fais, aller nageant à trauers les eaux ressemblant à vne barque poussee de ses rames. Bien est-il vray qu'il faisoit assez paroistre qu'il souffroit beaucoup, tant à raison de la peine qu'il auoit à porter la grande masse de corps, que pour la difficulté de la respiration, tellement que pour se soulager & rafraischir en cest ahan, il prenoit l'eau avec sa trompe, & la reiettoit si tres-haut en l'air, qu'on eust dit

dit que c'estoit vne Baleine qui n'auoit dans l'Ocean.

A raison mesme de ceste si grande corpulence, il a vne difficulté extreme à se courber. Et quoy qu'il soit necessaire qu'il le face pour la commodité des voyageurs qui ont à sortir ou entrer dans la litiere, il ne le fait pas neantmoins sans le commandement du Nayer, & si pendant qu'ils se tient courbé quelqu'vn s'amuse vn peu trop, soit pour faire des compliments à ses amis, soit autrement, il se dresse sur ses piez d'impatience qu'il a de plus attendre, tant il luy est violent de se tenir en ceste posture.

Il n'y a pas moins de quoy s'estonner, de voir qu'au commandement du mesme Nayer, il fait de son corps, pour ainsi, dire comme vne eschelle, pour la plus grande commodité de ceux qui doiuent entrer dans la litiere. Pour premier eschelon il donne le pié, qui est assez esleué de terre. Pour le second, il present le haut du pasturon, qui en est assez esloigné, & pour le troisieme, il plie le genoüil. Le quatrieme est l'os du flanc, qui se iette vn peu en dehors à cet effect, & de la il vous reçoit sur sa trompe, & vous porte, a vne chaine attachée à la litiere.

D'icy se voit bien euidamment combien

Q

ceux

ceux-la se sont mespris qui ont dit & laissé mesme par escrit, que l'Elephant ne se pouuoit ny courber ny coucher, & que pour le prendre l'vnique moyen estoit, de s'ier l'arbre contre lequel il se deuoit appuyer pour dormir, parce que tombant à la cheute de ce soustien trompeur, il luy estoit force de demeurer là, sans se pouuoir releuer, & que par ce moyen la proye demeuroidt assurée au Chasseur qui la poursuiuoit. Tout cela n'est qu'une fable, encore qu'il soit hors de doute que pour dormir, il ne se couche iamais, ceste situation luy estant si incommode & violente comme il a esté dit. Et pourtant il dort tousiours debout avec vne continuelle agitation de teste.

Aux occasions de guerre & de bataille on oste le ciel de la litiere, d'où comme d'une tourelle les soldats combattent avec fleches & mousquets, & par fois encore avec pieces de campagne : les forces ne manquant pas à l'Elephant pour les porter estant vn animal grandement fort, s'il y en a aucun autre. Et i'en ay veu moy-mesme vn lequel avec sa trompe portoit des fardeaux excessifs : vn autre qui enleua vne grosse piece d'artillerie; & vn autre aussi qui tout seul tira dix galio-tes l'une apres l'autre, les prenant entre ses dents

dents avec vne merueilleuse dexterité, & les jettant dedans la mer. I'en ay veu d'autres arracher de gros arbres avec aussi peu de peine que nous pourrions faire vn chou, ou vne laitue. Avec la mesme facilité ils jettent par terre, & renuersent les maisons, abbattants les ruës entieres quand cela luy est commandé en guerre, pour endommager l'ennemy & en paix pour couper chemin aux flammes en cas de feu & d'incendie.

La trompe est longue par proportion à la hauteur du reste du corps, de sorte que sans se pancher ou courber il peut aisement prendre à terre ce que bon luy semble. Elle est composée de plusieurs petits nerfs liez, & enchaînez l'un avec l'autre, en sorte que d'un costé ils la rendent tellement flexible & maniable qu'il l'estend comme il veut pour prendre les choses les plus petites, & d'autre part dure & forte comme nous auons dit.

Tout le corps est couuert d'une peau rude, & aspre, de couleur de cendre, le chemin qu'il fait ordinairement est de douze lieux par iour. Son mouuement à qui n'y est accoustumé, cause la mesme incommodité qu'experimentent quelques-vns, peu faicts aux voyages de Mer par le branle du nauire.

Pour la docilité de l'Elephant, i'en diray

choses plus merueilleuses que ce qui s'en raconte d'ordinaire: qui feront bien voir qu'avec raison vn certain à dit que *Elephanto belluarum nulla prudentior*, veu que il fait des choses qui feroient croire iustement qu'il opere avec intelligence & avec prudence. Premièrement encore que le Nayre le serue d'vn instrument de fer long de quatre palmes, qui par vn bout à vn crochet avec lequel il le bat & le pique, à ce qu'il s'esueille & se rende attentif à ce qui luy est commandé, avec tout cela cependant d'ordinaire il le gouuerne & regit de parole, de façon qu'il semble qu'il entende bien son l'angage, & s'en trouue quelques vns qui en sçauent trois où quatre tres-difficiles selon les diuers pays, & Royaumes dans lesquels ils ont vescu. Ainsi sembloit-il que celuy sur lequel i'ay voyagé entendist la langue de Cambogia, d'où il estoit venu, & celle de la Cochinchine où il seruoit. Mais qui ne s'esmeruilleroit de voir le Nayre deuiser avec son Elephant, l'informer de son voyage, & des chemins qu'il doit prendre, par où il doit passer, en quelle hostellerie il s'est resolu de loger, ce qu'il y trouuera à manger, & en fin luy raconte par le menu tout ce qu'il deura faire ceste iournée la: Et que l'Elephant execute ce qui le regarde avec

avec autant de punctualité, que le pourroit faire vn homme de bon & sain iugement. Tellement qu'apres que l'Elephant semble auoir bien entendu le lieu ou il doit aller, il s'y porte tout droit par le plus court, sans s'amuser à chercher le chemin le plus battu, & sans s'estonner au rencontre, ny des fleuues, ny des bois, ny des montaignes, mais s'imaginant fort bien qu'il passe aisement par tout, il prend son chemin & le poursuit, passant par dessus toutes sortes de difficultez. Et s'il a vne riuiera à trauerser, ou il la guée, ou il s'en tire à la nage. S'il luy faut aller au trauers de quelque bois, il met en pieces les branches qui l'empeschent, arrache les arbres entiers avec la trompe, & tranche les autres avec vn fer bien affilé, fait en guise de faux, qu'on attache à cet effect sur le deuant de la litiere, & quand l'occasion s'en presente, il tire premierement les branches à loy, puis il vous empoigne ce fer & les coupe & abbat, se faisant par tout vn chemin large & aisé, donnant le gäst aux forests pour fortes & espaisles qu'elles puissent estre, si qu'on s'apperçoit bien que l'Elephant y a passé, & s'y est ouuert son chemin. Et tout cela pour executer le commandement du Nayre, avec autant de facilité que de promptitude & sou-

daineté. Vne seule chose incommode fort cet animal, & luy donne bien de la peine, c'est quand quelque espine, ou chose semblable luy blesse la plâte du pied, qu'il a merueilleusement tendre & sensible, & pourtant il va avec grande circonspection, & pas mesurez, quand il passe par des lieux dangereux pour tels rencontres. Je me suis trouué vne fois dans vn voyage, où il y auoit sept ou huit Elephants qui marchotent tous de compagnie, lors que i'ouys les Nayres qui auisoient chascun le sien, qu'ils se prissent bien gardes où ils mettoient le pied, d'autant qu'une demy-lieuë durant ils deuoient passer par certaines sablonieres, dans lesquelles ont coustumes de naistre des espines.

A cet aduis les Elephants baissèrent la teste, & ouurant bien & beau les yeux, comme quand on est en peine de trouuer quelque petite chose qui se seroit esgarée, ils alloiët pied à pied avec attention, autant qu'e dura ce chemin, iusques à tant qu'estants aduertis, qu'ils n'auoient plus que craindre, ils haussèrent aussitost la teste, & continuerent leur chemin comme deuant. Arriuez qu'ils furent le soir à l'hostellerie, les Nayres commanderent aux Elephants d'aller pasturer dans vn bois, sans leur oster la litiere de dessus le dos, & comme

ie leur demandois , pourquoy ils ne les deschargeoient point , ils me respondirent que les Elephâts se païssoiët de troncs d'arbres,& qu'afin qu'ils les peussent tailler à leur poste, avec la faux que nous auôs dit il estoit necessaire de leur laisser leur litiere. Le iour suiuant ayants à gister en vn lieu, où il n'y auoit point de bois, chasque Nayre y porta vn fagot de troncs verds & assez gros pour son Elephât. Je m'entretins avec vn singulier contentement à en considerer vn qui prenoit ces branches avec sa trompe plus habilement que les autres, les peloit avec les dents , & puis le mangeoit aussi viste, & avec autant d'appetit, que nous mangerions vne figue , ou quelque autre fruit. Me trouuant le iour d'apres à deuiser avec les autres voyageurs qui estoient bien vne vingtaine : ie leur dis le singulier plaisir que i'auois pris à voir la gentillesse de cet Elephant à manger ces branches d'arbre. Sur l'heure le Nayre par commandement du seigneur de cet Elephant, l'appella à haute voix par son nom de *Gnin*, & comme il estoit vn peu à l'escart, il haussa soudain la teste pour prester l'oreille , à ce qu'il luy vouloit dire. Ressouuiës toy, dit le Nayre, de ce Pere passager, qui te regardoit hier manger avec plaisir, prens tout à cet heure vn tronçon comme

celuy que tu auois, & viens-t'en en la present
ce faire cōme tu faisois. Le Nayre n'eust pas
plustost parlé, que voila l'Elephāt venu deuāt
moy, tenant de sa trompe vn tronc d'arbre,
& me remarquant entre tous les autres, me le
presenta, le pela, & le mangea, puis m'ayant
fait vne profonde reuerence, il se retira quasi
comme en se riant, avec des signes d'aïse, & de
resiouyffance: Et moy ie restay fort estonné,
de voir en vn animal tant d'aptitude à co-
gnoistre & à faire ce qui luy estoit comman-
dé, il n'obeyt pourtant qu'au Nayre, ou à son
Maistre, & ne peut voir que personne autre le
monte, & si quelqu'un l'entreprēnoit, & que
l'Elephant s'en apperceut, il seroit bien à
craindre qu'il ne jetast la litiere cōtre terre,
& ne le tuast avec la trompe. C'est pourquoy
quand quelqu'un le doit mōter, le Nayre luy
couure les yeux de ses oreilles, qui sont fort
grandes, & difformes. Quand il se monstre re-
tif à ce qui luy est commandé, & qu'il ne le
fait si promptement qu'il deuroit, le Nayre
ayāt les deux pieds sur sa teste, le bat, & cha-
stie fort, & ferme, & luy descharge de grands
coups de bastons sur le milieu du front. Et
cōme vne fois nous estions plusieurs de com-
pagnie sur vn Elephant qui nous portoit, le
Nayre le bastonnāt en la façon que nous ve-
nons

nous de dire, à chasque coup qu'il receuoit on eust dit, qu'il nous alloit tous jeter par terre. On luy donne d'ordinaire six ou sept coups dans le milieu du front: mais avec tant de vehemence, que l'Elephant en tremousse tout: ce que toutesfois il endure avec beaucoup de patience.

Il n'y a qu'un seul reneontre, auquel il refuse d'obeyr au Nayre, & à qui que ce soit, qui est quant à l'improuiste, il entre en rut: car pour lors comme estant tout hors de soy, il ne souffre personne, & prend la litiere avec sa trompe, & tous ceux qui sont dedans massacrant, fracassant, & mettant tout en pieces. Toutesfois le Nayre s'en apperçoit ordinairement un peu auparauant, par certains signes, & mettant soudain pied à terre avec toute sa compagnie, il le descharge aussi de sa litiere, & le laisse tout seul à l'escart, iusques à tant que sa chaleur soit passée. Apres laquelle s'auisant de ses desordres, & comme ayant honte de soy mesme, il va la teste baissée recevoir les bastonnades, qu'on luy doit dōner, luy semblant qu'ils les a bien meritées.

On s'en seruoit autres fois fort vtilemēt en guerre, & les armées qui sortoiēt en campagne, avec de bonnes bandes de ces animaux estoient à craindre. Mais depuis que les Portugais

tugais trouuerent l'inuention de leur ietter au nez, des torches & brandons de feu, ils deuiendrent pluſtoſt dommageables qu'autrement. Pource que ne pouuants ſouffrir ces flammes allumées, qui leur donnoient dans les ieux, ils ſe mettoient furieusement en fuite, & iettoient leurs propres armées en deſroute, tuants & bouluersants, tout ce qui ſe preſentoit en leur chemin.

L'Elephant priué ne combat que deux animaux, qui ſont l'Elephant ſauuage, & l'Abade ou Rinoceros, ceſtuy cy, il le ſurmonte: mais de l'autre, ordinairement il eſt vaincu.

L'abade eſt vn animal qui à quelque choſe du bœuf, & du cheual, gros pourtant comme vn petit Elephant. Il eſt tout couuert d'eſcailles, dont il eſt armé comme de plaſtrons. Il n'a qu'vne ſeule corne au beau milieu du front, toute droite en forme de pyramide, & a les piez & les ongles comme le Bœuf. Comme i'eſtois à Nouocmon, ville de la Prouince des Pulucambis, le Gouverneur ſortit vne fois pour aller à la chaffe d'vne Abade, qui eſtoit dans vn bois proche de noſtre demeure. Il s'eſtoit accompagné de plus de 100. hōmes, qui alloyent avec luy, partie à pié, partie à cheual, & auoit avec cela huit ou dix Elephants. L'Abade ſort du bois, & à la veüe de tant d'ennemis,

nemis, non seulement, elle ne donna aucun signe d'apprehension, mais s'estant ramassé ses forces elle s'en vint furieusement contre eux tous, la dessus la compagnie se diuise & fend en deux ailles, au trauers desquelles passa l'Abade à la course, & arriua à l'arriere garde ou estoit le Gouverneur qui l'attendoit pour la tuer, monté sur vn Elephant, lequel tascha de l'empoigner avec sa trompe: mais il n'en peut jamais venir à bout, tant elle faisoit de sauts & de bonds, ains elle s'efforçoit d'efferrer l'Elephât avec sa corne. Le Gouverneur scachât tres bien qu'elle ne pouuoit estre offentié que au defect de ses escailles, & s'il ne luy donnoit dans le flanc, attendit qu'en sautant, elle luy descouurit le ventre, & alors prenant son à point, avec vne merueilleuse dexterité, il vous luy lança vn dard, & la transperça de part en part, avec les acclamations, & cris d'allegresse de tous ceux de sa bande. Qui sans attédre autre chose, firent sur le champ vn grand amas de bois, auquel on mit le feu, & tandis que les escailles de cet animal se brusloient, & qu'il se rostissoit, ils balloient, & sautoient tout à l'entour, en tranchant chascun l'vn apres l'autre sa carbonnade, à mesure que le rosti se cuisoit, & les mangoiert ioyeusement. Cela fait ils ouurirent l'Abade, pour en tirer le cœur, le foye,

foye, & le cerneau, dont ils firent vn plat plus honneſte, qu'ils preſenterent au Gouverneur, qui s'eſtoit tiré vn peu à l'eſcart, en vn lieu affez eſlué, prenant ſon plaifir, & paſſer temps à regar des ce lieu. Et moy qui me trouuay preſent à ceſte diſſaite, i'euy pour ma part les ongles, que i'obris du Gouverneur, lesquel les ont, à ce qu'on tient, les meſme vertuſ, & proprietez que celles del'Eſtât. La corne auſſi en eſt ſouueraine contre les poiſons, ne plus ne moins que celle de la Licorne.

CHAPITRE. V.

**DU TEMPERAMENT, MOEURS
& Couſtumes des Cochinchinois, de leur façon
de viure, veſtir, & ſe medecamer.**

LEs Cochinchinois ne different gueres pour la couleur du viſage des Chinois, & ont tous le teint oliuaſtres, parlant de ceux qui ſont plus voiſins de la mer: car pour les autres, qui ſont plus auant dans la terre iuſques au Tunchim, ils ſont auſſi blancs que les Europeans. Pour les traits de viſage ils reti rent encore aux Chinois, ayants comme eux le

le nez plat, les yeux petits, & quant à leur stature; elle est mediocre, ie veux dire, qu'ils ne sont, ny si petits que les Japonnois, ny si hauts que les Chinois. Mais en force & disposition du corps, ils les surpassent les vns & les autres, & en courage & valeur, ils deuantent les Chinois, seulement les Japonnois les surmontent en vne chose, qui est le mespris de la vie, dans les perils & combats. Car les Japonnois n'enfont point de cas, ne craignants la mort en façon quelconque. Le Cochinchinois est plus d'oux, & plus courtois en sa conuersation, qu'aucun autre peuple d'Orient, & quoy que d'un costé ils se prise beaucoup de sa valeur, si tient il d'autre part à grande infamie de se laisser transporter à la cholere Et la ou toutes les autres nations Orientales tiennent les Europeans pour gens profanes, & que naturellement ils les aient en horreur, tellement que quand nous abordons à quelque vne de leurs terres, ils se mettent tous en fuite Le contraire se fait toutes-fois dans la Cochinchine, ils nous acostent à l'enuy, ils nous for mille demâdes, nous prient de mager avec eux, bref ils vsent de toutes sortes de courtoisie, ciuilité, & priuauté en nostre endroit. Ainsi m'arriua il, & a mes autres cōpagnons, à nostre premiere entrée en ce pays. ou

on eust dit que nous estions parmy nos plus grands amis, & qu'on nous y cognoissoit de longue main. Qui est vne belle porte ouuerte aux Predicateurs de IESVS-CHRIST, pour y prescher le sain& Euangile.

De ce naturel qu'ils ont si complaisant, & de cette facilité de mœurs, s'ensuit pareillement vne grande vnion, & bonne intelligence qu'ils ont par entre eux, traictants par ensemble les vns avec les autres, avec autant de franchise, & de candeur, comme s'ils estoient tous freres, nourris, & esleuez en mesme maison, encore qu'ils ne se soient iamais veus ny cogneus. Et seroit estimé grande vilenie parmy eux, que quelqu'un mangeast quelque chose pour petite qu'elle fust, sans en faire part à ceux qui sont avec luy, donnant à chacun son morceau. Ils sont d'inclination liberaux, & bien faisans aux pauvres à qui ils ont coustume de ne iamais refuser l'aumosne, qu'ils demandent: & penseroient auoir bien fort manqué à leur deuoir, s'il la leur auoient desniée, comme s'y tenants obligez par iustice. De la est que quelques estrangers s'estants vne fois sauuez d'un naufrage en vn port de la Cochinchine, & n'ayants aucune cognoissance de la langue pour pouuoir demander ce qui leur faisoit besoin, il ne leur fallut

fallut apprendre que ce tout seul mot, *Doï*, qui veut dire iay faim. Car tout aussi tost qu'ils entendirent ces estrangers se plaindre de cette sorte, & s'en aller criants aux portes de leurs maisons *Doï*, ils sortoient tous à l'enuy touchez de compassion, & leurs donnoient à manger, si bien qu'en moins de rien ils amasserent tant de prouision, qu'un nauire leur ayant esté depuis accordé du Roy, pour retourner en leurs pays, il ne s'en trouua pas vn qui voulut se resoudre a prendre ceste commodité, tant ils s'estoient affectionnez à vn pays, ou ils auoient trouué des personnes, qui leurs fournissoient si liberalement de quoy s'entretenir, sans trauailler. Si bien qu'il fut necessaire que le Capitaine du nauire les contraignist à grand coups de baston, & de plat d'espée à s'embarquer, comme ils firent, chargeants leur nauire du ris qu'ils auoient recueillis, allâts seulement crians par les portes iay faim.

Mais autant que les Cochinchinois se monstrent prompts & liberaux à donner, autant & plus le sont ils à demander tout ce qu'ils voient : aussi nont ils pas plustost ietté les yeux sus les choses, qu'ils pensent estre rares & curieuses, qu'ils leur en prend enuie, & vous disent aussi tost *Sin moai*, qui veut dire
 donnez

donnez moy vne de ces choses la. Et tiennent à si grande discourtoisie, qu'on leur refuse vne chose, bien que rare, & pretieuse, & que l'on n'ait que celle la que, quiconque leur fera ce refus, il sera aussi tost pris pour vn vilain. Si que il est besoin, ou de cacher ce qu'on a ou d'estre prest à le donner, a qui le demande.

Vn marchant Portugais ne prenant pas plaisir a ceste facon de faire, si extraordinaire, comme il y en a bien peu qui s'y plaisent, & se voyant tous les iours importuné en ce pays, de donner ce qu'on luy voyoit de beau entre ses mains, s'aduisa vn iour de se gouverner de mesme facon avec eux. Il s'approche à ce dessein, de la barque d'un pauvre pescheur, & mettant la main à vn grand panier, qu'il auoit plein de poisson, luy dist en langue du pays *Sain mocai*, donne-moy cela, le bonhomme sans autre discours luy bailla le panier, tel qu'il estoit pour l'emporter, comme fit le Portugais, en sa maison, non sans s'estonner, & s'esmerueiller, de la liberalité des Cochinchinois. Bien est vray qu'ayant pitié du pauvre pescheur, il luy paya depuis, ce que pouuoit valoir son poisson.

Les termes d'entretien, courtoisie, & civilite, sont à plus pres les mesmes que ceux des Chinois. Les inferieurs traitants avec beau-

coup

coup d'esgard avec leurs superieurs, comme aussi les elgaux entre eux, pratiquants toutes les petites punctualitez, & menus complimens, que nous sçauons estre tous particuliers aux Chinois: & specialement ce grand respect qu'ils rendent aux plus vieux, preferants tousiours les plus âgez en toutes choses, en quelque degré, & condition qu'ils soient, & donnant à la vieillesse toute sorte de preeminence par dessus les ieunes. Et par ainsi quelques vns de ces seigneurs, nous estants venu plusieurs fois visiter en nostre maison, encore qu'ils eussent esté aduertis par l'interprete, qu'un bon Pere, plus âgé que les autres, n'estoit pas nostre Superieur, il ne leur fut pas toutefois possible ne s'abstenir de saluer le vieillard deuant le Superieur, qui estoit beaucoup plus ieune. Dans toutes les maisons des Cochinchinois pour pauvres qu'elle soient, on garde trois manieres de se seoir. La premiere & moindre de toutes, se fait sur vne natte estenduë à platte terre, & c'est de la sorte, que s'asseyent les personnes qui sont de mesme qualité. La seconde sur certaines cordes, ou sangles tenduës, & reuestuës de natte bien plus fine, & delicate que l'autre, ou se mettent les personnes plus honorables. La troisieme est sur vne tente, esleuëe de terre d'en-

D

uiron

viron deux piéds & demy, dressée en forme de liét, & qui se presente aux Gouverneurs seulement, & Seigneurs du lieu, ou aux personnes dédiées au service diuin, aussi y font-ils tousiours seoir nos Peres.

De ceste gentillesse & agreable humeur des Cochinchinois, naist l'estime, qu'ils font des estrangers, auxquels ils donnent la liberté de viure chacun selon sa loy, & de se vestir comme bon leur semble. Ains ils loüent leurs façons de faire, admirent leur doctrine, & la preferent librement à la leur : tout au contraire des Chinois, qui ne font estat que de leur pays, façons de faire, & doctrine.

Pour ce qui est de leurs habillemens, nous auons desia dit, que la foye est si commune en la Cochinchine, que tous en vont vestus. Reste seulement de parler de la façon qu'ils y gardent. Et pour commencer par les fêmes, il faut aduouër que leur habit m'a tousiours semblé le plus modeste de toute l'Inde, puis qu'elles ne pourroient souffrir qu'aucune partie de leurs corps fut descouuerte, nō pas mesme durant les plus grandes chaleurs. Elles portent cinq ou six taffetas, l'un sur l'autre, & tous de differentes couleurs. Le premier descend iusques à terre, & elles le font traîner avec telle grauité, bien-seance, & majesté, qu'on

qu'on ne peut mesme appercevoir le bout de leurs pieds, suit apres le second plus court que le premier de quatre ou cinq doigts, puis le troisieme plus court, que le second, & ainsi du reste, avec proportion de l'un à l'autre. De maniere que toutes les couleurs, s'y voyent dans leur varieté. C'est là l'habit que portent les femmes de la ceinture en bas: Car pour le corps elles le courent de certains corps de cote, faits en eschiquier, tous diuersifiez en couleur, jettans par dessus vn voile si fin, & delié, qu'on voit aisement à trauers, toute ceste bigarreure, qui represente vn riant & gracieux printemps, mais accompagné de beaucoup de grauité, & de modestie.

Elles portent leurs cheveux espars, & flottans sur les espaules, & les laissent croistre à telle longueur, qu'ils battent iusques en terre, & plus ils sont longs, plus sont-ils trouuez beaux. Elles ont sur la teste vne grande capelle, quia les bords si larges, qu'elle leur cache tout à fait la face, sans qu'elles puissent porter la veüe plus loing, que trois ou quatre pas deuant elles. Et ces capelles sont entretissuës de soye, & d'or selon la qualité des personnes. La courtoisie n'oblige les femmes à autre chole, quand il faut saluer ceux qui les rencontrér, que de hausser leurs

chapeaux, autant qu'il suffit pour se faire voir en face.

Les hommes au lieu de hauts de chausses, s'envelopent d'une piece d'estoffe toute entiere, se suruestant pareillement cinq ou six habits longs & larges, tous de fine soye de différentes couleurs, avec de grandes & larges manches, comme pourroient estre celles des Peres de S. Benoist. Ces habits de la ceinture en bas, sont tous tailladez & deschiquetez à belles mouchetures. Si bien qu'allants par la ville, ils font parade de toutes ces couleurs mêlées ensemble : que si quelque doux ventelet vient à donner dedans, qui les enleue, & face voltiger, on diroit proprement que ce sont autant de Paons qui font la rouë, & estallant la varieté de leurs plumes.

Ils nourrissent vne longue perruque comme les femmes, laissant tomber leurs cheveux iusques aux talons, & ont aussi leurs capelines. Ceux qui ont de la barbe qui sont assez rares, ne se la coupent jamais, se conformants en cela aux Chinois, aussi bien encore qu'à laisser croistre les ongles de leurs doigts, que les nobles ne roignent jamais, les gardants pour marques de noblesse, & pour se distinguer du menu peuple & des artisans, qui ne les peuvent auoir longues, à cause qu'ils

qu'ils en feroient empeschez dans les mestiers qu'ils exercent : là où les Caualliers les ont si longues qu'ils ne peuuent rien serrer dans le poing. Ils ne peuuent gouster nostre façon de couper les cheueux, & roigner les ongles, leur estant aduis qu'ils ont esté donnez de la nature pour l'ornement de la personne. Ainsi comme on parloit vne fois des cheueux, ils firent vne objection à laquelle ils ne fut si aisé de respondre du commencement. Si, disoient-ils, le Sauueur du monde, à qui vous faictes estat de vous conformer en toutes vos actions, portoit les cheueux longs, & vne perruque à la Nazareene, comme vous l'asseurez vous mesmes, & nous le faictes voir en vos peintures, pourquoy ne faictes vous pas le mesme. Adjoustants à cela, pour plus grande force, que le Sauueur du monde s'estant seruy d'une longue perruque, donnoit bien à cognoistre que ceste façon estoit la meilleure. Ils se contenterent neantmoins quand nous leurs dismes que l'imitation ne consistoit pas en l'accoustrement.

Les gens de lettres & Docteurs s'habillent vn peu plus graueement, sans tant de couleurs & deschiquetures, ains ils couurent toutes les autres d'une robbe de Damas noir; ils portent en outre vne forme d'estolle qu'ils pen-

dent à leur col , & au bras vn manipule de soye bleuë , se couvrans ordinairement la teste de certains bonnets , à la façon d'une mitre pontificale. Les hommes aussi bien que les femmes ont tousiours entre les mains vn esuantiail fort semblable à ceux d'Europe , qu'ils portent plus par contenance qu'autrement. Au lieu que nos Europeens durant le deuil ont coustume de se vestir de noir , ils prennent la couleur blanche. Quand ils salüent quelqu'un, jamais ils ne se descouurent la teste, tenant cela à discourtoisie en quoy ils ont mesme sentiment que les Chinois, qui tiennent ceste action si peu sortable à gens d'honneur , & tant pleine d'irreuerence, que pour s'accommoder en cela à leur sentiment, il fut besoin que les Peres de la Compagnie obtinssent de nostre S. Pere le Pape Paul cinquième permission de pouoir celebrer le S. Sacrifice de la Messe en ces quartiers la teste couuerte.

Les Cochinchinois en fin ne se seruēt point du tout, ny de chausses, ny de souliers, prenās tout au plus pour se garārir la plāte des pieds, de ce qui la pourroit offenser, vne semelle de cuir retenuë, & reliée au dessus du pied , de quelques boutons, & rubans de soye, en façō de sandales, n'estimās, nō plus qu'il soit contre

tre la bië-seance, d'aller tout à fait déchaux. Et quoy que marchants de ceste sorte, aussi bien chaufsez, que déchaufsez, ils se crottent les pieds, à bon esciër, ils ne s'en mettēt guere en peine, ayans à cet effect, en toutes leurs maisons à l'entrée de la sale vn bassin d'eau bië nette, dās laquelle ils se lauēt les pïeds: & ceux qui se seruent de sandales les y laissent pour les reprendre au sortir, n'en ayans pas besoin au logis, ou le pauemēt estant couuert de natte, ils ne doiuent apprehēder de se salir.

Nos Peres qui sont en ces quartiers là ont desia cela, que les Cochinchinois n'estants si fort attachez à leurs façons de faire, qu'ils mesprisent celles des estrangers comme les Chinois, ils n'ont pas sujet de changer la forme de leur habit, qui ne differe en rien du commun de toute l'Inde. Ils portent vne sottane de cotton bien delié, qu'ils appellent *Ehingon*, & qui est pour l'ordinaire de couleur bleuë, & marchēt ainsi en public, sans autre robbe ny manteau. Ils ne se seruent point toutesfois de souliers, soit de la façō d'Europe, soit de celle du pays: car de ceux-là ils n'en peuuent auoir, n'y ayant là personne qui les sçache faire; & quant à ceux cy ils ne s'en peuuent aider, estans fort incōmodes à ceux qui n'y sont pas accoustumez, ainsi ils

leur font beaucoup de mal, pource que les boutons qui les reserrent escartent les doigts des pieds, & les separent par trop l'un de l'autre, & par ainsi ils ayment mieux aller pieds déchaux, & s'exposer aux choliques continues, que cela leur apporte, spécialement és commencements, tant à cause de l'humidité de la terre, que pour n'y estre encore faits. Bien est vray qu'en bien peu de temps la nature s'y habituë, & la peau s'endurcit de telle sorte, qu'on n'y sent plus aucune peine, encore qu'il faille marcher par des chemins pleins de pierres, & au trauers des espines. Pour moy i'y estois tellement fait, que retourné que ie fus à Macao, i'auois bien de la peine à endurer des souliers, qui me sembloient grandement pesants & fort embarrassants à mes pieds.

La nourriture plus ordinaire des Cochinchinois est le ris, & c'est vne chose estrange que ce pays foisonnans en toute sorte de chair, volaille, poisson, & en fruiçts de tant d'especes, que cependant leur meilleur repas, soit de ris, dont ils s'emplissent au commencement de la table, & puis vont effleurant & goustant comme par ceremonie de toutes les autres viandes. Si que leur principale nourriture est le ris, comme à nous autres le pain, qu'ils mangent tout seul sans fausse ny façon quelcon-

quelconque , de peur de s'en degouster à la longue, ainsi ils n'y mettent ny beurre , ny sel, ny huyle, ny sucre. Mais ils le font cuire avec de l'eau simple , & encore n'en mettent-ils qu'autant qu'il en faut , pour empescher qu'il ne s'attache au pot, & qu'il ne se brusse. C'est pourquoy les grains en demeurent tous entiers, n'estants qu'un peu ramollis & humectez. Ils experimentent en outre que n'assaisonnant point leur ris, il se digere bien plus aisement , d'où vient que ceux qui en vivent par tout l'Orient, ont coustume d'en manger pour le moins quatre fois le iour, & en grande quantité, pour fournir au besoin qu'en a la nature.

Les Cochinchinois mangent assis par terre, & les pieds croisez, ayants devant eux vne table ronde, esleuée à la hauteur de l'estomac, fort ioliment trauaillée , & dont la bordure sera argentée, ou dorée selon la qualité, & les moyens des personnes, qui s'en seruent. Ceste table n'est pas fort grande, la coustume estant, que chascun ayt la sienne à part , de maniere qu'autant qu'il y a de conuiez à vn banquet aurât faut-il dresser de tables, ce qui se garde mesme quand ils mangent en leur particulier, si ce n'est que par fois le mary & la femme, le Pere & le fils s'aydent d'une mesme table.

Ils

Ils n'ont ny couteaux, ny fourchettes sur table, n'ayans aucunement besoin ny de l'un, ny de l'autre: non de couteaux, pource qu'on leur tranche leurs morceaux à la cuisine, & qu'au lieu de fourchettes, ils ont de petits bastons bien polis, qu'ils mettent entre leurs doigts, dont ils se seruēt avec tant d'adresse, & d'habilité, qu'il n'y a riē qu'ils ne prennent avec. Ils n'ont non plus besoin de seruiettes, ne se salissants du tout point les mains, ne les mettant iamais à la viande sans ces bastons.

Les banquets sont fort frequents parmy eux entre les voisins, dans lesquels ils seruent beaucoup de viandes fort diuerses, de celles que nous auons dites iusques icy. Ils n'y seruent point pourtant de ris, supposants que chacun en a chez soy. Et pour pauvre que soit celuy qui traite, on ne croit pas qu'il ait fait honnestement, si chacun des conuiez n'a pour le moins sa table couuerte d'une cétaine de plats. Et pource qu'ils ont coustume d'inuiter à ces banquets tous leurs amis, parens, & voisins, iamais banquet ne se fait, où il n'y ait trente, quarante, cinquante, par fois cent, & mesme deux cens personnes, & ie me suis vne fois trouué à vn de ces plus solēnels festins, ou les conuiez n'estoient pas moins de deux mille. Aussi faut-il que tels bâquets se

se facent à la campagne, à ce que le lieu soit assez grand pour loger tant de tables. Personne ne doit trouver estrange que les tables estant peu capables, comme nous auôs dit, on y serue cependant pour le moins cent plats, d'autant qu'en ces occasions par vn merueilleux artifice, ils vous mettent sur la table vn chastelet, ou dresseoir de cannes de sucre à diuers estages, sur lequel ils arrangent & entassent de fort bonne grace tous ces plats, lesquels doiuent auoir de tout ce que le pays produit, soit de chair, soit de poisson, volailles bestes à quatre pieds, tant domestiques que sauuages, avec toutes les sortes de fruiçts, qui se rencontrent en la saison. Autrement si vne seule espece y manquoit, ce seroit vn grand reproche à celuy qui traite, & on ne daigneroit pas donner à ce repas le nom de banquet. Les maistres mangent les premiers, & se font seruir par les plus honorables de leurs domestiques, puis quand les maistres se sont leuez de table, ces plus honorables seruiteurs prennent leur place, seruis par d'autres valets de moindre consideration, qui leurs succedent aussi à leur tour. Et pour ce qu'ils ne peuuent fournir à déconfire tout ce grand appareil, & que selon la coustume, tous les plats se doiuent vider, saoulez que sont ceux-
cy,

cy, vient vn autre table de valets de plus bas estage, qui en mangent tant qu'ils peuuent, & mettent le reste dans certains bissacs, qu'ils destinent à cet effet, & le portent à leur maison pour en festoyer les ragasches, & fouillons de cuisine qui en font grande chere, & là se termine toute la ceremonie.

La Cochinchine n'a point de raisins, & partant au lieu de vin, ils se seruent pour boisson d'un ris distillé par l'alambic, qui a le goust d'eau de vie, à laquelle il est semblable en couleur, de mesme acrimoine, subtilité, & viuacité. Ils en ont si grande abondance que tous en boient communement, tant qu'ils veulent, & ne s'en enyurent pas moins qu'on feroit de vin en ces quartiers. Les personnes neantmoins plus considerables, ont coustume de tremper cette boisson d'un autre, distillé, qui se fait du Calamba, qui luy communique vne odeur tout à fait agreable, & ils en font vn meslange tres parfait.

Sur iour ils ont coustume de boire d'une certaine eau bien chaude, en laquelle se cuit la racine d'une herbe nommee Chia, qui donne le nom à cette boisson, laquelle est fort cordiale, & n'aide pas peu à destacher les mauuaises humeurs de l'estomac, & a faciliter la digestion. Les Iaponois & Chinois en vsent aussi,

aussi, excepté qu'en la Chine, au lieu de la racine ils y font cuire les fueilles de l'arbre, & au Japon on les puluerise, mais les effets en sont les mesmes, & le tout s'appelle Chia.

C'est vne chose incroyable que nous autres Europeans, parmy vne si grande quantité de viandes. & abondance de tout, nous souffrions cependant beaucoup de faim, & de soif, non tant à faute de viandes, que pour n'estre accoustumez à semblables aliments, la nature patissant beaucoup de se voir priuée tout d'un coup du pain, & du vin. Et ie crois que les Cochinchinois experimenteroient le mesme, s'ils venoient en Europe, ou ils n'auroient plus leur ris, encore qu'ils y eussent plusieurs autres viandes exquisés en abondance. Je raconteray à ce propos ce qui nous auint avec vn Gouverneur de la Cochinchine. Celuy-cy cōme nostre amy intime, fut inuité de nous de prédre son repas en nostre maison, & pour luy tesmoigner avec plus d'affection l'amitié que nous auions pour luy, nous taschâmes de luy faire plusieurs seruices apprestez à la façon de nostre Europe. Il se met donc en table, & au lieu que nous esperions, qu'il nous scauroit bon gré de nostre bonne volonté, qu'il la loueroit, & nous remerciroit de ceste grande nouveauté, attendu que nous n'y auions point
espargné

espargné nostre peine , essayé qu'il eust tous les plats l'un apres l'autre, il n'y en eust pas vn, duquel il luy fut possible de manger, quelque effort qu'il se fit par courtoisie & hōnesteré. De maniere, qu'il fut necessaire de luy apprestier d'autres viandes à la façon du pays, du moins mal que nous peûmes , desquelles il mangea par apres avec bien de l'appetit, à sō contentement, & au nostre. La diuine prouidence ne laisse pas de soulager en mille maniere la peine de ses seruiteurs à publier son S. Euangile, n'ayāt pas faute de moyens de récompenser mesme dés ceste vie, ce qu'ils éduerent pour son amour. Ainsi qu'il arriue en ce qui est du viure, comme aussi bien en ce que nous auons dit d'aller nuds pieds , la nature s'accoustumāt peu à peu à ceste forme de vie du pays, à laquelle elle s'apprend , & fait si bien, que sa premiere nourriture luy semble par apres plus estrange, quand il luy faut reuenir. Ce que i'ay experimenté en moy mesme, depuis mon retour de ces pays là : car ie n'eusse désiré autre chose, que le ris de la Cochinchine, duquel ie me trouuois mieux, que de tout ce qu'on me pouuoit presenter icy.

Quand aux Medecins , & à leur façon de traiter les malades, i'ay à dire qu'il y en a grād nombre, tāt Portugais, que naturels du pays :
& on

& on voit souuent que beaucoup de maladies incogneues, & sans remedes aux Medecins d'Europe, ont esté descouuertes, & aisement gueries par ceux du pays. Et telle fois arriue que les Medecins Portugais, auront abandonné vn malade, le tenant pour expédié, qu'il sera aisement guery par vn Medecin du pays, si on vient à l'appeller.

La methode que tiennent ceux-cy est, qu'entrez qu'ils sont dans la chambre de leurs malades, ils s'arrestent quelque temps aupres de leur liect, pour se rasseoir de l'esmotion, qu'ils ont contracté en venant. Puis ils luy tastent le pouls avec vne grande attention, & circonspection: Apres cela ils luy disent, vous auez telle maladie; & si le mal est incurable, ils luy diront sincerement, ie n'ay point de medecine pour ce mal, qui est vn signe que le malade n'en peut réchapper. Que s'ils iugent que la maladie soit telle, qu'elle se puisse guerir par leurs remedes, ils vous diront, j'ay de quoy vous guerir, & en tel temps qu'ils diét, ie vous mettray sur pied. Sur cela ils conuiennent du salaire qu'aura le Medecin en cas que le malade guerisse, lequel ils mesurent & proportionnent à la qualité & grandeur de la maladie, & telle fois arriuera qu'ils en passeront vn contract entre eux. Apres cela

la le Medecin compose luy mesme la Medecine, sans recourir aux Apoticaire, aussi n'y en a il point, qu'ils font de peur de manifester le secret de leurs remedes, qu'ils cachent tant qu'ils peuvent, en partie aussi pour ce qu'ils ne s'osent pas fier à personne des ingrediens qu'ils prescriuent. Si le malade recouure sa santé au temps prefix dans le marché, comme il arriue ordinairement, il est obligé de donner le prix dont ils s'estoient accordez par ensemble: si aussi ne se guerit, le Medecin perd & sa peine, & sa medecine.

Les medecines qu'ils donnent à leurs malades, ne sont pas comme les nostres qui donnent du degoust, ramollissent, & laschent le ventre, mais sont aussi agreables que le potage, & sont avec cela nourrissantes, sans qu'il soit besoin, de prendre d'autre aliment. D'où vient qu'ils en donnent plusieurs fois le iour au malade, comme nous ferions des bouillons de temps en temps. Et ces Medecines n'alterent point la nature, mais aident seulement ses fonctions ordinaires, deffaichant les humeurs peccantes, sans trauailler le malade aucunement. Il se presente icy vne chose digne d'estre rapportee, en cet endroit. Vn Portugais tombé malade, fit appeller des medecins d'Europe, qui apres l'auoir
traitté

traitté quelque temps le laisserent pour mort, sans le retourner voir. On appelle vn Medecin du pays, qui luy promet de le guerir dans certain temps, luy recommandant tres-estroitement que durant qu'il le traitteroit, il s'abstint des femmes, ou autrement que c'estoit fait de luy, & qu'il ne voyoit aucun remede en la Medecine pour le pouuoir guerir, & le tirer du danger ou il estoit, qu'a ceste condition. Ils arrestent leur marché le Medecin se fait fort de le guerir au bout de trente iours. Le malade prend la Medecine qu'il luy auoit ordonné, & dans peu de iours se trouua si bien remis, qu'il n'apprehende nullement de faire ce que le Medecin luy auoit si expressement defendu. La dessus le Medecin vint visiter son malade, & du changement qu'il remarqua au poulx, s'apperçoit bien de son incontinence, & l'aduertit de se disposer à la mort, parce qu'il estoit hors de tout espoir & qu'il ne scauoit plus aucun remede pour luy sauuer la vie. Que cepédant il ne laissast pas de luy payer l'argent, qui luy estoit deu par le marché, & que s'il mouroit ce n'estoit point sa faute. On plaida l'affaire, arrest donné, que le malade payeroit le Medecin, sur quoy il se mourust.

Ils ont encore l'usage de la saignée, mais

E

ils

ils espargnent vn peu plus le sang qu'on ne fait en Europe, & ils ne se seruent point de lancettes communes : mais ils ont plusieurs plumes d'oye, dans lesquelles ils agencent de petites pieces de porcellaine fort aiguës, & faites en forme de dents de scie, les vnes plus grandes les autres plus petites. Et quand il est question d'esuenter la veine, ils appliquent vne de ces plumes, qui soit porportionnée à sa grandeur, & donnans dessus vn petit coup du doigt, ils ouurent la veine, la porcellaine n'y entrant qu'autant que besoin est. Mais ce qui est de plus admirable, c'est qu'ayant tiré du sang suffisamment, ils n'ont que faire ny de bande, ny de compresse, ny de ligature quelconque: mais mouillant le pouce avec de la salie, ils le pressent sur l'ouverture, & font reuenir la chair en sa place, le sang s'arreste tout soudain, & la playe se referme. Ce que i'attribue à leur façon d'ouurer avec la porcellaine endantée, qui fait que la veine se rejoint & reprend plus aisément.

Ils ne manquent pas de Chirurgiens, qui ont de merueilleux secrets. Je n'en veux donner autre preuue, que ce qu'ils ont pratiqué sur moy-mesme, & sur vn de nos freres mon compaignon. Estant tombé d'vn lieu fort haut,

haut, j'allay donner de l'estomach contre vn quartier de pierre, aussi-tost ie commence à ietter le sang par la bouche, & mesme la poitrine m'en demeura enlamée. La dessus on me donne quelques remèdes à nostre mode d'Europe, sans que i'en ressentisse aucun allègement. Mais arriue à ces entre-faites vn Chirurgien du pays, qui prist quantité d'une certaine herbe, semblable à la Mercurialle, & en faisant vn emplastre, me l'appliqua sur l'estomach, puis il fit bouillir de ceste herbe avec de l'eau, pour m'en faire boire, & m'en fit encore manger de toute cruë, & dans peu de iours me voila guery parfaitement. Pour en faire moy-mesme l'experience de nouveau, ie fis rompre la jambe à vne poule en diuers endroits, & apres faisant vne emplastre de ceste herbe, ie la fis appliquer sur les ruptures de la jambe, & en peu de iours elle fut remise saine & entiere.

Vn Scorpion auoit mordu au col vn de nos freres, que i'auois pour compagnon, qui est vne morsure mortelle en ce Royaume, aussi tout incontinent la gorge luy enfla, & nous estions pour luy donner l'Extreme-Onction, quand on appelle vn Chirurgien, lequel fit sur l'heure cuire vne potée de ris avec de l'eau simple. Et puis mettant le pot aux piez de

nostre frere, il l'envelopa de ses draps à ce que la vapeur, & fumee chaude ne se perdit pas. D'où s'ensuiuit qu'aussi tost qu'elle fut montrée iusques au lieu de la morsure, ce bon frere sentit sa douleur s'alleger, sa gorge se delenfla, & se trouua aussi gaillard, que si iamais il n'eust eu aucun mal.

On pourroit adiouster plusieurs autres choses semblables : mais ie diray seulement que les medicaments ont bien plus de force en ces quartiers là, qu'ils n'en ont icy. Et ie peux dire en particulier, que j'apportoys avec moy de la rhubarbe, dans vn petit baril, qui estoit de la plus excellente qui fut, quand j'arriuy en Europe apres deux ans de voyage, ie trouuay ma rhubarbe si changée, que ie ne la cognoissois plus, tant les simples perdent de leur vertu au transport de ces pays là, aux nostres.

CHAPITRE VI.

DU GOUVERNEMENT POLITIQUE, & Civil, des Cachinchinois.

I'En diray briefuemēt ce qui suffit pour en estre instruit succinctement. Parce que si ie voulois

voulois deduire bien au long, en m'estendant par trop. ie m'esloignerois du dessein que j'ay pris en ce mien court narré. En general leur Gouvernement à quelque chose de celuy, qui est gardé au Japon, & de celuy de la Chine. Et pourtant comme les Japonois prisent beaucoup plus les armes que les sciences, tout au contraire des Chinois, qui font vn estat nompareil des sciences, sans tenir beaucoup de conte des armes. Les Cochinchinois ne s'esloignâs pas tout à fait des vns, pour prendre le party des autres, tiennent le milieu, & portent esgalement l'esprit de leurs peuples, à s'affectionner aux armes, & aux sciences selon les occasions. A cest effet ils recompensent, & esleuent aux charges, & dignitez du Royaume, râtost les Docteurs tantost les soldats, preferans & postposans tantost ceux-cy, tantost ceux-la, selon qu'il leur semble estre pour le mieux.

La Cochinchine a bon nombre d'Vniuersitez, dans lesquelles il y a des lecteurs des escoles, & des degrez ausquels on monte par voye d'examens, ainsi qu'il se pratique dans la Chine, enseignants les mesmes sciences, se seruans de mesmes liures, & Autheurs sçauoir du Zinfu, ou Confus, ainsi que parlent les Portugais. Autheur d'aussi sublime,

& profonde doctrine, & autorité chez eux, comme seroit parmy nous Aristote, & en effet il est plus ancien. Ces liures sont pleins d'erudition, de rares histoires, de graues sentences, de prouerbes, & choses semblables, toutes concernant les bonnes mœurs, comme seroient entre nous Seneque, Caton, & Ciceron. Il se passe plusieurs années deuant que de pouuoir apprendre la propriété de la phrase, caracteres, & hieroglyphes, avec lesquels ils sont escripts. La piece cependant dont ils font plus grand cas, & qu'ils ont en plus grande estime, c'est la Philosophie morale comprenant l'Ethique, l'Oeconomique, & Politique. Et c'est vne chose fort belle à voir & entendre quand ils estudient dans leurs salles, lisans & prononçans leurs leçons à haute voix, en maniere de chant. Ce qu'ils font pour s'accoustumer, & habituer à donner à chaque parole son propre accent, dont ils ont grand nombre, & avec lesquels ils signifient plusieurs choses, & fort diuerses, d'où il appert que pour pouuoir s'entretenir avec eux, la est de besoin de sçauoir les principes de la Musique, & du Contrepoint.

Le langage qu'ils parlent ordinairement est bien diuers de celuy, avec lequel ils enseignent, & qu'ils lisent en leurs estudes, & auquel

quel sont escrits leurs liures. Comme encore parmy nous, autre est nostre langue vulgaire, qui nous est commune à tous, autre la Latine qui n'a son cours, que dans l'Escole. En quoy ils different des Chinois, lesquels s'ils sont ou lettrez ou nobles, ne parlent iamais qu'un mesme langage, qu'ils appellent des Mandarins, c'est à dire des Docteurs, Iuges & Gouverneurs. Et les caractères dont ils se seruent pour escrire comme aussi pour imprimer leurs liures, passent le nombre de quatre vingt-mille tous differents les vns des autres. C'est pourquoy les Peres de la Compagnie de IESVS, demeurent les huit, & bien souuent dix années en l'estude de ces liures, deuant que de s'en rendre maistres, & deuenir capables de traiter avec eux. mais les Cochinchinois ont reduit ceste grande multitude de caracteres, au nombre de trois mille tout au plus, dont ils se seruent ordinairement pour coucher leurs discours, leurs lettres, leurs suppliques, memoriaux, & autres telles choses, qui ne regardent point les liures imprimez, qui de nécessité doiuent estre composez en caracteres Chinois. Les Iaponois ont esté encore plus ingenieux, lesquels encore bien qu'ils taschent en tout ce qui concerne les liures escrits, & imprimez, de se cōformer aux

Chinois, ont si bien fait cependant, que pour ce qui concerne l'estat des affaires ordinaires, ils ont inuenté quarante huit lettres par la combinaison delquelles ils expriment, & déclarent tout ce qu'ils veulent, ne plus ne moins que nous autres avec nostre A, B, C. Cependant avec tout cela les caractères Chinois, sont encore en telle estime dans le Japon, que ces quarante huit lettres, quoy que plus commodés pour exprimer leurs pensées sont peu prilées à comparaison, tellement que par mespris on les appelle lettres de femmes.

Ceste belle, & tout à fait ingenieuse inuention de l'Imprimerie fût pratiquée en la Chine & Cochinchine, deuant que nous en eussions cognoissance en nostre Europe, encore bien que ce ne soit, avec tant de perfection. Pour autant qu'ils ne ioignent pas les lettres, avec les lettres, ou caractères, avec caractères : mais avec vn poinçon ou burin ils grauent, & taillent sur vne planche leurs formes, tout de mesme qu'ils les veulent imprimer dans leurs liures. Puis ils appliquent leur papier sur ceste table ainsi grauée, & entaillée, & le mettent sous la presse, tout de la mesme façon qu'on fait encore en Europe, quand on imprime sur vne lame de cuiure, ou autre chose semblable

Outre ces liures que nous auons dit qui
trait-

traissent de la morale, ils en ont encore d'autres contenant, ainsi qu'ils parlent, des traites des choses sa crées, comme seroit de la creation, & commencement du monde, des ames raisonnables, des demons, des idoles, & de leurs diuerſes sectes, ces liures s'appellent d'eux *Sayc, Kim*, à la différence des autres profanes qu'ils nomment *Sayc, Chiu*. Nous parlerons de la doctrine sacrée, qui est comprise en ces liures en la seconde partie de ceste relation, ou le discours en sera plus à propos.

Bien que le langage des Cochinchinois, soit en cela semblable, à celui des Chinois, que comme eux, ils ne se seruent que de paroles d'une syllabe proferées, & prononcées avec diuersité de tons, & accents, si est-ce qu'ils different grandement en ce que les Cochinchinois sont en outre plus feconds, & abondans en voyelles, & partant plus doux, & plus agreables: plus riches en accents, & en tons, & partant plus melodieux & harmonieux. De façon qu'ils ont l'oreille née à la Musique, & propre pour distinguer la variété des tons, & des accents.

La langue Cochinchinoise, à mon sentiment, est la plus facile de toutes, parce qu'elle n'a ny coniugaisons de verbes, ny declinaisons de noms: mais avec une seule voix ou parole,

parole, y adjoustant vn aduerbe ou pronom, elle fait cognoistre le temps passé, present ou futur, le nombre singulier, ou plurier, & supplée en somme à tous les mœurs, & à tous les temps, à & toutes les personnes, comme aussi à la diuersité, tant des nombres que des cas. Par exemple ce mot, Auoir, qui en langue Cochinchinoise, s'exprime par celuy de *Co*, sans autre variation, qui adjoustant vn pronom, seruira à tous vltages, & ainsi ce que nous dirions en coniugant, j'ay, tu as, il a. Eux se contentants du pronom, sans varier le verbe, diroient, le auoir, tu auoir, luy auoir. De mesme maniere pour suppleer la diuersité des temps, ils diroient au present, ie maintenant auoir, pour le passé, ie desia auoir, pour le futur ie apres, ou à l'aduenir auoir, & ainsi de l'un à l'autre, sans iamais changer leur *Co*. D'où il est aisé à voir combien ceste langue se peut apprendre aisement, comme en effect en six mois que i'y fus, j'en appris autāt qu'il m'en falloit pour traiter avec eux, & mesme entendre leurs confessions, quoy que ie n'en eusse vne si parfaicte cognoissance: car à dire le vray, pour s'y rendre excellent, il faudroit bien quatre ans entiers.

Mais pour reprendre le fil de mon histoire, ie disois que la coustume des Cochinchinois estoit

estoit de ne faire pas seulement grand cas des hommes de lettres, recompensants leur grãd sçauoir, en les esleuants à de hauts, & honorables degrez de dignité, leur assignãts de bonnes rentes, & appointements : Mais qu'ils auoient encore en singuliere estime les personnes de courage, valeureuses, & excellentes aux armes. Ils s'y gouernent cependant tout d'une autre façõ, qu'on n'a pas accoustumé de faire icy. Car au lieu de donner à leurs grands & genereux Capitaines, comme on fait en ce pays vne terre, vn Conté, vn Marquisat, pour recognoistre leurs merites. Eux les recompensent, en leur soumettants, tant de personnes, & vn nombre determiné de subjects & vassaux du Roy mesme, lesquels en quelque lieu du Royaume qu'ils soient, sont obligez de recognoistre pour leur Seigneur, celuy à qui le Roy les a donnez, avec obligation de le seruir de leurs armes, en tous les rencontres, où il en auroit besoin, comme aussi de luy payer tous les deuoirs, qu'ils souloient auparauant payer au Roy mesme. Et ainsi au lieu que nous disons, vn tel est Seigneur de telle place, Conte ou Marquis de tel lieu. Eux disent, celuy cy est vn personnage de cinq cens hommes, cet autre de mille : le Roy a accru le nombre de cestuy cy d'autre

d'autre mille, de celui là de deux mille, augmentant de beaucoup leur grandeur, dignitez, richesses, & commoditez, en leurs donnant de nouveaux vassaux. De leurs guerres nous en parlerons au Chapitre suivant. Reste à present de dire quelque chose plus digne d'estre sceuë, touchant leur gouuernemēt civil. Premièrement ils expedient les affaires plus promptement, ainsi qu'on fait dans les armées, & comme on dit *more belli*, que non pas dans les longueurs du barreau par voye de Iuges, Notaires, & Procureurs, auēc toutes leurs procedures. Les Vice-Roy, & Gouverneurs des Prouinces supplēts à tous ces offices, lesquels donnent tous les iours Audience publique, quatre heures durant par chacun iour, dans vne belle & grande court, au dedans de leurs propres Palais, deux heures le matin, & deux heures de releuée. Là s'en vont tous ceux qui ont procez, représenter leurs pretensions, & leurs plaintes, & le Vice-Roy ou Gouverneur appuyé sur vne fenestre entend les griefs de chacun l'un apres l'autre. Et d'autant que ces Gouverneurs sont pour l'ordinaire, personnes de bon iugement, bien entendus, & experimentez dans les affaires, questionnants les parties à propos, & remarquants principalement, le sentimēt des assistants,

assitants, qu'ils conjecturent de leur con-
tenance, & de l'approbation dont ils favori-
sent, ou le demandeur, ou le defendeur, ils
rencontrent aisement la verité de l'affaire, &
sur le champ, sans autre delay prononcent la
sentence à haute voix, qu'on execute aussitost
sans appel, ou autre forme de procez, soit
qu'elle soit de mort, ou de bannissement, ou
de fouet, ou d'amende pecuniaire : chastians
le delit de chacun selon les peines portées
par les loix.

Les crimes dont ils s'accusent pour l'ordi-
naire, & qui se chastient severement parmy
eux sont en grand nombre. Mais sur tout ils
punissent avec tout plein de rigueur, les faus-
faires, les larrons, & adulteres. Quand les pre-
miers se trouvent conuaincus d'auoir chargé
quelqu'un à faux, d'un crime dont il n'est pas
coupable, il est condamné sans mercy, à subir
le supplice qu'auroit merité l'autre, s'il auoit
fait ce dont on l'accuse. Et si le crime
qu'on luy mettoit sus, demandoit la mort, ce-
luy qui luy a imposé à tort sera mis à mort.
Et de verité la pratique fait voir que cete
façon de iuger est bien la meilleure, pour ri-
rer la cognoissance certaine d'une verité. Les
larrons sont chastiez à proportion de leur
larrecins: car s'ils ont desrobé quelque chose
notable,

notable, on leur coupe la teste, si vne chose de moindre consequence, comme par exemple vne poule on leur coupe vn doigt de la main, pour la premiere fois, s'ils y retournent, on leur en coupe vn autre, s'ils y sont surpris, pour la troisieme on leur coupe l'oreille, si pour la quatrieme le col.

Les adulteres tât hommes que femmes indifferemment, pour chastiment de leur crime sont exposez aux Elephans, qui les tuent en la maniere qui s'ensuit. On conduit le criminel hors de la ville dans vne plaine, & en presence d'une infinité de personnes, qui y sôt accouruës, on le met au milieu de la place poings & pieds liez proche d'un Elephant, auquel on lit la sentence de celuy qui doit estre supplicié, à ce qu'il l'execute de point en point. Et dont voicy l'ordre. Premièrement qu'il le saisisse, l'empoigne, & l'estreigne avec sa trompe, & le tienne ainsi suspendu en l'air le monstrant à tout le monde, puis qu'il le jette en haut avec violence, attendant à le recevoir sur la pointe de ses dents, à ce que tombant de roideur, emporté de son poids, il s'y enferme, & que tout d'un meisme coup il le rejette contre terre, & qu'en fin il le foule & pestrisse aux pieds. Ce que fait l'Elephant sans y manquer d'un seul petit point, au grâd estonne-

estonnement , & terreur de tous ceux qui y sont presens, qui du supplice qu'ils voyent endurer à autrui, apprennent la fidelité qui se doit garder entre personnes mariées.

Il ne sera point hors de propos puisque nous sommes sur le discours des mariages, d'en dire icy quelques particularitez , avant que fermer ce chapitre. Il ne s'est iamais veu que les Cochinchinois, quoy que gentils ayent contracté des mariages dans les degrez qui sont defédus par les loix diuines , & naturelles, ny aussi peu dans le premier degré de la ligne collateralle de freres & sœurs. Es autres degrez le mariage est permis, à qui que ce soit moyennant qu'il n'ait qu'une femme. Bien est vray que les plus riches, à tiltre de grandeur, & de liberalité, ont coustume d'avoir plusieurs concubines, taxants d'avarice & taquinerie ceux qui n'en nourrissent autr que leurs rentes le peuvent permettre commodement. Celles cy s'appellent seconde, troisième, quatrième femme, selon l'ordre de chacune , qui sont toutes suivantes de la premiere, qui est estimée, & est veritablement & réelemment leur femme, & c'est à elle de choisir les autres à sa fantasie , & les donner à son mary . Leurs mariages ne sont pas pourrant indissolubles , les loix de la
Cochin.

Cochinchine permettant le diuorce ; quoy que non pas simplement à la seule volonté & plaisir de l'vne , ou l'autre partie. Estant necessaire pour cet effect , qu'ils prouuent premierement ce pourquoy ils se veulent quitter, y ayant plusieurs crimes determinez, lesquels estant bien auerez, il est loisible de se retirer du premier mariage, pour en contracter vn autre de nouveau. Ce sont les maris qui portent le doüaire, lesquels aussi quittent leur propre maison, pour aller demeurer en celle de leurs femmes , des moyens desquelles ils sont entretenus, n'y ayant qu'elles qui mesnagent seules toutes les affaires de la maison, portants le fais du gouvernement de de la famille , tandis que le mary se tient au logis, sans rien faire, & sans se mettre en peine, s'il y a vn seul denier, se contentant d'estre pourueu de ce qui luy fait besoin pour sa table, & pour se couvrir.

CHA

CHAPITRE VII.

*DES FORCES DV ROY DE LA
Cochinchine , & des guerres qu'il
à dans son Royaume.*

IL a esté dict dès le commencement de ceste
histoire, que la Cochinchine estoit vne
Prouince desmembrée du grand Royaume
du Tunchim, que s'vsurpa iniustement le
grand Pere du Prince qui regne aujourdhuy,
qui en ayant eu le gouuernement, se rebella
contre le Roy du Tunchim. A quoy faire
il ne se trouua pas peu enhardy, quand il se
vit muni en bié peu de temps de diuerfes pie-
ces d'artillerie, recouertes, & recueillies du
naufnage, & debris de plusieurs nauires, &
galeons, tant Portugais que Hollandois con-
tre ses escueils, lesquelles furent peschées de
ceux du pays, dont il s'en voit encore aujour-
dhuy, dans le seul palais du Roy, bien soixan-
te pieces, & des plus grandes. Les Cochin-
chinois s'estant rendus si adroits & experi-
mentez à les manier, qu'ils surpassent en cela
les Europeans mesmes, aussi ne faisoient- il,
Fquasi

quasi autre chose, que tirer tous les iours au blanc dont ils deuinrent si fiers, & si glorieux, & telle fut l'opinion qu'ils conceurent de leur valeur, que soudain qu'ils voyoient aborder à leurs ports les nauires de nostre Europe, aussi tost les canoniers du Roy se presentoient pour les deffier, mais les nostres cognoissans desia qu'ils ne leur estoient pas comparables, esquiuoient tant qu'ils pouuoient ceste lice, sçachans tres-bien par experience, qu'il sont plus asseurez de donner, ou ils veulēt avec leur artillerie, que d'autres ne feroient pas avec vne Archebuze, qui est vn baston, duquel ils s'aident encore fort bien pour autant qu'ils sortent à toutes heures à la campagne à grandes bandes, pour s'exercer & accoustumer à bien tirer. Ce qui ayda encore beaucoup à le faire resoudre à ceste reuolte, & à se bander contre son Prince, fut de se voir cent galeres & d'auantage, au moyen desquelles s'estant rendu puissant sur mer, comme il l'estoit desia sur la terre, à raison de son artillerie, il luy fut aysé de conduire à chef son dessein & entreprise contre le Roy du Tunchim son Seigneur. Ioint que le commerce continuel avec les Iaponois, auoit apporté dans le pays vne grande quantité de coutelas ou ciméterres, de la façon du
lapon,

Japon, dont la trempe est tres-excellente. D'avantage le pays luy fournissoit grand nombre de cheuaux, lesquels encore que petits, sont toutefois bons & genereux, & sur lesquels ils combattent avec des dards, en quoy ils ne cessent de s'exercer tous les iours. La puissance de ce Roy est telle que quand bon luy semblera, il pourra mettre sur pié quatre vingt mille combatans. Avec tout cela cependant, il ne laisse pas de craindre tousiours le Roy du Tunchim, dont les forces sont quatre-fois plus grandes. Aussi pour demeurer d'accord, & se tenir en bõne intelligence avec luy, il luy paye vn tribut de tout ce qui se peut tirer de son Royaume, pour la commodité de celuy du Tunchim, & particulierement d'or, d'argent, & de ris, luy fournissant en outre des ais, & autre bois pour bastir des galeres. Et le seul sujet qui le fit résoudre de faire ligue, avec le fils du defunt Roy, qui a aujourd'huy le Gouuernement de la derniere Prouince du Tunchim, qui touche la Chine, fut que celuy-cy demeurant vainqueur, & se faisant maistre de tout le Tunchim, la Cochinchine demeureroit deschargée de son tribut.

Or pour mieux entendre ce qui en est, il faut sçauoir que du temps que i'estois en la

Cochinchine, ce n'estoit pas le fils du feu Roy du Turchim, qui prist possession du Royaume, mais son Oncle, des mains duquel ce ieune Prince se desroba pour sauuer la vie, & se refugia dans la derniere Prouince du Royaume, qui confine à la Chine. Ou ayant esté recogneu pour ce qu'il estoit, sçauoir est fils du Roy defunt, ces peuples le choisirent pour leur Prince, & par son bon gouuernement, il auoit desia si bié gaigné les cœurs, que le Roy du Tunchim, son oncle, étra en de tres-grandes apprehensions, qu'il ne se ligua avec le Roy de la Cochinchine, qui possedoit l'autre bout de ses terres, pour l'enfermer entre eux, & deposseder du Royaume qu'il s'estoit injustement vsuré. Sur ces defiances il cōtinua tous les ans de leuer vne grosse, & puillāte armée, pour aller contre ce Prince, & le defaire, mais ce fut tousiours en vain. Car son armée ayant à marcher par necessité durant cinq ou six iournées, par des chemins ou ne se rencontroit autre eau, à boire que de certains fleuves, qui descendoient du pays de l'ennemy. L'armée trouua que l'eau en estoit empoisonnée par les gens du Prince, avec vne certaine herbe. Si bien que venans à en boire hommes & cheuaux mouroient, dont force luy fut de se retirer, ayant fait vne grande despen-

despense, & pris bien de la peine sans effet.

La discipline militaire, & la façon de se gouverner en guerre, est presque la mesme qu'en Europe. Ils gardent les mesmes ordres à dresser leurs esquadrôs, aller aux escarmouches, à l'assaut, & faire les retraites. Et ce Roy a d'ordinaire la guerre en deux endroits de son Royaume. Pource que premierement, il faut qu'il se tienne tousiours sur la defensiue du costé du Roy du Tunchim, lequel comme nous disions, le menace incessamment, & luy donne tousiours quelque attaque sur les confins. C'est pourquoy le Roy de la Cochinchine fait sa demeure, en Sinuua derniere Prouince de son Royaume, pour se tenir plus prest à porter ses forces sur la frontiere du Tunchim, qui est l'entrée d'une Prouince fort puissante, & qui d'ordinaire est pourueüe de Gouverneurs de longue experience, & bien entendus au fait de la guerre.

Il est en second lieu tousiours en alarme du costé d'Occident, au dernier endroit de son Royaume dit *Renram*, contre le Roy de Chiampa les efforts, duquel il repousse bien aisement, pour n'estre si puissant que luy & n'y a besoin d'autres forces, que de celles de la Prouince mesme: le Gouverneur avec ses soldats suffisants pour la deffendre.

En outre il est en de continuels armemens, & leuées de gens pour le secours du Roy de Cambogia, qui a espousé vne sienne fille naturelle, luy fournissant des galeres, & des gens contre le Roy de Siam. Si bien que de tous costez aussi bien par mer que par terre se fait retentir le nom glorieux, & la reputation des armes des Cochinchinois.

En mer ils font la guerre sur des galeres, comme il a esté dit, chascune desquelles à ses pieces de canon, & est bien fournie de mousqueterie. Et ne trouuera on point tant estrange, d'entendre que le Roy de la Cochinchine, à tousiours plus de cent galeres, bien équipées, & en bon ordre, quand on sçaura en quelle sorte, il y pourroit.

On doit donc sçauoir que les Cochinchinois n'ont pas la coustume d'auoir des chiormes de delinquants ou autres forçats, sur leurs galeres. Mais quand ils sont pour se mettre actuellement sur mer pour combattre, ou pour quelque autre sujet, à l'heure ils les fournissent d'autant de gens, qu'il faut en la maniere qui suit. On fait sortir soudement force Sergeants, & Commissaires, qui à mesme tēps, sans qu'on y pēse, vont par tout le Royaume, & avec des mandemens qu'ils ont du Roy mettēt aussi tost la main, sur le collet, & se saisissent

fissent de tout autât de personnes qu'ils trouvent propres à manier la rame, & les meinent indifferement aux galeres, n'estoit qu'a raison de leur extrâction noble, ou pour quelque autre consideratiõ, ils en fussent exempts, & privilegez. Et ne faut pas penser que cela soit si difficile qu'on se l'imagine d'abord, d'autant que premierement ils sont aussi bien traittez dans les galeres qu'autre part, & mieux paieez. De plus leurs femmes, & enfans, & toute leur famille est entretenuë aux despës du Roy, de tout ce qui leur est necessaire, selon leur condition, & qualité, pour tout le temps que leurs maris, sont absents de leurs propres maisons. Et ces personnes ne seruent pas seulement pour ramer, mais encore pour en venir aux mains, quand il en est question, & combattent valeureusement. A cet effet on donne à chascun son arquebuse, ou mousquet, avec des dards, coutelas ou cimeterres: & comme les Cochinchinois ne se feignent point, sont hardis, & valeureux à l'abord, & aux aproches avec leurs rames, mousquets, & iaelots, ils ne le sont pas moins au choc, & à la meslée, où ils font de rares preuues de leur valeur. Leurs galeres ne sont, ny si grandes, ny particulièrement si larges, que les nostres, mais elles sont si lestes, & si bien releuées d'or & d'argent,

d'argent, qu'il les fait extrememēt beau voir. La prouë nommément qu'ils tiennent estre le lieu plus honorable, est toute d'or. C'est la place du Capitaine, & des personnes plus cōsiderables, & la raison qu'ils en donnent, est celle-cy, que le Capitaine se deuât tousiours trouuer le premier aux occasions, qu'il est bien raisonnable qu'à ceste fin, il soit en teste, & au lieu le plus hazardeux de la galere.

Entre autres armes defensiuës, dont ils se seruēt aux combats sont certains petits boucliers ou rondaches en forme d'ouale, toutes creuses, & de telle hauteur, que commodement elles peuuent couvrir tout vn homme, & si legeres qu'ils s'en seruent sans peine, & sans en estre aucunement incommodez. Sert aussi grandement, pour la deffense des villes de ce Royaume, leur façon de bastir les maisons, qui n'estans que d'ais, & appuyées seulement sur des colonnes de bois, cōme nous auons dit, s'il arriue que l'ennemy vienne avec tant de forces, qu'ils se resoluent à ne point tenir contre luy. Chacun prend son petit mesnage, & s'en court refugier aux montaignes, mettans le feu à leurs maisons, & n'y laissant autre chose que les restes d'un lamentable incendie. Si bien que ne demeurant rien ou les ennemis se puissent fortifier,

&

& maintenir, ils sont contrainsts de se retirer dans leurs pays: & eux retournans dans leur terre, rebastissent d'autres maisons, en fort peu de temps, & remettent la ville tout de nouveau comme elle estoit auparavant.

CHAPITRE VIII.

DU COMMERCE ET DES PORTS de Mer de la Cochinchine.

LA Cochinchine estant si abondante, comme nous auons dit cy deuant, en toutes sortes de commoditez pour la vie humaine. Cela fait que son peuple se mōstre moins curieux, & enclin à voyager ailleurs, pour y trafiquer, aussi ne font-ils iamais leurs voyages sur mer si longs qu'ils perdēt de veuë, les costes & riuages de leur chere, & bien-aymée patrie. Ils sont nonobstant fort faciles à donner entrée en leurs ports aux estrāgers, & prennent vn singulier plaisir à voir qu'on vienne pour trafiquer en leur terre, non seulement, des Royaumes, & Prouinces voisines, mais aussi des pays plus reculez. A ce sujet ils ne leur est pas besoin d'vser de grāds artifices, les estrangers y estans suffisammēt allechez par la

la fertilité du pays, & portez par le desir des richesses qui y regorgent. Et pource non seulement ceux du Tunchim, de Cambogia, de Cinceos, & autres lieux voisins, s'y transportent: mais encore on y voit arriuer tous les iours des Marchands des contrées, les plus esloignées, comme de la Chine, de Macao, du Iapon, Manille, & Malacca, portans tous de l'argent en la Cochinchine pour en rapporter des marchandises du pays. Lesquelles ne s'achètent point, mais s'eschangent avec le mesme argent qui se débite comme marchandise, rehaussant ou diminuant de prix, selon qu'il y en a en plus grande, ou en moindre quantité, ne plus ne moins que la soye, & les autres denrées.

La monnoye dont on achete toutes choses est de leton, & toute de mesme valeur comme seroit d'environ vn double, dont les cinq cens feroient vn escu, ceste monnoye est parfaictement ronde, empreinte & marquée du coing, & des armes du Roy, & chascque piece est percée au beau mitan, par où elles s'enfilent par milliers chascque liasse ou cordon valant deux escus.

Les Chinois & Iaponois sont ceux qui font le principal negoce de la Cochinchine en vne foire, qui s'assemble tous les ans en vn de ses ports,

ports, & dure environ quatre mois. Ceux-là y apportent sur leurs joncs, la valeur de quatre ou cinq millions en argent: & ceux-cy sur certains vaisseaux qu'ils nomment des sômes vne infinité de soyes fines, avec d'autres marchandises propres de leurs pays. Le Roy tire vn gros reuenu de ceste foire pour les daces & imposts qu'il y met, & tout le pays en recoit vn gain indicible. Et comme d'vn costé les Cochinchinois n'ont nulle sorte d'ouurages, & manufactures, pour ne s'adonner aux arts mechaniques dâs l'oyssiueté, ou les plôge l'abondance, & fertilité du pays: & que d'ailleurs ils se prennent aisemét des curiositez, qui viennent des autres endroits, il arriue de là qu'ils les prisent beaucoup, & qu'en faisant estat ils les veulent acheter à quelque prix que ce soit, & n'espargnent pas l'argêt pour auoir des choses, qui de soy ne sôt pas de grâd prix, comme par exêple des peignes, des aiguilles, des bracelets, des pendants d'oreille de verre, & d'autres babioles, & mesnage de femmes. Et me souuiens d'vn Portugais, qui ayant apporté de Macao en la Cochinchine, vne boëtte pleine d'aiguilles, qui ne luy pouuoit auoir cousté plus de trente ducats, engaigna plus de mille, vendant vne reale la piece en la Cochinchine, ce qui ne luy auoit pas cousté vn double

doubling à Macao. En fin ils achètent à l'envy l'un de l'autre, tout ce qu'ils voyent, pourveu qu'il soit nouveau & vienne de loing, à quoy ils déboursent l'argent sans difficulté. Ils sont desirieux à toute reste de nos chapeaux, de nos bonnets, ceinturons, chemises, & de tous nos autres habits, pour estre grandement diuers des leurs. Mais sur tout ils prisent bien fort le corail.

Quant aux ports c'est asseurement chose digne d'admiration, qu'en l'espace d'un peu plus de cent lieuës, on y en conte plus de soixante, tous lieux propres pour aborder, & prendre terre. Ce qui vient de ce qu'il y a en ces riuages plusieurs grands bras de mer. Le plus beau port où arriuent tous les estrangers, & où se fait cette si renommée foire dont nous auons parlé, est celuy de la Province de Cacciam. On y entre par deux éboucheures de mer. L'une s'appelle Pulluciam-bello, & l'autre Turon. Les emboucheures sont distantes trois ou quatre lieuës, l'une de l'autre, par lesquelles apres que la mer ainsi diuisée en deux bras, s'est estenduë sept ou huit lieuës dans la terre, faisant comme deux fleues tousiours separez, elle se rejoint en fin, & jette dans un grand fleue, où se rendent pareillement tous les vaisseaux qui y entrent

entrent des deux costez.

Le Roy de la Cochinchine permit autres-fois aux Iaponnois, & Chinois, de se choisir là vn lieu & place commode pour s'y bistrir vne ville, pour plus grande aylance de la foire dont nous auons parlé. Ceste ville s'appelle Faifo, laquelle est si grande qu'on peut bien dire qu'il y en a deux, l'vne des Chinois, l'autre des Iaponois. Chacun ayant pris leur quartier à part, & leurs Gouverneurs separez, & viuans à leur mode: les Chinois selon les loix & coustumes particulieres de la Chine: & les Iaponois selon les leurs.

Et d'autant que comme nous auons dit, le Roy de la Cochinchine n'en refuse point l'entrée à pas vne nation, la laissant libre & ouuerte à toute sorte d'estrangers, les Hollandois y estoient venus, aussi bien que les autres avec leurs nauires chargez de force marchandises. C'est pourquoy les Portugais de Macao prindrent dessein de despescher vn Ambassadeur vers le Roy, qui au nō de tous le suppliaist, que les Hollandois comme leurs ennemis iurez fussent exclus de la Cochinchine. A quoy fut employé vn braue Capitaine nommé Ferdinand de Costa, qui en vint heureusement à bout, quoy que nō sans beau-

beaucoup de difficulté. Car il fit tant que le Roy defendit par Edit aux Hollandois, de s'approcher des terres de son obeyssance sur peine de la vie. Mais cōme ceux de Macao apprehenderent, que cet Edit fut mal gardé, ils s'auisèrent d'enuoyer vne nouvelle ambassade à la Cochinchine, afin d'en obtenir la confirmation, & chargerent leurs deputez de faire entendre au Roy qu'il y alloit de son interest, & que si il n'y pouruoyoit, il y auoit à craindre, que les Hollandois avec le temps comme fort accorts, & rusez, qu'ils sont, ne s'essayassent d'enuahir vne partie du Royaume de la Cochinchine, ainsi qu'ils auoiēt desia fait en quelque autre endroit des Indes Mais quelques personnes bien entendues du mesme pays, leur donnerent aduis de ne parler de la sorte au Roy, d'autant que ce seroit le vray moyen de faire, que les Hollandois eussent la permission de venir trafiquer dans le pays, & d'y inuiter toute la Hollande. La maxime des Cochinchinois estant de ne tesmoigner iamais d'auoir la moindre apprehension d'aucune nation qui soit au monde. Tout au contraire du Roy de la Chine, qui craignant tout, ferme la porte aux estrangers, & ne leur permet le trafic en son Royaume. Et que pourtant il falloit que l'Ambassadeur se ser-

uit

nit d'autres raisons, pour obtenir ce qu'il demandoit.


Le Roy de la Cochinchine a tousiours témoigné d'aymer extraordinairement les Portugais, qui viennent pour trafiquer dans son Royaume. Et par plusieurs fois leur a offert, trois ou quatre lieues de pays, dans l'endroit le plus fertile, & abondant qui soit aux environs du port de Turon, à ce qu'ils y bastissent vne ville, avec tout ce qui leur seroit besoin, de mesme qu'ont fait les Chinois & Iaponois. Et s'il m'estoit permis de dire mon sentiment sur cela au Roy Catholique, ie luy dirois qu'il feroit tres-bien de commander aux Portugais de vouloir accepter l'offre pleine de courtoisie, qui leur est faicte, & d'y bastir au plustost vne bonne ville, laquelle leur seroit vn lieu de seureté, & de refuge, & seruiroit de prompt deffense pour tous les navires qui passent à la Chine. Ioint qu'on y pourroit entretenir vne flotte toute preste contre les Hollandois, qui vont à la Chine & au Iapon, lesquels bon gré, mal gré qu'ils en ayent sont obligez de passer par le milieu du canal, qui est dans la coste de ce Royaume, és Prouinces de Renram, & des Pulucambis, & les escueils des Pulufis.

Voila le peu qu'il m'a semblé bon de raconter,

ter, avec toute verité, de l'Estat tẽporel de la
Cochinchine, selon la cognoissance, que i'en
y peu prendre, durant le temps de quelques
années que i y ay demeuré, comme on le co-
gnoistra mieux, en la seconde partie de ceste
Relation.



SECONDE



SECONDE PARTIE
DE L'ETAT
 SPIRITUEL DE LA
 COCHINCHINE.

CHAPITRE I.

*DE L'ENTREE DES PERES DE
 la Compagnie de IESVS en ce Royaume
 , & des deux Eglise: qu'ils
 bastirent, l'une à Turon, &
 l'autre à Cacciam.*



AVANT que les Peres de la
 Compagnie de IESVS fussent
 allez dans la Cochinchine, la
 coustume des Portugais estoit,
 quand ils y alloient pour trafi-
 quer, d'y mener avec eux de Malaca, & de
 Macao quelque Chapelain pour leur dire la
 Messe, & leur administrer les Sacremés pour
 tout le temps qu'ils y negotioient, qui estoit
 G d'ordi-

d'ordinaire de trois ou quatre mois de suite; comme en cas pareil, les Castillans y en amenoient de Maniglia. Mais comme ces bons Prêtres n'auoient autre obligation que de seruir les Portugais, ils se soucioient fort peu de traualler au bien, & aduancement spirituel des peuples de ce pays là, & ne se mettoient guere en peine d'apprendre leur langue, n'apportans pas beaucoup de diligence pour leur communiquer la lumiere du Saint Euan-gile. Ce n'est pas neanmoins, qu'il ne s'en soit trouué quelqu'un de ceux là, qui a bien eu le front, que de publier par l'Espagne, dans vn liure intitulé le voyage du monde, qu'il auoit catechié, & baptisé l'Infante de la Cochinchine avec plusieurs Dames de la Cour. Estant cependant très-assuré, que iamais ny l'Infante, ny autre personne de ceste maison Royale, ne tesmoigna iulques à present la moindre enuie de se Christienniser. Et combien que depuis nostre arriuée en ce pays, année aucune ne se soit passée, sans que nous ayons esté faire la reuerence au Roy, & traité avec tous les Seigneurs de la Cour, cependant l'Infante n'a iamais monstré par aucun signe n'y qu'elle fut Chrestienne, ny mesme qu'elle sceut chose quelconque de ce qui concernoit le Christianisme. D'où il est
ailé

aisé de iuger, combien ce discours est farcy de mentonges, & remply de fables, semblables à celle qu'il va encore racontant en ce mesme lieu, de ceste mesme Infante, qu'elle demandoit à se marier à ce Chappelain, & vne infinité de pareilles bourdes. Seulement sçauons nous, que quelques Peres Religieux de l'Ordre de S François de Maniglia, & vn autre de l'Ordre de Sainct Augustin party de Macao vindrent à la Cochinchine, poussez veritablement du desir de la conuersion de ces pauvres ames. Mais n'y ayant rencontré le succez qu'ils y esperoient, à raison d'vn nombre de grandes & diuerses difficultez, qui se jettoient à la trauerse, ils furent contraincts de retourner sur leurs pas sans rien faire, & reprendre le chemin de leurs pays. La diuine prouidence en ayant ainsi disposé, pour reseruer la culture de ce champ, aux trauaux & labeurs des enfans de Sainct Ignace. Ce qui s'est effectué en la maniere qui suit.

Quelques Marchands Portugais firent venir l'enuie aux Superieurs de la Compagnie de IESVS à Macao, du grand fruit qui se pourroit faire à l'honneur & plus grande gloire de Dieu, en la Cochinchine, si quelques ouuriers de cette mesme Compagnie

courageux, infatigables, & ardens au zele de l'auancement des ames y estoient enuoyez. Et en particulier vn Capitaine homme zelé entreprit à dessein d'induire le Pere Prouincial, par les instances qu'il luy en feroit de ne vouloir abandonner sans secours, vn Royaume si capable d'estre instruit & enseigné des choses de Dieu. Le Pere Prouincial trouua ceste demande si conforme à l'esprit de nostre vocation, que sans luy faire plus long temps attendre sa resolution, il luy accorda ce qu'il demandoit, & destina pour ceste entreprise, le Pere François Buzome qui auoit leu la Theologie à Macao. Il estoit natif de Gennes, nourry pourtant au Royaume de Naples, où il fut receu en la Compagnie, & de là enuoyé aux Indes avec le Pere Iacques Carauaglio Portugais, qui deuoit essayer de passer au Iapon par la Cochinchine, ainsi qu'il fit. Ce fut celuy qui au milieu d'un estang d'eau froide au cœur de l'hyuer exposé à la mercy des neiges, & des vents, rendit l'ame dans ceste eau gelée, mourant par la rigueur du froid, pour l'amour de nostre Sauueur : Comme le declare amplement le narré de son martyre. Le Pere Carauaglio estant donc party, le Pere Buzome qui resta seul dans la Cochinchine, avec vn de nos freres

Coad-

Cadjuteurs, se mit incontinent, tout ardent & embrasé qu'il estoit du desir de lauuer les ames, à procurer leur conuersion, par toutes les voyes possibles; pour ce faire, il commence sa mission dans Turon, sans scauoir encore la langue, & mesme sans auoir personne qui luy seruit de truchement, ne trouuant ame viuante, qui sceut dauantage de la langue Portugaise, que ce qu'il luy en falloit pour vendre, & acheter, & encore à toute peine. Sinon qu'avec cela quelques-vns auoient en outre appris certains mots, & manieres de parler, d'or les interpretes des Chapelains d'un nauire, qui y vint deuant que la Compagnie y fut entrée, se souloient ayder pour demander aux Cochinchinois s'ils vouloient estre Chrestiens; & en auoient desia fait quelques vns de ceste sorte. Mais qu'on pouuoit bien plustost appeller Chrestiens de nom, que de profession, & qui encore ne scauoient pas mesme ce que signifioit le nom de Chrestien. Et ce à raison de la façon de parler, avec laquelle les interpretes souloient demander à ces infideles, s'ils auoient enuie de se faire Chrestiens. Pource que les mots dont ils se seruoient, ne vouloiēt dire autre chose, sinon que ne vous plaist-il pas de deuenir Portugais. Dequoy le Pere François Buzome

s'apperceut par vn rencontre que iem'en vay dire. Il se jouïoit vne comedie en la place publique, en laquelle le Pere vit que pour entr'acte, ou entremets, ils faisoient venir vn certain personnage, en habit de Portugais avec vn ventre qu'on luy auoit fait à dessein, & par artifice si gros, qu'au dedans si cachoit vn petit enfant. Celuy-cy, deuant tout le monde, faisoit sortir ce petit enfant de sa grosse bedene, & luy demandoit s'il ne vouloit pas entrer dans le gros ventre du Portugais par ces paroles. *Con gnoo muon bau tloom laom Hoalaom chia*. C'est à dire, mô petit fils voulez vous entrer, ou non dans le ventre du Portugais, & le garçon respondoit qu'ouy, & celuy-là l'y mettoit & l'en retiroit de nouveau, luy faisant la mesme demande à diuerses reprises, & repetât souuent ces paroles de risée pour donner du plaisir aux spectateurs.

Le Pere s'apperceûât, que les mots que disoit si souuent ce basteleur, *Muon bau, tloom, laom Hoaloam chiam*, estoient les mesmes q̃ ceux dont vsoient les interpretes, pour conuier ces infideles à se faire Chrestiens, pour lors il vit biẽ la tromperie & abus qui s'estoit glissé iusques à lors dans la Cochinchine, & auoit pris pied dans l'esprit de ce peuple, qui croioit, que se faire Chrestien, n'estoit autre chose,

chose, que laisser d'estre Cochinchinois pour deuenir Portugais. Ce q̃ ce farceur representoit par gaufferie en cete Comedie, où cet enfant deuoit entrer dās le ventre de celuy qui faisoit le persōnage du Portugais. Aussi le P. mit-il bon ordre, autāt qu'il luy fut possible, qu'un si damnable erreur s'ostast de l'esprit de ces peuples. Instruisant ceux qui seroient desia baptisez de l'obligation qu'ils auoient, & donnant à entendre à ceux qui se presentoient à luy de nouveau pour se faire Chrestiens, en quoy cōsistoit le S. Baptisme, ce que c'estoit d'estre Chrestien, en procurant sur tout, que les interpretes en fussent bien informez, à ce que par apres ils le seruissent fidelement en l'instruction des autres, leur failant changer de termes, & prendre ceux-cy en la place, *Muon bau dau Christiam chiam*, c'est à dire voulez vous accepter la loy des Chrestiens, ou non. Et fit si bien, par le soin extraordinaire qu'il y apporta, & par son ardante charité, qu'en peu de iours, il commença de iouir de ses trauaux, & fatigues, tant à reformer ceux qui n'estoient Chrestiens que de nom, qu'en conuertissant encore plusieurs autres à la foy. Ce ne fut pas seulement à Turon, où estoit sa demeure ordinaire, mais ecore en plusieurs autres endroits qu'il laissa vne

très-bonne odeur de son enflammée charité, & zele des âmes infatigable, prenant tât de peine à instruire les vns, conuertir les autres, & à les disposer au S. Baptême, avec vne ferueur si vehemente, & tel concours de ces peuples, qu'en fort peu de temps ces nouveaux Chrestiens bastirent vne grande Eglise, & fort capable à Turon, dans laquelle se celebroit publiquemēt le tres-sainct sacrifice de la Messe, & la doctrine Chrestienne s'y preschoit, & enseignoit avec vn indicible contentement, par le moyen des interpretes qui estoient desia tres-bien instruits, & tous demeuroiēt affectionnez au de là de tout ce qui se peut dire au Pere François Buzome, lequel outre qu'il estoit homme de grand, & profond sçauoir, & d'une eminente vertu se gaigna tellemēt l'affection de ces peuples gentils par sa grande douceur & courtoisie qu'ils courroient tous à luy, & se plaisoient yniquement en sa compagnie. Comme on le verra ècore plus particulièrement en ce qu'il fit à Cacciam, qui est la ville où demeure le Roy, à six ou sept lieues à costé de Turon allant par eau sur la riuere.

Le P. Buzome remua si bien les cœurs en ceste Cour, qu'il n'y tarda gueres, sans qu'on luy eust destiné vne place, pour bastir vne Eglise laquelle fut esleuée en tres-grande diligence,

gence, tous y contribuans du leur , tant à la despense qu'en y trauaillant eux-mesmes, selõ leurs moyens, & pouuoir. On luy assigna encore vn bon logis, & fort capable, pour y fonder la residence des Peres, qui avec le temps y deuoient venir demeurer pour instruire ce peuple és mysteres de nostre sainte foy. Tout cela se fit principalement par l'assistance d'vne tres-noble Dame qui se cõuertit, & eut le nom de Ieanne sur les saints fonds du Baptelme. Ceste-cy n'entreprist pas seulement la fondation de l'Eglise, & maison susdicte, mais dressoit de plus en sa maison plusieurs Autels & Oratoires, remerciât incessamment l'vnique, & vray Dieu du Ciel, & de la terre, de la grace qu'il luy auoit faiete, de luy auoir ouuert les yeux, pour luy communiquer la lumiere de la sainte foy. Dieu opera toutes ces merueilles en moins d'vn an, par l'entremise de son seruiteur le P. François Buzome. Le bruit en estant venu iusques à Macao, il sembla bon au P. Prouincial d'y enuoyer l'an suiuant, vn autre Pere plus ieune d'âge avec vn frere Iaponnois, à ce qu'apprenâts la langue, ils peussent par apres prescher, sans qu'il leur fut besoin d'interprete. Et celui qui y fut enuoyé, fut le Pere François de Pina Portugais, qui auoit esté escolier de
Theo-

Theologie, sous le Pere François Buzome. Or iacq̃it qu'en ceste seconde année, Dieu ne leur fit pas la grace de remporter de si grands fructs pour la conuersion des ames, qu'ils auoient fait l'année precedente, ils furent toutesfois plus grands quant aux travaux, qui leur vindrent d'une cruelle & furieuse persecution, suscitée par le semeur d'iuove, qui depirant de rage qu'il auoit, de voir si heureusement germer, & pousser avec tant de succez, ceste diuine semence, fit tout son effort pour la suffoquer en ces commencemens, comme se verra au Chapitre suiuant.

CHAPITRE II.

*DE LA PERSECUTION QV'E N-
dura ceste nouvelle Eglise de la Cochinchine, en ses commencemens, & comme
i'y fus enuoyé de mes Superieurs, pour ai-
der ceux qui y estoient desia.*

LA persecution commença contre les Peres, par vn accidēt ridicule d'abord, & de nulle consequence : mais qui par apres leur fut occasion de beaucoup de larmes. Il y eust
cette

ceste année par tout le Royaume vne disette & sterilité tres-grande, d'autant que vint à manquer le débord d'eau, & inondation, qui auoit coustume de venir en Automne, que nous auons dit en la premiere partie, estre si necessaire pour semer le ris, vnique entretien, & nourriture de ce pays. Ce qui fut cause que les Prestres de ces Gentils appelez Onsaïs, s'assemblerent en vn malheureux Concilia-bale, pour rechercher, & resoudre entr'eux, quelle pourroit estre la cause d'un si grand courroux de leurs Idoles, contre tout le Royaume, qu'il ne se peut flechir à la veuë de tant d'hommes, morts par tout de male faim, & ne se point toucher de compassion dans les extremitez d'une si deplorable misere. Les aduis pris, il fut arresté du commun sèrimēt de tous, que n'estāt arriuée nouveauté aucune dās le Royaume, qui allast plus directement contre l'honneur de leurs Idoles, que l'entrée qu'on auoit donné à certains estrangers en ce Royaume, avec permission de pouuoir publier vne loy du tout contraire au culte de leurs Idoles, que pour cela iustement irritez, ils s'en vengeoient asseurement, en soustrayant les pluyes, & deniant l'inondation si souhaitée à ceste terre. Ce point ainsi conclu, & resolu par entre-eux, avec

avec tout plein d'ignorance, ils allerent sur l'heure tous grommelans trouuer le Roy, & luy font instance, qu'il aye à chasser de tout son Royaume, les Predicateurs de cete nouvelle doctrine, & que c'estoit là l'vnique moyen d'appaiser le iuste courroux, & indignation des Dieux. Le Roy comme sage, & aduisé qu'il est, se prist à rire à ceste proposition, n'ignorât pas, que c'estoit vne pure imagination, & chimere qu'auoient forgé ces Prestres, dont il fit d'autant moins de conte, que grande estoit l'estime qu'il auoit de nos Peres, & l'affectiō singuliere qu'il portoit aux Portugais. Mais peu leur seruit ceste bonne responce du Roy, non plus que sa bonne volonté, pour se garantir de la rage de ces supposits du diable, qui firent si biē par leurs menées, & discours qu'ils esmeurent le peuple à demander au Roy, à toute instance, que les Predicateurs de l'Euangile fussent bannis du Royaume. Si que le Roy ne s'y pouuant opposer, sans grand danger de soulleuement, fit venir à soy les Peres, & leur dit avec tout plein de sentiment, qu'il cognoissoit bien la folie de ce peuple, & l'ignorance de ses Prestres: mais que ce seroit faire contre la prudence, que de vouloir s'opposer au torrent impetueux de ceste populace, ainsi mutinée,

& re-

& resoluë en vn affaire qui la touchoit de si près, où il s'agissoit d'apporter quelque remede au mal cōmun de la famine qui les tenoit à la gorge, & que pourtāt pour destourner l'orage, ils souffrissent de s'absenter pour quelque temps de sō Roy aume, & d'en vouloir sortir au plustost. Les Peres pleuroient à grosses larmes à ce discours, tāt il leur faisoit mal de laisser ainsi à l'abandon ce tendre, & ieune plant de la Chrestienté. Mais comme obligez de se conformer tousiours en tout, & par tout au bon plaisir de Dieu, ils se disposerent à s'embarquer promptemēt. Vray est, que quand ils furent entrez dans leurs vaisseaux, pour obeyr au commandement du Roy, jamais il ne leur fut possible de desmarer du port, parce que desia certains vents contraires souffloient, qui durent d'ordinaire trois ou quatre mois, les Portugais les nomment vents generaux. Ce que voyans les Cochinchinois, ils ne voulurent leur permettre de s'entrer dans la ville, mais les contraignirēt de s'arrester dans vne plaine hors de tout secours humain, exposez aux continuelles ardeurs du Soleil, qui sont tres-cuisantes en ces contrées. Ce ne leur fut pas cependant vn petit rafraischissement parmy ces chaleurs si vehementes, de voir la constāce de quelques
nou-

nouveaux Chrestiens, qui furent bien si courageux, que de ne point pour tout laisser leurs Maîtres, les suivans par tout, sans les abandonner, leurs tenans compagnie, & les aidans du mieux qu'ils pouuoient le rendans de leur plein gré, & franche volonté compagnons de leurs souffrances. Mais le P. François Buzome eust icy vn nouveau champ pour faire preuve de son courage, & de sa vertu, pource que dans les mesaises & miseres d'une vie si incommode, il luy vint vne apostume en la poitrine, qui s'estant ouuerte rendit quantité de pus, & de corruption, & qu'il garda long-temps, suppurant de ceste sorte, ce qui l'incommodoit extremement.

Cependant le diable n'en demeura pas là, il ne se contente pas d'auoir réduit les Predicateurs de l'Euangile, dans les disgraces & incommoditez que nous venons de dire, il passe outre & donnant plus auant, fait de nouveaux efforts pour oster tout credit à leur doctrine, & descrier tout à fait la Religion Chrestienne, se seruant à ceste fin d'un de ces Onfais, lequel d'autant qu'il menoit vne vie d'Anachorete, s'estoit acquis à ceste occasion vne grande opinion de saincteté. Cestuy-cy estant vn iour sorty de son hermitage se donna bien ceste vanité deuant tout le peuple,

peuple, que de se promettre de pouuoir obtenir par ses prieres, que les Idoles leurs enuoyeroient incontinent de la pluye, & sans plus tarder, luyuy d'une grande multitude de peuple, il va tout au haut d'une montagne, & commença là d'inuoker les diables, les conjurant par certains mots qu'il disoit, & frappant trois fois du pied la terre, & là dessus voilà soudain le Ciel qui se noircit, & verse une grande ondée de pluye, laquelle bien que petite, veu le tres-grand besoin qu'on en auoit: fut ce neantmoins assez forte pour accroistre le credit de ce suppost d'enfer, & faire auoir à mespris nostre Sainte Foy, chacun disant qu'il n'auoit point encore veu que ces Prestres estrangers en eussent autant fait par leurs prieres enuers le grand Dieu, dont ils se disoyent seruiteurs. Ce rencontre apporta encore plus de fâcherie, & de regret aux Peres que n'auoient fait toutes les mesaises, & necessitez qu'ils auoient souffert iusques alors. Mais la diuine prouidence ne manqua point de les reconforter bien à point dans ceste detresse. Ce fut par l'entremise de Madame Ieanne, qui leur predict par un esprit de prophetie, qu'ils ne deuoient s'affliger dauantage de ce qui estoit arriué. Pour ce que dans fort peu de temps Dieu feroit voir

voir à tout ce peuple l'hipocrisie, & feinte saincteté de cet Onsay, & de les Idoles, luy faisant perdre tout le credit, qu'il se seroit acquis iusques là. Ce qui se verifia de point en point, comme elle l'auoit preueu. Car le bruit de la saincteté de cet homme icy, s'estant espars par tout, vint mesme iusques aux oreilles du Roy, qui aussi-tost le fit venir à soy, & luy bailla vn departement dās son Palais, là il s'amouracha d'une Concubine du Roy qu'il luy fut aisé de faire condescendre à ses desirs. Mais la chose fut sceuë, & encore qu'en la Cochinchine ce peché soit estimé pour terrible, & que par les loix du pays, celuy là soit punissable de mort qui s'oublie de la sorte que de cognoistre vne femme qui auroit esté au Roy. On ne pouuoit pourtant proceder contre celuy cy, qui estoit personne tenue entre eux pour sacrée, si ce n'est en la façon que commandent les mesmes loix. Le Roy doncques prononça contre luy qu'il eust à s'absenter, mais qu'il n'allast, ny du costé de l'Orient, ny du costé d'Occident, ny vers le Septentrion, ny vers le Midy, ny en aucun endroit que ce fust de son Royaume; publié qu'on eust cet arrest il fust executé. De maniere que l'Onsay ne se monstra plus à sa grande confusion, & iamais ne fut plus veu
ny

ny dedans ny dehors le Royaume.

Mais le diable ainsi honteusement escorné ny vomit son venin, & deschargea sa rage, cōtre les seruiteurs de Dieu. Soufflāt aux oreilles de ce peuple de mettre le feu à l'Eglise de Turon, ce qui fut fait au grād creuecœur des Peres, qui regardoient du lieu ou ils estoient, ce piteux spectacle, sans aucun moyen d'y remedier.

Ce pendant la disgrace des Peres se scait de tous costez aux enuiron, & les Peres de Macao, en receurent l'aduis au grand regret de tous ceux du College, qui touchez de cōpasion des miseres de leurs freres, se resolerent d'y pouruoir au mieux qu'ils pourroient se seruans de l'occasion d'un vaisseau Portugais, tout prest à faire voile en la Cochinchine. Et les superieurs iugerēt, que le tout reussiroit avec plus de succez, si deux Peres s'y en alloient dont l'un prendroit le tiltre de Chapelain, pour s'en retourner par après dans le mesme vaisseau, de peur de donner occasion aux Cochinchinois de se fācher, & de les aigrir dauantage contre nous, & l'autre qui estoit pour y demeurer, s'y en iroit en habit desguisé, & sans se faire cognoistre. Le P. Pierre Marquez Portugais fut choisi pour le Chappelain, & le bō-heur voulūt pour moy,

H

que

que ie luy fusse donné pour compagnon, la sainte obeissance en ayant ainsi disposé. Et quoy que ie fusse destiné de nostre R. P. General pour le voyage de la Chine, i'embrassay cependant bien volontiers & de toute l'estêdue de mon cœur, l'occasion qui se presëtoit, de me dedier à nostre bon Dieu, pour la Cochinchine, & pour le soulagemēt de nos bons Peres si affligez. Ioint qu'à raison de la persecution esmeuë dans la Chine, ie m'en voyois tout à fait forclos. Je partis donc de Macao en habit de seruiteur, & quelque temps apres arriuy en la Cochinchine, le propre iour de ma naissance en ce monde, & peu s'en fallut qu'il ne fut aussi celuy de mon entrée dans le ciel. Mais il pleust à la diuine prouidence d'en ordōner autrement, ou parce que mes pechez me rendoient indigne de ceste si grande faueur, ou par quelque secret iugement, qui n'est cogneu qu'a Dieu seul.

Comme nostre vaisseau approcha du rivage, ou estoient venus plusieurs gens du pays, il y eust par malheur, ie ne scay quel different entre deux Portugais, dont l'un ayant esté blessé à mort par son compagnon, l'autre apres son coup, se jetta dans la mer, pour eschapper des mains des amis du blessé, qui le poursuuoient pour le tuer. Il nagea quelque temps,

temps, mais enfin n'en pouuant plus & craignant d'aller à fonds, il s'approchoit de nostre nauire pour se sauuer, taschant en s'y agraffant de grimper dedans. Mais il s'efforçoit en vain en estant empesché par ses parties aduerses, qui estoient tout au haut avec halebardes, coutelas, & espées, à dessein de le mettre à mort. Côme ie vis ce pauvre hōme si en peine, ie fis mon possible pour l'aider, & tout en habit de seruiteur que i'estois, ie me ietray au milieu d'eux, & appellant cestuy-cy à moy, & repoussant les autres ie les pacifiay tous. Les Cochinchinois, qui estoient dans le nauire, s'aperceuans qu'à la veuë d'un seruiteur, les Portugais s'estoient addoucis, songerent soudain à malice, & scachans par leur propre experience, que quand les Portugais font vne fois en cholere, ils ne se rapaissent pas si tost, si ce n'est que quelques Religieux s'y employent, se dirent entre eux asseurement que celuy la n'est pas vn seruiteur, encore qu'il le veule faire croire par son habit. Ce n'est non plus vn simple marchand comme les autres. C'est infailliblement vn de ces Religieux qui contre l'ordre du Roy veulent venir en cachette en ce pays. C'est pourquoy il nous le faut deferer & deceler au Roy à fin qu'il soit chastué cōme il merite. Les voi-

la donc au tour de moy, & encore bien que ie n'entendisse pas les discours qu'ils tenoient par entre eux, si m'aperceu- ie fort bien qu'ils me soubçonnoient. Et quoy que ie sceusse feindre pour n'estre point descouuert si ne peu- ie si bien faire, qu'ils n'en donnassent auis à la Cour. Quand ie viscela, tenant ma mort pour toute asseurée, ie me resolu à vouloir mourir, cogneu de tous, pour ce que i'estois. A cet effet ie pris ma soustaine, à la façon de la Compagnie, & me reuestis d'un surplis avec vne estole au col, & en cet habit ie commençay à prescher publiquement la Foy de IESVS-CHRIST, par le moyen des interpretes, & apres auoir dressé vn autel en la place ie celebray la sainte Messe, & communia les Portugais qui s'y trouuerent. me tenant prest à tout ce que Dieu voudroit faire de moy, lequel n'eût pas pour agreable de me faire tant de grace que de respendre mon sang pour son amour. Et cependant comme on traittoit de mon affaire, il vint à pleuvoir en si grande abondance nuit & iour, sans iamais cesser, que chascun se mit à labourer la terre, & semer du ris. Ayants donc remarqué par bon rencontre, qu'à mon arriuée ils auoient obtenu ce qu'ils souhaittoient depuis si long temps, prenans cela à bon augure, & recog-

recognoiffants que ce defaut d'eau ne venoit point du costé des Peres, Ils se repentirent du mal qu'il nous auoient fait, & ne nous trauerferent iamais plus, nous laissant aller en toute liberté par tout le Royaume.

Les choses s'estant ainsi calmées, ie pris resolution d'aller chercher le P. Buzome, & ses compagnons, la part où ils seroient. Mais tant dis que ie faisois mes diligences, pour en apprendre des nouuelles, le bruit court par la ville de mon arriuée, aussi tost Leanne ceste noble Dame s'en vint pour me trouuer, de la laquelle ie sçeu que le P. François de Pina avec son compagnon Iaponois auoient esté conduits secretement par quelques Chrestiens Iaponois, dans la ville de Faifo chacun tenant pour tout assuré que desia les Peres seroient sortis du Royaume.

Le P. Marquez qui sçauoit fort bien la langue Iaponoise ayant ouy cecy, voulut que nous nous en allassions à Faifo, ou nous rencontrâmes le Pere François de Pina, lequel veritablement se tenoit caché, mais estoit caressé avec tout plein de courtoisie de ces bons Iaponois Chrestiens, auxquels il administroit les saints Sacraments en cachette.

La ioye & le contentement que nous reçûmes luy & nous, en cest entreueuë fut à

dire le vray incroyable : car outre ce lien commun de charité, qui vnit tous les Religieux par ensemble, nous auions encore esté compagnons, & amis bien particuliers dans le College de Macao. La courtoisie, & bienueillance encore des Iaponois, fut extraordinaire, lesquels nous traiterent magnifiquement durant quinze iours avec des témoignages d'amitié & contentemens non communs.

Là mesme i'appris aussi comme le P. **Bu-**zome par vne particuliere prouidence estoit encore en vie dās ce Royaume, sa diuine Majesté le voulant conseruer pour le bien de ceste mission. Parce que tandis qu'il estoit dans ceste plaine, accablé de ces miseres, & tourmenté de cet apostume dans l'estomach, arriva par bon rencōtre à Turon, le Gouverneur des Palucambis, lequel ayant veu ce pauvre homme en si piteux estat qu'on l'eust pris pour vn cadavre viuant, touché de compassion, voulust sçauoir qui il estoit, & par quelle disgrace il estoit deuenu si miserable. On luy raconte le tout comme il s'estoit passé, & que sur ce qu'on luy auoit attribué & à ces cōpagnons le manquement de pluye, le Roy auroit ordonné qu'il fût chassé du Royaume, & tout le reste de leur meladuenture.

Le

Le Gouverneur bien émerueillé de tout cela se prist à rire, de ce que l'on chargeoit vn pauvre Religieux estrange, d'une chose qui n'estoit aucunement en sa puissance, & ne pouvoit dependre de luy. Partant il commanda qu'on le tirast de là, & l'ayant fait mettre dans l'une de ses galeres, il le conduisit avec soy en sa Prouince, le logea dans sa maison mesme, & le fit traiter par les plus fameux, & experimentez Medecins du pays, le faisant servir par ses propres enfãs durant vne année que continua sa maladie. Chacun restant tout estonné qu'un Gentil porté seulement d'une pieté & compassion naturelle, eust usé de tant de courtoisie enuers vne personne incogneuë & estrangere.

Nous nous trouuâmes donc quatre Prestres de la compagnie en la Cochinchine, le P. Buzome aux Pulucambis à quatre vingt lieux du port de Turon, le Pere Pierre Marquez à Faifo, où il demeura pour superieur, & pour aider les Iaponois, ayant le Pere François Pina pour compagnon, & moy qui m'en retournay à Turon, pour y servir les Portugais, leur disant la Messe, leur preschant, & les confessant, aprenant par mesme moyen la langue Cochinchinoise. Je taschois encore par l'entremise des interpretes de cōuertir tousiours

quelques vns de ces Gentils, & de les baptiser: Mais sur tout d'encourager, & confirmer dauantage, ceux qui estoient desia baptizez. Il m'arriua dans ces commencement vne chose digne d'estre sçeuë. Je fus appelé pour baptiser vn petit enfât, qui s'en alloit mourir ie le baptisay, & vn peu apres il expira. Je me trouuois en peine du lieu, ou ie l'enterrerois: ce qui me donna occasion de pëser à establr vn cimetiere qui seruiroit de la en auant, pour inhumer tous les Chrestiens, qui se mourroient. A ceste fin ie donnoy ordre, qu'on prit vn mas de nauire, qui estoit la à l'escart, & qu'on en dressat vne belle Croix, laquelle estant faite, i'inuitay tous les Portugais, & mattelots, à ce qu'ils nous aidassent à la porter au lieu que i'auois choisi, & moy-mesme avec vn surplis, & vne estolle, ie les soulageay comme ie pouuois. Ainsi qu'on estoit à creuser la fosse pour arborer la Croix, voila sortir du voisiage vne grosse troupe de gens armez, qui avec leurs arquebuses, faisoient mine de me vouloir tuer, ce que voyant ie leurs fis demander par nostre truchement, ce qu'ils pretendoient en ce lieu, & i'appris qu'ils ne vouloient pas permettre que i'y plantasse ceste croix, d'autant qu'ils craignoient que les malins esprits ne les vinssent molester dans
leurs

leurs maisons, ie repliquay qu'ils esprou-
ueroient tout le contraire, pource qu'une
des vertus de la croix estoit de donner la cha-
se aux diables, dõt ils demeurèrent tellement
satisfaits, que soudain ils mirent tous les ar-
mes bas, & accoururent à nous, pour nous ai-
der, & ainsi au grand contentement de tous,
l'estendart glorieux de la Croix fut arboré, &
le cimetiere beny pour la sepulture. Le Gou-
verneur des Pulucambis arriva en ces entre-
faites, & amene avec soy le P. François Bu-
zome. Ainsi nous nous trouuâmes tous en-
semble à Faifo, avec grande ioye, extreme
allegresse quatre Peres que nous estions de la
Compagnie, & deux freres, l'un Portugais, &
l'autre Iaponois. Et apres quelques courts,
mais charitables accueils que nous nous en-
trerendimes, ce fut de deliberer aussi tost sur
ce que nous auions à faire, pour le meilleur,
& le plus à propos, à fin d'auancer le bien
spirituel de ceste mission, & fut trouué bon,
par auis commun que le P. Pierre Marquez
demeurerait à Faifo avec le frere Iaponois,
d'autant qu'il estoit bon Predicateur. Les au-
tres trois avec le frere Portugais, suiuroient
le Gouverneur des Pulucambis, qui en fai-
soit grande instance, ce qui fût ainsi, com-
me il se dira tantost.

CHA-

CHAPITRE III.

*Le Gouverneur des Pulucambis introduit
les Peres de la Compagnie de IESVS
en sa Prouince, & leur bastit vne
maison, & vne Eglise.*

NOUS partîmes de Faifo le P. François Buzome, le P. François de Pina, & moy, pour les Pulucambis en compagnie du Gouverneur de ceste Prouince, qui durant tout ce voyage la nous traita avec tant de courtoisie, & tant de tesmoignages de bien-veillance, qu'il ne se peut dire, il nous mit tousiours en mesme logis que luy, & se gouvernoit avec nous de telle sorte, que n'y voyans aucunes considerations humaines qui l'y peussent obliger, il estoit clair, & manifeste, que ces caresses estoient, comme autant d'effets de la prouidence diuine.

Il nous donna vne galere à part qui ne deuoit seruir pour autre que pour nous, & pour nos interpretes, ne voulant pas permettre, qu'on y mit mesme nos hardes, qui estoient portées dans vne autre barque destinée exprés pour cela. Nous marchâmes douze
grandes;

grandes iournées portez ainsi commodement, prenans port matin & soir. Et d'autant que tous les porrs estoient situez près des meilleures villes, & citez de la Prouince de Quamguia, en laquelle, il auoit la mesme authorité que dans celle des Pulucambis, tous luy venoient au deuant pour luy faire la reuerence, & presenter leur obeissance, & pour le recognoistre par de tres-riches presents, ou pous auions tousiours nostre part, tous les premiers, par l'ordre du Gouverneur qui le vouloit ainsi : Chascun s'émerueillant de nous voir tellement honorez, ce qui seruoit beaucoup à nous mettre dans l'estime de ces gens là, & leur faire prendre vne grande opinion de nous, ce que pretendoit iustement le Gouverneur. A quoy aidoit tout à fait le cas tres-grand qu'il faisoit de nostre intercession, toutefois & quantes que l'occasion s'offroit de chastier quelque crime. Car nous n'auions pas plustost ouuert la bouche pour obtenir les graces, & pardons que nous demandions, qu'aussi tost il nous les accordoit. En quoy nous aquismes le renom, de n'estre pas moins puissans auprès du Gouverneur, que charitables, & pleins de compassion enuers tous; ce qui nous faisoit cherir, & rechercher de tout le monde.

Il voulut outre cela que durant tout ce voyage on se gouuernast de telle sorte enuers nous que si nous eussions esté bié grands Seigneurs cōmandât que par tout on fit des ieux & resiouissances publiques, faisant tantost escarmoucher les galeres, tantost les faisant voguer l'vne à l'enuy de l'autre, mettant mesme des prix pour celles, qui remporteroient l'honneur, de la course. Il ne laissa iamaïs passer vn seul iour, qu'il ne nous vint visiter luy mesme en personne en nos galeres, tesmoignant de prédre vn singulier plaisir de s'entretenir avec nous, principalement, quand nous luy parliōs du salut eternel, & de nostre sainte foy. Nous arriuâmes de ceste façon en la Prouince des Pulucambis, d'où il nous restoit encore à faire quelques iournées de chemin deuant que d'arriuer au Palais du Gouverneur, qu'il voulut, que nous fisiōs par terre, pour y auoir plus de plaisir & de contentement. Il commanda qu'à cet effet on tint sept Elephâs tous prests, voulant pour plus grand hōneur, que chascun eût le sien tout seul, nous faisant de plus accompagner de cent hommes, partie de pié, partie à cheual. Or comme ce voyage se faisoit par pure recreation, nous y employâmes huit iours, receus & traitez par tout ou nous passions à la Royale: Mais particulièrement en

en la maison d'une sienne sœur, ou on nous reçeut magnifiquement dans vn banquet tres-splendide, non seulement pour la multitude & varieté tres-grande des seruices : mais encore dauantage pour les diuers assaisonnemēts, & assortissemens des viandes, les ayant fait toutes apprester à la façon de nostre Europe, encore que ny le Gouverneur, ny aucun de la maison ne fût pour en manger.

Nous voila en fin arrivez au palais, ou apres toutes ces resiouissances & bonnes cheres du voyage, nous fûmes receus avec des accueils, honneurs & traitemens, qui ne se rendoient ordinairement, qu'aux Princes & aux Rois. Nous tenant table ouuerte, & court planiere huit iours durant, & nous faisant seoir en son trosne Royal. Luy mesme, sa femme, & ses enfans nous tenans, compagnie, & mangeans, en public avec nous, avec vn tel estonnement de toute la Cour, que tous estoient communement, qu'asseurement on n'auoit iamais veu rendre tels honneurs qu'aux personnes des Rois. Ce qui donna occasion à quelques vns de dire, & cecy courût par tout le Royaume, que nous estions enfans de Rois, venus en ces pays, pour des affaires de tres-grande importance. Ce qu'ayant esté sçeu du Gouverneur, il y prist vn extreme plaisir, & dit

dit en vne assemblée publique des principaux Seigneurs de la Cour, qu'il estoit tout vray, que les Peres estoient enfans de Roys, ains qu'ils estoient Anges du Ciel venus en ces quartiers, non pour necessité aucune, ou besoin quelconque qu'ils en eussent, rien ne leur manquant en leur pays, ou ils abondoient de tout, mais simplement espoinçonnez du zele de sauuer les ames.

Et que pource qu'ils entendissent bien volontiers les Peres, qu'ils embrassassent la loy qui leur seroit par eux mōstrée, qu'ils aprissent la doctrine qu'ils leur enseigneroient & receussent la foy, qu'ils preschoient. Pource adiuſtoit il, que i'ay discouru, & traitté fort souuēt avec ces grands homes, & i'ay recogneu clairement, qu'il n'y a point de vraye loy que la leur, & qu'il n'y a point d'autre chemin, que celui qu'il nous monstrent au doigt, qui cōduise au salut eternal. C'est pourquoy prenez biē garde à ce que vous faites, car il vous faudra payer en l'autre vie dans l'Enfer, par des supplices qui ne prendront iamais fin, vostre negligēce & infidelité, si vous ne vous portez promptement à embrasser ceste veritable doctrine, que moy vostre chef & Gouverneur ie vous viens apporter par l'entremise de ces Peres. Ainsi parloit ce braue Seigneur qui en-

core

core tout gẽtil, estoit deuenũ Predicateur du S. Euangile, ce que chascun, qui l'escoutoit, admiroit d'autant plus, qu'on le tenoit par tout, pour homme de grand entendement.

Les huit premiers iours s'estant passez, nous fĩmes cognoistres que nous demeurerions bien plus volontiers dans la ville, pour estre plus à commoditẽ de prescher le Saint Euangile, ce que nous ne pouvions pas faire avec tant de facilitẽ, faisans nostre demeure dans le palais, pour ce qu'il estoit à vne lieuẽ & demie de la ville, dans la campagne à la mode du pays. Le Gouverneur nous eust bien volontiers retenu avec luy, veu la grãde affection qu'il nous portoit, & la peĩne qu'il auoit à nous quitter: toutefois preferant le bien public à son contentement particulier, il condescendit à nostre desir, & commanda incontinent qu'on nous choisit vn lieu bien commode, pour nostre demeure, dans la ville appellẽe Nouẽcman. Il adiousta de plus, qu'ayans veu son palais, qui comprend plus de cent maison, nous en choisissions vne qui fut la plus auenante pour faire nostre Eglise & que nous luy fissions sçauoir, & qu'incontinent il pouruiroit à ce qui seroit de besoin. Nous le remerciãmes bien humblement de toutes les faueurs qu'il nous auoit faites

faites

faites durant le voyage, & de celles qu'il nous alloit continuant à toute heure, & apres auoir pris congé nous montâmes à l'heure sur des Elephants, & allâmes avec bonne compagnie à Nouëcman, ville qui a bien deux lieues de long, & vne & demie de large. Nous fûmes encore la receus avec toute sorte d'honneur, le Gouverneur l'ayant ainsi ordonné. Mais ne pouuant pas supporter plus long temps nostre absence, dez le iour suiuant, il nous vint visiter en personne, & s'enquerir luy mesme, si la maison, qu'on nous auoit donnée, estoit commode. Il nous dit de plus, qu'il voyoit bien que nous autres, pour estre estrangers, ne pouuions pas auoir grand argent, ny estre pourueus, de ce qui nous faisoit besoin, & qu'ainsi il se chargeoit de nous fournir de tout ce quiserait necessaire. Et pour lors fit commandement que chasque mois on nous donnast bonne somme d'argent, & que de plus tous les iours on nous apportast de la chair, du poisson, & du ris, non seulement pour nous, mais encore pour nos interpretes, & pour nos domestiques. Et non content de cela, il ne se passoit iour qu'il ne nous enuoyast tant de presents, qu'ils pouuoient suffire, sans le reste, pour nous nourrir splendidement. Pour nous honorer d'auantage, & don-

ner

ner plus de credit aupres de tous, il voulut donner vn iour l'audiance dans la cour de nostre maison, en la façon que nous auons dit se pratiquer en la Cochinchine. La se vuiderent les causes de plusieurs criminels, chascun y estant traitté selon la qualité de son crime & forfait. Et entre autres, il y en eust deux, qui furent condamnez à passer par les armes, & deuoient estre tirez à coups de fiesches. Mais pendant qu'on les lioit, nous nous interposâmes pour auoir leur grace, qu'il leur accorda aussitost, & commanda qu'on les desliast sur l'heure: Protestant hautement que pour rien du monde, il n'eust accordé ceste faueur. Mais à ces saints personages, disoit-il, qui enseignent le vray chemin du salut des ames, ie ne leur dois rien refuser. Le n'attens que l'heure poursuiuit-il, que dégagé de quelques affaires, qui me pressent à present, ie puisse moy-mesme, estant baptisé, receuoir ceste sainte loy, dont ils font profession, & vous tous deuez faire le mesme, si vous me voulez faire plaisir.

Puis retourné, qu'il fut à nous, il nous pressoit de prendre nostre resolution pour le lieu, que nous trouuerions propre pour vne Eglise, à celle fin de pouuoir donner ordre a ce qui seroit de besoin pour la mettre bien

toft sus pié, & en estat d'y pouuoir seruir Dieu. Nous luy fimes voir vn endroit qui sembloit estre tres-propre & commode à ce dessein. Et luy mesme l'approuuant, il part de ce pas, pour s'en aller en son palais hors la ville. A peine trois iours s'estoient-ils escoulez qu'on nous vint dire que desia nostre Eglise nous venoit. A ceste nouuelle ravis d'aïse, & de contentement nous sortîmes hors de la maison, pleins de desir de voir ceste nouveauté, & comment se pouuoit faire qu'une Eglise vint à nous. Car bien que nous sceussions qu'elle deuoit estre de planches de bois, selon le deuis qui en auoir esté fait, si scauions nous aussi d'ailleurs qu'il failloit que l'edifice fut fort grand, & haut, ayant à estre posé sur de hautes, & grosses colonnes. Incontinent nous descourûmes dans la campagne vne armée de plus de mille homme, qui venoient chargez des pieces de nostre Eglise. Chascune des colonnes estoit portée par trente hommes des plus forts, & plus dispots, les autres portoient les poutres, d'autres les panneaux, qu'on y deuoit enchasser, ceux cy les chapiteaux, ceux la les bases, qui vne chose, qui l'autre, & tous en belle ordonnance, s'en viennent dans nostre maison chargez chascun de sa piece. Nostre cour se trouua remplie de tous ces gens
la,

la , que nous receuions avec la ioye que ie laisse à penser. Vne chose seule nous pouuoit mettre en peine, qui estoit de ne pouuoir trouuer dans la maison, de quoy donner pour le moins vn peu de collation , à ce grand nombre de personnes, qui bien qu'ils feussent bien payez du Gouverneur , si nous faisoit-il mal cependant, & sembloit peu honeste de les laisser aller, s'as leur preséter quelque rafraichissement. Mais nous fûmes bien tost deliurez de ce soin , quand nous vîmes que chascun s'estant assis sur sa charge, qu'on leur auoit bien recommandé de garder, & de s'en tenir prés, tira de sa besace tout sô petit menage, son pot, de la chair, du ris & du poisson, & se mit à faire du feu, & cuisiner eux memes tout doucement, sans bruit, & sans rien demander. Quand ils eurent mangé leur petit fait, vint vn maistre entrepreneur, qui prenant son cordeau, & mesurant le lieu compassa tous ces espaces, & entre-deux des colonnes, puis appellant à soy , ceux qui les auoient apportées, il les leur fit dresser chascune en sa place. Et cela fait, il les alloit tous appellant les vns apres les autres, pour auoir le reste des pieces, à ce que chascun dressast celle qu'il apportoit, & s'en retournast sur l'heure. Ainsi allans tous d'ordre sans con-

fusion, & traueillans comme il falloit, toute ceste grande masse fût dressée à nostre grãd contentement, en vn seul iour. Mais soit que cela vint de la trop grande precipitation, qu'on auoit apporté à la besogne, ou de peu de soin de l'appareilleur, il se trouua qu'elle n'estoit si droite, qu'elle deuoit, & qu'elle panchoit vn peu d'vn costé. Ce qu'ayant esté rapporté au Gouverneur, il fit venir à soy l'Architecte, & luy commanda, sur peine d'auoir les iarrrets coupez, d'y remedier au plus tost, & de rappeler autant d'ouuriers qu'il en faudroit pour ce faire. L'Architecte luy obeit, & la defaisant, avec autãt, ou plus d'habilité, la remit en estat, & rendit en fort peu de temps accomplie de tous points. Nous autres remercians sa diuine bonté, de ce que tandis que les Chrestiens se portent si laschement à ce qui est de son Sainct seruice, il préd plaisir de toucher le cœur de ces gentils, & les inspirer de bastir des Eglises, avec tant de ferueur à l'honneur de sa diuine Maiesté.

Et à ce qu'on cognoisse beaucoup mieux cōbien ce braue Gouverneur prenoit nos affaires à cœur, & s'y portoit de grande affection, ie le feray voir dans vn fait particulier, avec lequel j'acheueray ce chapitre. Il y a certains vents meridionaux, & ardents, qui ont coutume

flame de s'élever & souffler continuellement, durant le mois de Juin, Juillet, & Aoust, qui rendent vne si extraordinaire chaleur, qu'ils grillent, desseichent, & rostissent tout à fait les maisons, qui sont toutes de bois, si bien que la moindre petite bluette de feu y venant à tomber, ou par inaduertence, ou autrement, le feu s'y prend aussi tost, comme a des allumettes, aussi voit on arriuer de grands incendies par tout le Royaume, durant ces trois mois. Car depuis qu'une fois le feu s'est pris à vne maison, les flammes vont gagnant en moins de rien, par toutes les autres qui luy sont en droite ligne, du costé que tire le vent, & les reduit miserablement en cendres. Pour nous garantir doncques de ce danger, d'autant que nostre maison est au beau milieu de la ville, & encore principalement, à fin qu'on sceut en quelle estime nous estions auprès du Gouverneur, il ordonna par Edict public, que toutes les maisons, qui estoient en mesme ligne que la nostre, du costé de ces vents bruslants, eussent à oster leurs toits durant ces deux mois là: Et les maisons qui furent descouvertes, estoient en si grand nombre, qu'elles occupoient du moins l'espace de deux mille d'Italie. Et cela, il le commanda, en intention; que si le feu s'attachoit à quel-

qu'une de ces maisons, il fut plus facile d'y obuiuer, auant qu'il passast iusques à nous. Ce que tous executerent bien volontiers, pour le grand honneur, & respect qu'ils luy portoient.

CHAPITRE IIII.

DE LA MORT, DV GOVVER- neur de la Prouince des Pulucambis.

NOs affaires s'alloient acheminans d'un bon pié en cette ville, & auoient de tres-bons succez. Il estoit mes-huy temps, que ce grand Dieu selon le train ordinaire de sa diuine prouidence, mit la main dans les tra-uaux qui font le contrepois, avec lequel il tient ordinairement les seruiteurs en balance. Ainsi voyons nous qu'il va leur meslant la prosperité & aduersité, en telle proportion l'une avec l'autre qu'ils n'ayent occasion, demeurans accablez sous le fais de celle cy de perdre courage, & ramper par terre, ou bien que par trop esleuez de celle la, ils s'en fassent accroire, & viennent à s'enfler d'orgueil. Et tout ainsi comme l'Eglise primitive,

ue,

ue, au temps des Saints Apostres, fut fondée sur ces deux colonnes, de la douceur des bons succez, & de l'amertume des disgraces. Aussi à il pleu à nostre bon Dieu, que ceste nouvelle Eglise de la Cochinchine, sous la conduite de ces ouuriers Apostoliques, y fut pareillement affermie. Ceste Mission eût de tres-heureux succez en ses commancemens, comme nous auons veu au second Chapitre de ceste seconde partie. Mais vn peu apres s'esleua ceste cruelle tempeste de persecution, qu'amena le manquement d'eau, & sterilité dans laquelle peu s'en fallut qu'elle ne perit entierement. A present tout paroissoit calme, & riant sous la faueur & protection du Gouverneur des Pulucambis: Et ceste nouvelle vigne toute en fleurs, nous promettoit desia des fruits tres-sauoureux; Quand il pleust à Dieu qui dispose de tout pour sa plus grande gloire, que la mort du Gouverneur suruint la dessus, laquelle comme vn rude vent de Bize, pensa tout perdre & raffler tout d'un coup tant de belles esperances. Voicy comme l'accident arriua. Ce Seigneur alloit vn iour à la chasse sur vn Elephant avec tout plein de plaisir, auquel il se laissa tellement emporter, que sans y prendre garde il courut tout vn iour dans vne grande pleine

tuë à plomb d'un cuisant Soleil. La chaleur luy donna tellement dans la teste , que dès le soir il fut saisi d'une fièvre chaude. En ayans eu l'avis nous alâmes incontinent au palais pour le visiter , mais bien d'avantage pour le baptiser si nous le voyons en danger. Nous demeurâmes deux iours avec luy , le priant instamment de se resoudre à recevoir le S. Baptême, comme par plusieurs fois il nous avoit tesmoigné de le vouloir faire , à quoy il respondit tousiours qu'il dispoisoit ses affaires à cela, sans rien resoudre. Au troisieme iour il perdit iugement, & entra en frenesie. Dieu l'ayant ainsi permis par ses iugemens secrets, & nous pouons croire, que sa diuine Majesté luy a donné le vain honneur, & gloire mondaine, dont il se monstra tousiours extrememēt desireux, pour recompense de tant de bonnes œuvres qu'il faisoit. Il continua dans ses resveries durant trois iours , iusques à ce que vaincu de la force du mal il expira sans Baptême.

Chascun peut facilement iuger de la douleur sensible que nous apporta cet accident, nous voyans dans un Royaume estranger abandonnez & priuez de tout secours humain. Mais ce qui nous perçoit le cœur plus viement, c'estoit de voir mourir deuant

uant nous sans baptême vn homme qui d'ailleurs y sembloit estre bien disposé, & par l'assistance duquel nous nous prometions, sur des esperances fort bien fondées, que nō seulement ceste prouince la, mais presque tout le Royaume seroit pour receuoir nostre sainte foy. Apres la mort de ce Gouverneur, que nous assistâmes iusques au dernier soupir, suiuirent tout plein de choses concernant leurs ceremonies, & superstitions, lesquelles si ie voulois toutes raconter par le menu, ce seroit pour n'en trouuer iamais la fin. I'en rapporteray deux ou trois, desquelles il sera aisé de coniecturer les autres, qu'ont coustume de pratiquer ces gentils, en pareils accidens.

En premier lieu comme il estoit en l'agonie, il y eust vn grand nombre de gens armez, qui ne faisoient autre chose, que tirer des coups d'estocades, & s'escrimer en l'air avec leurs timeterres, lancer des iavelots, & decharger des arquebuzes par les sales du Palais. Mais il y en auoit deux sur tous les autres, qui demeueroiēt tousiours aux costez du moribōd, dōt le principal exercice estoit de battre continuellement l'air voisin de la bouche de l'agonizant à grands coups de cimeterres. Et comme on leur eût demandé, à quoy bon tout

tout ce qu'ils faisoient les vns , & les autres: ils nous respondirent, que c'estoit pour donner l'espouuant aux malins esprits, à ce qu'ils ne fissent aucun tort à l'ame de leur gouverneur, cōme elle sortiroit du corps. Ces superstitions nous donnoient bien, à la verité, suiet de compatir à l'ignorance de ces pauvres infideles, mais non pas d'y apprehender aucun mal pour nous, comme il arriua depuis, quand le Gouverneur fut mort. Car à ceste heure la nous nous vîmes sur le point d'estre encore vne autre fois chassez de ceste Prouince des Pulucambis , comme de tout le Royaume, avec perte de tout ce que nous auions fait pour ceste Chrestienté, si pis ne nous arriuait.

La Coustume est, que quelque grand personnage venant à mourir, les Onfais, ou Prestres du payss'assemblent, pour discourir, & rechercher entr'eux, non pas la cause physique, & naturelle: mais bien la superstitieuse, & imaginaire d'une telle mort. Et apres qu'ils se sont resolus sur cela , & qu'ils ont trouué par coniectures communes quelle peut estre, aussi tost on commande, qu'on mette au feu la chose, à laquelle ils ont iugé, que se deuoit attribuer, moralement parlant, la cause de ceste mort, soit maison, meubles , homme, animal, ou autre telle chose.

Comme

Comme donc tous ces Onfais, ou Prestres, se fussent assemblez en vne grande sale, ils commencerent à discourir la dessus. Nous qui estions presents, nous ressouuenans de la persecution, qui s'estoit esleuée contre nous, pour le deffaut des pluyes. Et ne voyant pour l'heure, en ceste Prouince la, aucune nouveauté plus grande que les bons accueils, & honorables receptions que nous auoit fait le Gouverneur, nous ayant donné vne maison, basty vne Eglise dans la ville, avec plusieurs autres grandes preuves de son affection à nostre sainte foy. Nous tenions pour infaillible que nous montrans tous au doigt, ils feroient pour reietter sur nous la cause de la mort de ce Seigneur: Et en suite commander que nous fussions la bruslez tous vifs, comme aussi nostre maison, nostre Eglise, & tous nos meub'es avec nous. Nous demeurions cependant retirés dans vn coing de la sale, nous recommandans à Dieu, & nous disposans à recevoir de sa tres-sainte main, tout ce qu'il permettoit qu'on fit de nous. Quand voicy qu'un de ces Onfais, qui estoit le plus ancien d'âge, & le doyen par office, se leue tout droit, & dit à haute voix, qu'à son auis, la mort du Gouverneur ne venoit d'autre part, que d'une certaine poutre, tombée le iour d'au-

d'auparauant au palais neuf, & qu'il se tenoit d'autant plus arresté à ceste pensee. qu'ils s'aperceuoient, que tout le mal, de ce grand personnage auoit esté à la teste, avec vn euident delire, signe tres-manifeste, disoit il, du grand coup qu'il auoit receu de ceste poutre, iustement sur la teste. Il entendoit le tout par allegorie, & avec vne superstitieuse interpretation, laquelle cependant reuint tellement, & sembla si à propos aux autres Onfais, qu'ils en demurerent la, & suiuirent cet auis. Surquoy sans autre forme de procès, se leuans de leur place, ils allerent mettre le feu à ce palais qui fut tout reduit en cendres. Et nous autres remerciâmes la diuine Majesté, de ce qu'elle nous auoit tirez, & fait eschaper d'un si manifeste, & euident danger.

Quand cela fut acheué certains autres Onfais, qui font profession de nigromantie vinrent au Palais, pour accomplir vne autre superstition, selon la coustume du Pays. Les parents du defunt, tiennent à grand faueur, qu'il se rencontre quelqu'un d'eux en telle occasion qui soit saisi du malin esprit, & qui puisse discourir, & dire des nouuelles de l'estat de l'ame du trespasé. Or à cet effet on appella les Onfais nigromantiens, ausquels plusieurs demanderent à grande instance, & à l'enui l'un de

de l'autre, ceste faueur diabolique, l'ordinaire estant, qu'on l'enuie bien fort à celuy, qui l'obtient. Ces nigromanciens firent leurs cernes, employerent force coniurations de signes, & de paroles, à ce que le diable entraist dans le corps de quelques vns des parents du Gouverneur, qui estoient la en posture de supplians, mais rien ne se fit. A la fin se presenta vne sœur du Gouverneur, qu'il auoit chérie par dessus toutes les autres, pendant qu'il estoit en vie, laquelle demanda ardemment ceste faueur, Et incontinent on luy vit donner des signes euidents d'une possédée. Car ne pouuant auparauant, à raison de son âge de crepit, mettre vn pié deuant l'autre, sans baston, elle fut veüe, au grand estonnement des assistants, sauter aussi gaillardement, & avec autant de dispositiõ, comme si c'eust esté vne ieune fille, & ayant ietté son baston, elle demeura esleuée en l'air, tout le temps qu'elle eût le diable au corps, parlant par elle avec beaucoup de rage, & de fureur, accompagnant le tout de plusieurs laides grimaces, elle dit de grandes absurditez touchant le lieu, & l'estat de l'ame de son frere, & mettant fin à ces discours impertinens, le diable l'ayant quitté, elle tomba par terre, demeurant l'espace de huit iours, tellement rompue,

puë, que de pure foiblesse, & debilité, elle ne se pouuoit mouuoir. Et ce temps pendant il y auoit presse entre ses parens, & amis à la visiter, & à se coniouir avec elle, de ce qu'elle seule, entre tous les parents du defunct, auoit esté choisie, & fauorisée d'un priuilege, qui selon leur sentiment estoit si honorable, & si glorieux pour le mort.

En fin on commença de traiter des funerailles, & derniers deuoirs, qu'il falloit rendre à ce Seigneur. Et pource que, comme en l'Eglise Catholique, ceste coustume est gardée, d'honorer par vne solemnelle canonization la memoire des personages, qui se sont rendus illustres, & remarquables par la sainteté de leur vie.

Pareillement comme le diable est par tout luy mesme, & tousiours singe des choses de Dieu, pour mieux entretenir ces pauures Cochinchinois en leurs erreurs, il a introduit parmy eux vne espece de canonization : Car la coustume est, qu'on y solemnise la mort de ceux, qui au iugement de tous auront vescu en gens de bië, sans faire tort à persone, & qui auront esté curieux d'acquiescer les vertus morales. A cet effet ils leurs dedient, pour ainsi dire, des festes qu'ils celebrent avec des appareils, & magnificences tres grandes, pour immor-

mortaliser le nom de leurs morts, & en conserver la memoire à l'éternité, par l'honneur, & le culte qui leur est rendu.

De là est, que le Gouverneur des Pulucambis, ayant vescu dans la reputation publique, non seulement, en sa province, mais par tout le Royaume, à raison de tant de belles parties naturelles, dont il estoit doué, comme estant homme d'un excellent iugement, d'une incomparable prudēce, qui auoit la iustice, & l'intégrité dans le gouvernement en singulière recommandation, avec un naturel bien faisant, & porté d'inclination enuers les necessiteux. Il fut conclu par ordonnance publique, qu'il ne luy falloit aucune pompe funebre, qui sentist sa douleur, & sa tristesse comme aux autres: Mais des resiouissances, & solemnitez de festes publiques, pour donner à entendre, qu'il estoit digne d'un honneur saint & sacré, & qu'il le falloit placer au rang de leurs autres Dieux. Ceste ordonnance ainsi faite, tous tascherēt de bannir bien loing d'eux toute sorte de tristesse, & d'effuyer toutes leurs larmes, reprenans un visage gay & gracieux, tesmoignans tout plein de ioye, & de contentement. C'est pourquoy tous les parens du Gouverneur defunct, firent des banquets tres somptueux à tout le peuple, ou
on

on ne faisoit autre chose que manger, & boire depuis le matin iusques au soir. Ce n'estoient que chants, que danses, que sons d'instruments de musique, que fanfares de trompettes, & tambours.

Ces huit iours expirez le corps fut porté dans vne chaise d'argët, sous vn dais en la ville d'où il estoit natif, appelée Chifu, distante de trois iournées avec vne suite tres-grande de gens de toute sorte, & avec des tesmoignages d'une ioye & liesse incôparable. Le Palais où il estoit mort, demeura tout à fait inhabité, à ce qu'avec le temps, il se minast de soy mesme, & que les vestiges, & le resouvenir s'en estans perdus, on entendit, que la memoire de la mort du Gouverneur se devoit pareillement perdre, & enseuelir dans vn perpetuel oubly, tandis qu'il viuroit dans les esprit, & dans les bouches de tous, avec vn loz, & honneur perpetuel.

Arriuez qu'ils furent à Chifu, en vne grande plaine, separée de toute habitation, tous se mirent en deuoir de dresser vne autre Palais, autât & plus somptueux, & magnifique, qu'estoit celuy où le Gouverneur estoit mort. Et pour faire plus de parade des richesses du defunct, ils firent bastir autant de galeres, qu'il en souloit entretenir, lesquelles ils faisoient
marcher

marcher sur terre, par certains ressorts, & rouës artificielles. Ils firent faire pareillement des Elephants, & cheuaux de bois, & tout le reste de l'equipage, qu'il souloit mener avec soy, tandis qu'il estoit en vie, sans y pleindre la despense en façon du monde. Au milieu du Palais, il se leverent vn temple fort magnifique, avec vn tres-bel autel, sur lequel fut placée ceste chasse, reuestuë & couuerte si artistement, & chargée de tant de beaux hieroglyphes, emblemes, & peintures, qu'elle donnoit vn grand respect, & excitoit à ces pauvres idolatres vne superstitieuse deuotion. A mesme temps se firent durant trois iours continuels, diuers sacrifices, & ceremonies, par le ministere de cinq à six cens Onsaists tous vestus de blanc, qui employoient tout leur temps à chanter, sacrifier, & luy offrir du vin, des bœufs, & des buffles en tres-grande quantité, sans oublier diuers banquets publics, qui se faisoient, durant ces trois iours, à plus de deux mille personnes, des plus qualifiées, ayant chascun sa table selon la coustume du pays, serui de plus de deux cents plats. Apres ces trois iours, ils mirent le feu à toute ceste machine, bruslans, & le palais, & le temple avec tout son appareil, n'en reseruans rien que la chasse, & le corps du defunct, qui fut par apres

K

enseveli,

enseveli, & transporté secretement, & cachément iusques à douze fois, de sepulture en sepulture. A celle fin que le peuple demeurant tousiours incertain, & douteux du lieu, ou il auroit esté laissé la veneration envers ce nouuel Idole, en fût d'autant plus grande, & qu'il l'adorast en tous les lieux, ou il pourroit estimer que ces ossemens se retrouueroient.

Là prist fin ceste premiere ceremonie laquelle se renouuellast depuis apres quelques mois, sçauoir est selon leur façon de conter les temps, à la sepriesme Lune, avec toutes les mesmes superstitions, preparatifs & appareils que nous venons de dire. Et depuis encore quelques mois s'estant passez elle fût solemnisée pour la troisiéme fois, ce qu'ils continuerent de faire de la sorte, à diuerfes reprises durant trois ans. Le Roy ayant commandé que les trois ans du reuenu, qui se paye au Gouverneur de ceste Prouince, fût employé pour fournir aux frais, & à la despence qu'il y falloit faire. Aussi durant ce temps là, ne nomma il aucun Gouverneur, dans la persuasion, & creance, qu'ils ont tous, que l'ame du trespasé desia placée au nombre des Dieux, pouuoit conduire d'elle mesme ce Gouvernement pendant ces trois ans. En attendant,
lon

son propre fils fût déclaré vice-Gouverneur & Lieutenant de la Prouince.

Nous nous trouuâmes presents à ceste solennité, trois Peres que nous estions de la compagnie en ceste Prouince la, & combien que nous n'assistasions point à leurs superstitieuses ceremonies, si ne peûmes nous pas pourtant nous exempter, de nous trouuer à quelques banquets, de peur d'estre blâmez d'ingratitude, & d'estre estimez peu courtois. Et côme vne fois nous nous disposions pour y aller, auis nous vint, que nous serions interrogé du lieu ou se trouuoit l'ame du Gouverneur, & que nous prissions bien garde de ne pas dire, qu'elle estoit dans les peines d'enfer, que ce seroit assez pour nous faire mettre en pieces & desmêbrer tous vifs. Et de fait on ne tarda gueres, qu'on ne nous eût seruis de ceste question, à laquelle nous respondîmes, que sans Baptesme il n'y auoit personne de sauué: Mais que telle, & si grande estoit la bonté de Dieu, qu'il suffisoit d'en auoir vn desir efficace, quand on ne le pouoit auoir autrement. Et que si le Gouverneur l'auoit eu en ceste derniere heure, comme il estoit bien probable, attendu l'affection qu'il portoit à nostre Sainte Foy, ainsi que nous l'auons dit cy dessus, & que sans la violence de son mal,

il y auoit bien de l'apparence qu'il l'eust peu demander, on pouuoit croire qu'il estoit sauué, ou si non qu'il estoit damné.

Ils ne se monstrerent pas du tout mescontens de ceste response, nouvelle pour eux, & non attenduë, ains pour la plus grand part, ils en furent satis-faits, ce qu'ils tesmoignerent par l'offre qu'ils nous firent de quelques buffles entiers, bien apprestez, & rostis, du nombres de ceux qu'ils auoient immolez, à leur nouuel Idole, ie veux dire le Gouverneur decedé. Mais sur le refus que nous leur en fîmes, leurs disans, que nostre loy nous defendoit de manger de ces viandes immondes, & souillées par leurs sacrifices. A l'heure mesme, au lieu de ces buffles tuez, & sacrifiez, ils commanderent de nous en donner de tous viuans. Et outre cela les parens du Gouverneur nous enuoyerent des Elephants, pour nous en retourner aux Pulucambis, avec les mesmes honneurs que nous souliions recevoir du Gouverneur.

C'est icy ou se terminerent, & aboutirent toutes les faueurs, & courtoisies, qu'on nous renditen la consideration. Et pourtant de retour que nous fîmes en nostre maison, nous demeurâmes comme pauvres orphelins, & abandonnez de tous. Personne ne songeoit,

desia

desia plus en nous. Desia l'argent qui nous auoit esté assigné, pour nostre entretien ne se donnoit plus. Et n'ayans plus que vingt escus de reste, nous fûmes bien tost reduits, à telle misere, & necessité, que si quelqu'un de nous sût tombé malade, nous n'eussions pas mesme osé appeller le Chirurgien pour nous ouurir la veine, ne nous voyans rien de quoy le payer, Et iacoit que nous nous trouuassions parmy vn peuple, grandement porté à secourir les necessiteux, particulièrement pour le viure, comme iay desia monsté. Il n'estoit pas cependant à propos pour nous de demander chose aucune, de peur de perdre tout l'auantage, que nous auions desia gagné, pour la conuersion des ames. Car ils eussent dit que nostre venuë en ces quartiers la, n'eust pas esté pour annoncer la loy de IESVS-CHRIST mais pour mandier du secours à nos necessités, sous la faueur du Gouverneur. Personne ne venoit desia plus en nostre maison, nostre credit nous ayant manqué tout d'un coup. Et tout ce que nous auions desia auancé dans la langue Cochinoise, ne nous seruoit de rië, ceux du pays ne tenans aucun conte de trois pauvres hommes, qui estoient seuls au beau milieu de l'Idolatrie. Dauantage ils mesprisoient la

doctrine que nous leurs preschions, comme vne chose nouuelle par nous controuuée, pour renuerfer celle qu'ils professoient, & destruire leurs sectes anciennes.

Trois ans se passerent de la sorte, pendant lesquels nous ne ressentions pas si viuement le defaut de toutes sortes de commoditez, pour l'entretien de nostre corps, qui eust à souffrir des extremitez, que Dieu sçait, comme ils nous estoit fascheux de nous voir entierement décheus des belles esperâces, que nous auions prises, de pouuoir auâcer de beaucoup le nom, & la gloire de Dieu, parmy ces infidelles, & melcreânts, n'ayans peu durant ces troisans, en conuertir que fort peu, & encore avec des peines & des trauaux indicibles

Voyant donc le train que prenoient nos affaires, nous entrâmes en quelque defiance, iugeans, que le temps destiné par sa diuine bonté, pour retirer ces peuples de leurs tenebres, ne seroit pas encore arriué, soit que nos pechez y apportassent quelque obstacle, soit pour quelques autres considerations à nous incognûes. Mais lors que nostre fragilité nous faisoit auoir moins de confiance en Dieu, voila que tout à propos pour nous donner de la confusion, sa diuine Majesté, fit esclatter sur nous les merueilles de sa toute
puissan-

puissante misericorde, à fin de nous apprendre que ceste œuvre heroïque, & ceste noble entreprise de la conuersion des ames, depend entierement de luy, & que nous soyons obligez d'auoüer, que sans luy nous n'auons aucune force pour y auancer tant soit peu, la pratique nous manifestant que *Neque qui plantat est aliquid, neque qui rigat: sed qui incrementum dat Deus*, peu sert aux hommes de planter & d'arrouser vn verger pour Dieu, s'il ne luy plaist de le faire croistre, & profiter, comme il se verra par le chapitre suiuant.

CHAPITRE V.

COMME DIEU OUVRIST LA porte à la Chrestienté en la Prouince des Pulucambis, par le moyen des personnes les plus illustres de ce pays.

NOUS voyant reduits à ce point, dans la Prouince des Pulucambis, qu'il y auoit peu d'esperance de nous y pouuoir entretenir, & d'y auancer beaucoup pour le salut, & conuersion des ames. Nostre dessein fût d'en sortir, & de nous departir en diuers endroits. Le P. François de Pina, s'en alla de-

meurer à Faifo ville du Japon, comme nous auons dit, en intention, tant de s'y employer au seruice de ces Chrestiens, qu'il auoit desia gouuernez, comme Pasteur, que pour y estre entretenu de leurs aumosnes. Et comme il sçauoit fort bien la langue Cochinchinoise, & la parloit fort naturellement, il ne desista iamais d'y annoncer nostre sainte foy. Le P. François Buzome partit aussi pour aller deuers Turon, prenant avec soy nostre meilleur truchement, pour essayer s'il ne pourroit point auoir quelques aumosnes des Portugais, desquelles nous nous peussions entretenir pour le moins tous deux dans nostre maison de Nouëctman, en attendant qu'il nous vint quelque secours de Macao.

I'estois donc demeuré avec les Pulucambis autât seul, & sans compagnō, cōme affligé, & desconforté de me voir sans aucune esperance du salut de ces pauures ames, & conuersion de ces gentils. Quand voici qu'un iour, estant en nostre maison, comme i'y pensois le moins, ie vois à nostre porte vn bon nombre d'Elephants, avec plusieurs Dames, & vne grande suite de Gentils-hommes, apres lesquels venoit vne grāde Dame richemēt vestuë, & plus chargée que couuerte de ioyaux, & pierreries à la mode du pays. Je demeuray tout esmerueillé

ueillé à la nouveauté de ce rencontre, & tout
estonné de la majesté de ceste Dame, & surpris
que i'estois, ne sçauois que peler de ceste visite
extraordinaire. En fin estât sorti pour la rece-
voir, i'appris que c'estoit la femme de l'Amb-
assadeur, que le Roy de la Cochinchine en-
uoyoit au Roy de Cambogia: Son mari estoit
natif de Nouëcman, ou nous demeurions, & le
premier homme de la ville apres le Gouuer-
neur, lequel pour lors estoit en Cour à Sinuua
traittant des affaires de son Ambassade. Or
apres les honeurs, & compliments rendus à
la façon du pays, ceste Dame n'ayant point de
temps à perdre en des choses, qui ne faisoient
au sujet de sa venuë, Venons ce dit elle, à ce
qui m'ameine icy. Mon Pere, i'ay sçeu vostre
arriuée en nostre pays, & Prouince, & appris
l'occasion, qui vous fait entreprendre vn si
long voyage. Je vois que vous tenez vne for-
me de vie, toute saincte, & sans reproche, ie
sçay que vous preschez, & enseignez le vray
Dieu. Et pource que ie m'apperçois fort bien,
que tout ce que vous dites, est fort conforme
à la raison, ie me persuade aussi que vostre
loy, est la seule vraye loy, & qu'il n'y en a
point d'autre: que vostre Dieu est le seul, qui
doit estre adoré, & qu'il n'y a point d'autre
chemin qui conduise à la vie eternelle que
celuy

celuy que vous nous monstrez, C'est pourquoy ie ne viens point icy pour autre consideration, que pour demander de tout mon cœur, que vous me veüieilliez lauer de vos saintes eaux, & me mettre au nombre des Chrestiens. Voila le seul motif de ma venue vers vous, voila ce qui me reste pour le parfait accôplissement de mes desirs. A cela ie luy dis premierement que ie loüois vne si bonne, & si sainte resolution, l'exhortant de rendre à Dieu les remerciemens, & actions de graces qui luy estoient deuës pour vn si grand, & signalé benefice, que de l'auoir appellée à la cognoissance de nostre sainte foy, d'autant qu'il n'y auoit chose aucune en ce monde, qui fût plus considerable, & de plus grande importance, que le salut de nostre ame. Je m'excusay par apres, de ce que ie ne pouuois luy accorder si promptement vne requeste si sainte, & si iuste, que celle, qu'elle m'auoit proposée, pource qu'encore bien que i'eusse quelque cognoissance de la langue Cochinchinoise, ie n'en sçauois pas cependant assez pour la pouuoir instruire comme il falloit des hauts, & souuerains mysteres de nostre Religion Chrestienne, & qu'ainsi, ie conseillois à son Excellence, de vouloir patienter iusques au retour du P. Buzome, qui reuiendrait en
bref

bref de Turon, & rameneroit avec foy le meilleur interprete, que nous eussions, au moyen duquel, elle seroit tres-bien instruite de tout ce qu'il falloit sçauoir, & qui luy donneroit toute la satisfaction que meritoient ses bons, & saints desirs. Le grand feu, & ardent desir, repliqua elle, qui m'embrase le cœur ne peut pas souffrir vn si long delay, veu principalement, que i'attend d'heure à autre l'Ambassadeur mon mary, qui vient, de la Cour, & qu'il faut, qu'à son arriué ie m'embarque promptement pour aller avec luy au Royaume de Cambogia. Vous sçaez les dangers qu'il y a sur mer, & qn'à toute heure on y court fortune de se perdre. Ainsi il se pourra faire, que quelque tempeste s'esleuant sur mer, ie demeure enseuelie dans les eaux, perduë pour vne eternité. Ioint, me disoit elle, qu'il suffist pour me faire entendre les choses de Dieu, que vous m'en parliez, comme vous faites des autres, veu que i'entens assez bien tout ce que vous me dites. Ie me sentis obligé apres tant de demonstratiōs, & tesmoignages qu'elle me donnoit de son enflammé desir, & saintes resolutions, de commencer à l'instruire au mieux, qu'il me seroit possible, & de luy donner quelque cognoissancedes principaux mysteres de nostre sainte foy. Il pleust
à Dieu

à Dieu de nous enuoyer bien tost apres le P. Buzome, qui demeura bien consolé de ce bon & heureux rencontre, ne cessant d'en rendre des actiōs de graces à sa diuine bonté. L'Am-
bassadrice en fut encore plus ioyeuse, voyant en sa compagnie, le truchement qu'elle atten-
doit, avec tant de passion. Car par sō moyen, & la tres-grande assiduité, diligence, & at-
tention qu'elle apportoit à ouïr le Catechis-
me, deux heures le matin, & deux heures l'a-
pres-diné, elle aprit dans quinze iours plus
que suffisamment la doctrine de nostre sainte
loy. ce qui luy toucha le plus le cœur, de tou-
tes les choses qu'on luy apprist, fût la co-
gnoissance, qu'on luy donna du mystere de
l'Incarnation, d'vn IESVS-CHRIST vray fils
de Dieu, fait homme pour l'amour de l'hom-
me. D'où vient que pour imiter en quelque
façon, ceste grande humilité du fils de Dieu,
elle venoit en nostre maison esloignée de
la sienne, d'une bonne demie lieuë, non
seulement sans tout cet attirail d'Elephants,
& autre suite, qu'elle traînoit ordinairement
apres soy: mais nuds piez à trauers la fan-
ge, & les caillous. Obligeans encore par son
exemple ses dames, & ses courtisans, à imiter
sa grande deuotion.

Quand dans les discours spirituels, & en
expli-

expliquant le catechisme, on fut venu à parler le l'Enfer, expliquer ses tourments, représenter au vif la durée de l'éternité, & la diuersité des peines, qu'on y souffroit, l'horrible compagnie des demons, l'obscurité de ces tenebreux cachots, & cauernes inhabitables, & finalement le tourment du feu. Elle, & ses dames demeurerent, tellement esperduës, que n'ayant pensé toute la nuict à autre chose, qu'à ce qu'elles auoient ouy de ces tourments éternels, le lendemain pleines d'effroy elles reuinrent, disant qu'elles vouloient toutes se rendre Chrestiennes, pour euader ces prisons, & supplices qui ne deuoient jamais prendre fin. Mais comme nous leur eûmes respondu, que cela ne se pouuoit, estants cōme elles estoient compagnes, & concubines de l'Ambassadeur, suiuant la coustume du pays que nous auons déclaré en la premiere partie de ce narré. L'Ambassadrice dit aussi tost, ie n'ay donc pas cet empeschement. Il est vray, luy dîmes nous, n'y ayant que vostre Excellence, qui soit vrayemet femme de Monsieur l'Ambassadeur, vostre mary, c'est pourquoy rien ne vous empesche pour le present d'estre baptisée. A ceste nouuelle leuant les mains vers le Ciel elle donna de si grands signes de ioye, & de resiouyssance qu'on eust dit qu'elle estoit

estoit hors de son bon sens, quoy que iamais elle n'eust esté plus à soy, qu'à ceste heure laquelle telmoignoit par excez le grand plaisir & contentemēt, que luy apportoit la nouuelle d'une chose, qui est la seule, qui deuroit dōner de la ioye aux hōmes. Au cōtraire ces dames plongées dans le desplaisir, de se voir hors du chemin de leur salut, crioient tout haut, que l'Ambassadeur ne les auroit plus pour Concubines, puisque cela les empeschoit d'estre Baptisées. & menoit tout droit à leur grand dommage, à la damnation eternelle: leur maistresse les fortifia grandement en leur bon propos, prenant sur soy la charge de les tirer de leurs pechez, & promettant de leur trouver à chascun vn mary. Ainsi ces empeschemens, & destourbiers estans ostez par la promesse de l'Ambassadrice, & la resolution ou estoient les autres de ne plus retomber dans leur péché, vn iour qui fut pour moy le plus beau que ie vis iamais de ma vie; Elles viennent toutes, avec vne fort belle grace, & vne rare modestie, admirablement bien vestuës de leurs plus beaux habits, & parées de leurs plus riches atours, & pierreries, accōpagnées d'une longue suite de braue, & leste noblesse, & entrèrent dans nostre Eglise de Nouëcan, ou Madame l'Ambassadrice, qui comme
la

la premiere, & Maistresse de routes les autres prist le nom d'Vrsule, fut Baptisée avec vingt cinq autres à la grande gloire de Dieu, & de nostre Seigneur I E S U S- C H R I S T, qui avec ce peu de Dames, ouurit la porte au Chriſtianisme en nostre mission de la Cochinchine.

Le Baptisme estant fait, nous allâmes en procession iusques au palais de l'Ambassadrice Vrsule, qui y auoit vn fort bel oratoire, ou se faisoient auparauant ses superstitieuses deuotions à vn Idole. Y estans entrez, toute la premiere chose que nous fîmes, fut de ietter de l'eau beniste par toute la chambre, & apres cest noble Dame, avec ses suiuanes, prist l'Idole, qui estoit la niché, & le iettant par terre d'un courage extra-ordinaire, elles vous le mirent en pieces, & le foulerent aux piez, nous mîmes en sa place vne belle image du Sauueur du monde, que ces nouuelles & deuotes Chrestiennes adorerent avec tout plein de sentiment de deuotions, humblement prosternées, s'auoians toutes pour ses tres fideles, & deuotes seruantes. Apres ces devoirs rendus avec toute sorte de reuerence, & soumission, elles se mirent au col des Agnus Dei, des Croix, medailles, & reliquaires, dont elles faisoient plus de cas, que de toutes leur chaines d'or, cordons de perles, &

& enseignes de diamants. Apres ceste victoire remportée sur les demons, ayants dit les litanies, & autres oraisons dās cet Oratoire, ainsi repurgé, & sanctifié, nous retournāmes à nostre maison le P. Buzome, & moy avec les consolations, & actions de graces à nostre bon Dieu, que chascun se peut aisement imaginer. Ceste Dame, & tous les siens ne manquerent pas du depuis, de venir tous les iours en nostre Eglise entendre la messe, ouir le Catechisme, & assister à tous les autres exercices de deuotion, ou elle tesmoigna tousiours tout plein de zele, de ferueur, & de pieté Chrestienne.

Bien tost apres l'Ambassadeur son mary arriue de la Gour, en dessein de partir incontinent pour son ambassade vers le Roy de Cambogia. Et comme c'est la coustume de ce pays, que le chef de la famille, ou maistre de la maison, venant de loing, sa femme, ses enfans, & autres de ses domestiques, aillent au deuant de luy, pour le moins vne demie lieuë dans le chemin. Vrsule manqua à ce deuoir, se tenant pour lors retirée à ses deuotions dans son oratoire. Son mari bien estonné ne sçachant que penser de ceste nouveauté, se craignant qu'elle ne fut peut estre malade, demanda comme sa femme se portoit, & comme on luy eust respondu, que sa santé estoit

estoit fort bonne, il en demeura encore plus esmerueillé que deuant, mais bien dauantage, quand arriué qu'il fut à la porte de son Palais, il ne la vit point se presenter, pour luy rendre les honneurs, & deuoirs accoustumez dans leurs compliments. Il se pensa donc qu'il y auroit quelque chose, & que sa femme pouroit bien estre en cholere contre luy. Surquoy il s'en va en fin à sa chambre, & à son Oratoire, ou il trouua Vrsule & ses autres dames, parées de medailles, & Agnus Dei, tenans des Chapelets en main, avec plusieurs autres marques de la religion qu'elles auoient embrassée, & toutes en oraison deuant l'image de nostre Sauueur. Qui fut bien estonné de voir tout cela, ce fut l'Ambassadeur, auquel la femme dit, prenant la parole, qu'il ne s'esmerueillast pas, si elle auoit manqué à luy rendre les deuoirs, & honneurs ordinaire à son arriuée, d'autant qu'il la trouuoit en vn bien plus haut degré d'honneur, qu'auparauant, qu'elle & toutes ses suiuanes estoient deuenues filles du vray Dieu, & Sauueur du monde, dont en mesme temps elle luy en monstra l'Image à son Oratoire, luy disant que c'estoit celuy qu'il deuoit luy mesme adorer, s'il desiroit s'esgaler à elle en dignité. L'ambassadeur esmeu des paroles

L

de

de sa femme, & tout ensemble de la beauté de l'image, prosterné qu'il se fut par terre, l'adora les larmes aux yeux. Puis se relevant, il se tourna deuers sa femme, & vers ses dames, & leur dit, Est il bien possible que vous soyiez Chrestiennes vous autres? Quoy me voudriez vous bien laisser? Ne scauez vous pas que selon la loy, que preschent les Peres, il n'est pas permis d'auoir plusieurs femmes, & qu'il faudra necessairemēt, ou que vous vous trouviez vn autre retraite, ou bien que vous laissant ceans dedans, ie me pouruoye d'une autre maison. A cela Vrsule respondit, il ne sera pas besoin que vous sortiez d'icy, ny a nous autres de vous laisser, pource qu'il y a moyen de tout accorder, & de contenter tout le monde. Esquiuant pour lors, par vne prudence tout à fait cœleste, de luy descouurir la defence, qui est en la Religion Chrestienne d'auoir plusieurs femmes ensemble, y ayant bien à craindre qu'elle n'eust tout gasté, luy declarant trop-tost vne chose si rude, & difficile. A ces parolles l'Ambassadeur prist courage, & s'imaginant sur l'heure, que possible il ne luy faudroit pas abandonner ses femmes, ainsi saintement trompé, il leur dit qu'aussi vouloit il estre Chrestien, & suiure la bonne resolution qu'elles, & ses dames auoiēt prise.

Le

Le lendemain de fort bonne heure, il s'en vint en nostre maison, & nous dit, que puis que nous auions fait sa femme Chrestienne, il auoit aussi envie d'embrasser la mesme loy, si nous iugions que la chose fut faisable. Tres-faisable luy respondîmes nous, comblez de ioye, & de contentement, à vne si agreable requeste, & que quand il se seroit resolu, nous luy donnerions vne suffisante cognoissance, de ce qui seroit necessaire pour son baptesme. Il se contenta de cela, & pour autant que diuers affaires, qui le tenoient occupé sur iour, à raison de son ambassade, nous empeschoient de traiter avec luy si commodement. Nous prîmes resolution, à la priere qu'il nous en fit de l'aller trouuer de nuict en sa maison, ou nous commençâmes à le catechiser, ce que nous continuâmes l'espace d'une vingtaine de nuicts, y employans quatre ou cinq heures à chasque fois, l'informant des mysteres de nostre foy, depuis la creation du monde, iusques à l'Incarnation du fils de Dieu, & Redemptiõ du genre humain, de la gloire du Paradis, & des peines d'Enfer. Au demeurant ce n'estoit pas peu, qu'un homme de sa qualite, & tellement occupé retranchast, tant d'heures de son sommeil, pour ouir parler des choses de Dieu, & de son salut, y appliquant tout à fait son es-

prit, & nous proposant plusieurs doutes, & questions subriles, qui faisoient assez cognoistre la bonté, & grande capacité de son esprit.

En tous nos discours nostre principal but estoit d'imprimer bié auant dans l'esprit de ce seigneur la verité de nostre sainte loy, & de luy faire voir la conformité, qu'elle à avec la raison naturelle. A ce qu'estât rendu capables d'apprehender l'importance de son salut, & la gratuité des peines d'Enfer, & restant bien affectionné, & affermi en la certitude de nostre sainte Religion, il trouuaist par apres moins de difficulté dans le point, qui le traualloit le plus, de la polygamie, ou multitude de femmes, que tout à dessein nous raisions iusques à l'extremité. En fin ayans gagné ce que nous pretendions le plus, & que nous posions comme pour fondement de la conuersion de ce grâd, & noble persónage, nous passâmes à l'explication des commandements de Dieu, ou nous luy fîmes entendre, qu'entre les Chrestiens, il n'estoit nullement permis d'auoir plusieurs femmes.

A ceste proposition si peu attenduë, l'Ambassadeur demeura froid comme marbre, & sa premiere ferueur s'esteignit tout à coup, comme qui ietteroit beaucoup d'eau sur vn fort peu de feu. De façon que nous congediant

diant pour lors; il nous dit que cest affaire n'estoit pas de petite importance, & qu'il meritoit bien qu'on prist du temps, pour y penser meurement. Ceste responce nous donna bien auant dans le cœur, & n'en sçauions que penser, si bien que retirez que nous fûmes en nostre maison, nous employâmes le reste de ceste nuit la, en oraisons, penitences, & choses semblables, supplians sa diuine Majesté de la plus grande ferueur, & avec les plus chauds desirs, qu'il nous fut possible de vouloir benir & donner bonne issue à l'œuure que sa diuine Bonté auoit encommencé. Le matin du iour suiuant vint à nous vn Onfai, des plus capables de la ville, que l'Ambassadeur nous enuoyoit, pour examiner les raisons, que nous auions de defendre la pluralité des femmes. Or entre autres raisons que celuy cy mettoit en auant, pour le party contraire, il pressoit fort, & faisoit grande instance sur celle cy, comme la plus forte à son auis, à sçauoir qu'il ne voyoit pas comme la multitude des femmes leur pouuoit estre deniée, la propagation du genre humain, & la naissance des enfans estant chose si parfaite, & si conforme à la nature: Et que sur tout, cas aduenant qu'un mary eût rencontré vne femme sterile, ainsi comme l'Ambassadeur, qu'il y auoit peu d'apparen-

parence, de luy en refuser vne autre, de laquelle il peut auoir lignée. Il nous fut aisé de luy répondre en bonne Theologie, ou on ne manque pas de bonnes solutions à ceste difficulté: mais voyant qu'ils ne s'en tenoient pas si satisfait pour n'estre accoustuméz aux intriques d'une escole; nous le payâmes en dernière lieu d'une certaine raison, que nous tirions de la Sainte Elcriture, dont nous auions desia donné quelque connoissance à l'Ambassadeur, laquelle il pleut à Dieu luy imprimer si auant dans son esprit, qu'il en demeura tout à fait conuaincu, par l'assistance du Sainct Esprit qui fut de luy ramenteuoir, que nostre Dieu estant si iuste, & la loy qu'il auoit donnée si conforme à la raison naturelle, comme luy mesme l'auoit congneu & confessé, il deuoit sans aucun doute obeir aussi en cela, à ce mesme Dieu. Et ce d'autât plus que sa diuine Majesté, en la création de l'homme, donna deslors à entendre que cela estoit très conuenable, lors que la propagation du genre humain estoit plus nécessaire, veu qu'il ne donna à Adam qu'une seule femme, luy en ayant peu donner aussi aisement plusieurs, à ce que les hommes se multipliasent plus promptement. Ceste raison contentoit tout à fait l'esprit de l'Ambassadeur,

sadeur, si ne laissoit il pas avec tout cela, d'auoir bien de la peine à se resoudre, à l'obseruance de ce commandement qui l'importunoit fort. N'y auroit il point, adiousta, il quelque remede à cela soit par dispense du souverain Pontife, soit en quelque autre maniere: car il n'y aura rien que tres-volontiers ie ne face, pour tres-malaisé qu'il puisse estre. A quoy nous luy respondîmes qu'en vain le trauailleroit l'esprit, celuy la qui voudroit chercher quelque expedient à cet affaire. Et pourtant s'il auoit envie de se sauuer, qu'il luy seroit entierement necessaire de congédier toutes ces concubines, & demeurer avec sa femme legitime. Alors ce bon seigneur leuant les yeux, & les mains vers le Ciel, & comme se faisant force & violéce à soy mesme par vne genereuse resolution, il se prist à dire, cōtraint par la verité cogneuë. Puis dōc que la pluralité des femmes, ne peut subsister avec mon salut, qu'elles s'en aillent toutes à la bonne heure: Car ce seroit vne grande folie à moy, de vouloir faire perte, d'vne eternité de gloire dans le Ciel, à l'appetit de quelque mal-heureux plaisirs, & contentemens passagers. Parquoy se tournant deuers ses concubines, qui estoient la presentes avec Ursule la vraye femme, il les cōgedia toutes.

Mais s'apperceuât, qu'elles se prenoient à rire du congé qu'il leur donnoit, comme d'une chose qu'il ne pourroit iamais garder, pour monstrier qu'il parloit tout à bon & du meilleur de son cœur, il commanda à sa femme de les payer toutes sur l'heure, & que dez le soir mesme il ne s'en trouuast pas vne dans la maison. Puis s'adressant à nous, me voila tout prest, nous dit il, mes Peres, à faire ce que vous me commanderez. Apres que nous eûmes vne si louhaitée resolution, nous nous en retournâmes bien ioyeux au logis, pour en rendre les actions de graces, qui estoient déües à Dieu.

Mais voila incontinent le diable, qui se met à faire des siènes, pour arrester ce bon dessein se seruant de la tendresse feminine d'Vrtule; qui n'a pas le courage, ny la resolution de chasser d'aupres de soy, celles qu'elles a esleuées avec tant de loin, dez leur plus tendre ieunesse, qu'elle à tousiours aussi chèrement affectionnées, que ses propres filles. Ainsi le mary, & la femme sont en different, l'un presse qu'elles sortent, & au plustost, l'autre fait instance, pour les retenir avec soy. Surquoy l'Ambassadeur tout fasché, s'en vient à nous, pour se mettre dans son bon droit, & faire en sorte, que puis qu'il ne tenoit plus à luy, que
ces

ces femmes ne sortissent de sa maison, que l'empeschement estant osté, le Baptisme luy fût donné. Nous estions pour mettre la dernière main, à ce bonne œuure, voyants que son discours estoit fort raisonnable, & principalement nous faisant entendre, qu'elles ne demeueroient plus dans sa maison, comme concubines, mais comme suiuanes de sa femme. Quand ie bon Seigneur, apres s'estre arresté quelque temps, comme tout pensif, nous dit à la fin, qu'il nous vouloit proposer vn doute. Estant vray, nous dit-il, mes bons Peres, comme ie le crois, ce que vous m'auiez enseigné, que Dieu va sondant iusques au plus profond du cœur des hommes, & qu'il ne peut estre trompé : Encore que mon desir ne soit autre que de laisser, & d'enuoyer de ma maison ces femmes, cependant ie vois fort bien, qu'elles y demeurant, ie suis en danger, & à railon de ma mauuaise habitude contractée de longue main, & de la fragilité de ma nature, de tomber de nouveau dans le peché. Et ainü il ne me semble pas, que j'aïlle en cét affaire, avec toute la sincerité qu'il faudroit. Nous autres voyans bien en ce discours sage, & Chrestien de l'Ambassadeur, l'occasion prochaine de pecher qu'il preuoyoit nous nous mettions en peine de songer, & trouver

trouver quelque bon expedient , pour leuer vne si puissante barriere : mais ne s'en offrant point à l'heure qui fut de saison , luy mesme , à qui l'affaire touchoit de plus pres , nous en proposa vn que nous prîmes comme le meilleur de tous. Mes Peres, nous dit-il, le meilleur, & plus assésuré moyen, que ie voye en cecy, est, que vous autres, comme nos Maistres, vous persuadiez efficacement à celles de ces concubines, qui sont Chrestiennes, car quant aux payennes , ie feray que ma femme les chassera sans mercy, que si d'auenture il m'arriuoit par ma fragilité, d'estre surpris de quelque tentation, elles me resistent fortement, ou plustost , qu'elles couchent dans nostre Oratoire. Car cela estant, l'honneur, & le respect que ie porte à l'image de nostre Sauueur, m'obligera à aimer mieux, qu'on me mette en pieces, que de me laisser aller a aucune lascheté, en presence de ce grand Seigneur. Et elles vivront en assurance, iusques à ce que l'occasiõ de les marier se presente, & ie feray publier, que ie ne les tiens pas dans ma maison en qualité de concubines, mais de dames d'honneur de ma femme Vrsule , & toute la ville scaura, que ie ne transgresse point la loy que Dieu me commande. Ce moyé fut trouué si a propos que rien plus, & fut mis aussi tost

toſt en exacution. Vn iour apres, noſtre Ambaſſadeur bien accompagné, richement veſtu, & en tres-bonne cõche, au ſon des tambours, fifres, & autres inſtrumens avec tres-grande alegreſſe, fut Baptiſé en noſtre Eglise, & avec luy autres vingt Gentils-hommes de marque, ſes plus grands amis. Et euſt le nom de noſtre Pere Saint Ignace. Puis ayant pris la femme Viſule par la main, ils renouvelerent leur ancien contract de Mariage, en forme de Sacrement, comme le demande l'Eglise. On ne ſçauroit bien exprimer la double ioye qu'apporta à chaſcun ce Baptême, & ces nouvelles Noces.

Ces Feſtes furent ſuiuies du depart de l'Ambaſſadeur Ignace pour Cambogia, lequel commanda, qu'on eſlevaſt dãs ſon principal nauire vn bel eſtendart, ou ſeroit vne tres-belle Croix, & l'Image du glorieux Pere S. Ignace ſon Protecteur, y faiſant de ſurplus adiouſter pluſieurs enſeignes, guidons, & autres deviſes, qui faiſoiēt aſſez paroître la Religion qu'il profeſſoit. Tous les Caualliers, & Dames Chreſtiennes ſ'eſtans ainſi embarquez firent vn heureux voyage de Nouëcmã à Cambogia. A la veuë de ceſte flotte qu'on cogneuſt bien eſtre celle de l'Ambaſſadeur, ceux de Cambogia demeurerent bien eſtonnez,

nez, voyans les estédarts, & enseignes Chrestiennes dans ce nauire, & se persuaderēt aussi tost, que le Roy de la Cochinchine, au lieu de son Ambassadeur ordinaire, en auroit enuoyé quelque extraordinaire, Portugais de nation & Chrestien. Mais bien tost apres ils se virent esclaircis de leur doute, quand au desambarquement ils s'apperceurent del' Ambassadeur ordinaire, qui portoit à son col des croix, medailles, & autres deuotions avec les chaines d'or, & autres pretieux ioyaux. A cet agreable spectacle, on ouit d'vn costé des voix de ioye, & de louanges, que rendoient à Dieu les Chrestiens tant Portugais que Iaponois, que leur trafic arrestent là ordinairement, se monstrans infiniment consolez, de voir ce nouveau fruit de la Cochinchine : de l'autre on n'entendoit qu'estonnement des Gentils, qui ne se pouuoient persuader, que l'Ambassadeur recogneu auparauant pour vn homme vain, superbe, & lascif, eût embrassé la loy Chrestienne, qui a la deshonesteté en si grande horreur. Mais bien tost apres, il leur fit bien voir ce que peut la grace du saint Esprit dans vne ame, pour fortifier la foiblesse humaine. Car si bien l'ambassadeur tenoit dans le Palais de Cambogia autant de cōcubines, que sa femme auoit de suivantes, il comman-

da

da sur le champ, qu'on les licentiaſt toutes, ſans que meſme il les daignaſt regarder. C'eſt pourquoy il gaigna incontinent par tout ce Royaume la reputation de tres grande vertu, & ſaincteté. Cet exemple au reſte en vn homme tellement eſtimé, & en telle opinion d'homme capable, & fort entendu dans les affaires, ſir que pluſieurs des plus doctes, & lettréz de la Prouince des Palucambis receurent le S. Baptême.

CHAPITRE VI.

COMME DIEU OUVRIſT VNE

ſecõde porte au Chriſtianisme, par le moyẽ des perſonnes doctes, de ceſte gentilité.

DE ceſte fontaine inepuiſable de miſericorde, & enflammé deſir, qu'à noſtre grand Dieu, du ſalut des ames de tous les hommes, naiſſent diuers moyens proportionnez aux eſtats differents des perſonnes, qui ſont tous autant de chemins, par leſquels, il adreſſe, & conduit les hommes à la fin pour laquelle, il les a créez. C'eſt pourquoy nous voyons qu'il appella ſon peuple immédiatement par ſoy meſme, & ſ'accommodant aux
inclina-

inclinations des personnes, il inuita les Mages, par l'entremise des estorilles, vn Denis Areopagite Astronome, fût conuertí, au moyen d'vne prodigieuse Eclipsé: Vn Augustin, luy faisant voir clair dans les veritez de nostre sainte foy, & remarquer les confusions, & horreurs des faussetez du Paganisme. Et enfin, il fait venir à soy le peuple ignorant, & grossier par les prodiges & miracles.

Ainsi est-il arriué en ceste nouuelle Eglise de la Cochinchine: Car après que sa diuine Majesté, en eust appellé des plus qualifiez par elle mesme, comme nous auons veu, il appella consequemment entre les doctes du pays des habiles & sçauans Philosophes, & Mathematiciens à l'occasion de quelques Eclipses, comme il se dira en ce chap. Puis des Onfais, ou Prestres fort obstinez en leurs erreurs, qu'il retira de leur fausse opinion, en leur donnant la cognoissance de la vraye foy, comme il se verra au chapitre suiuant. Et finalement en vn autre nous monstrerons, comme par le moyé de diuers effects miraculeux, il a ouuert la porte de la Chrestienté, à la commune populace de ces païs.

Or pour mieux entendre, ce que nous auons à dire sur ce qu'il a pleu à Dieu de conuaincre par les Eclipses, les plus doctes, & sçauans
Cochin-

Cochinchinois, tenus parmy eux, pour excellens Mathematiciens. Il faut tout premierement sçauoir certaines coustumes, qui ont cours en ce Royaume, touchant la science d'Astrologie, & particulieremēt des Eclipses, pour autant qu'ils priſent tant ceſte cognoiſſance, qu'ils ont dans leurs Vniuerſitez de grandes, & amples ſales, où ils l'enseignent publiquement, & qu'on aſſigne de bons gages, & reuenus particuliers aux Astrologues, qui ſont conſtituez ſur des terres, dont ils tirent vne eſpece de tribut. Le Roy a ſes Astrologues, le Prince ſon filſ a auſſi les ſiens, leſquels employent tout leur ſoin, & induſtrie à auertir punctuellement du temps des Eclipses. Mais d'autant qu'ils n'ont pas le Calendrier reformé, & autres particularitez, qui concernent le mouvement du Soleil, & de la Lune, comme nous les auons, il leur arrive ſouuent de faire de groſſes fautes au calcul des Lunes, & Eclipses, eſquelles pour l'ordinaire, ils ſe meſcontent de deux, ou trois heures, & par ſois auſſi, quoy que plus rarement, d'un iour tout entier, combié que d'ordinaire ils preuoient veritablement, ce qui touche le principal de l'Eclipse. Au reſte toutes ſois, & quantes qu'ils la prediſent au vray, & iuſtement, ils reçoient du Roy, pour recompense

compense vne terre, comme au cōtraire, s'ils se trompent en leur calcul, ils sont priuez de celles qu'ils auoient autres fois gagnées. Le suiet pour lequel on fait tāt de cas du pronostic des eclipses en ces pays, sont plusieurs superstitions qu'on garde en ces temps-là autour du Soleil, & de la Lune, auxquelles ils se preparent avec beaucoup de solēnité, & d'appareil. Aussi auerti qu'est le Roy vn mois auparauant du iour, & de l'heure de l'Eclipse, il enuoye par toutes les Prouinces de son Estat, l'une apres l'autre pour auiser, que tant les Lettrez, comme le reste du peuple, ayent à se disposer pour ceste iournée, laquelle estant venue, tous les Seigneurs de la Prouince, les Gouverneurs particuliers, les Capitaines, & Cauzliers, & le peuple par ses propres Officiers, s'assemblent tous en chascque ville, & terre particulier. Mais la principal assemblée se fait à la Cour, ou sōt lors tous les premiers du Royaume, lesquels sortent tous dehors avec leur armes, & estendars. Le Roy tout le premier, vestu en dueil, puis toute la Cour, & regardant le Soleil & la Lune, qu'ils voyent s'eclipser, ils luy font vne, deux, & plusieurs fois la reuerence, & l'adorent, disants à ces planetes quelques paroles de compassion sur la peine, & le traual qu'ils endurent. Par
ce que

ce que ils estiment que l'Eclipse n'est autre chose, sinon que le Soleil, & la Lune sont engloutis par le dragon, & au lieu que nous disons, la Lune est à moitié ou tout à fait Eclipsée, eux parlent ainsi, *Da an nua, Da an het*, qui vaut autant à dire comme le dragon en a desia mangé la moitié, il l'a desia devorée toute entière.

Or iagoit que ceste façon de parler soit extravagante, si fait elle voir cependant le fondement des Eclipses qu'ils tiennent provenir du mesme principe que nous, qui n'est autre, que l'intersection de la ligne Eccliptique vraie voye, & chemin du Soleil, avec celle que fait la Lune en sa course, qui sont les deux points, que nous appellons la teste, & la queue du dragon, comme sçauent les Astronomes, d'où il est aisé de conclurre, que la mesme doctrine, que nous avons touchant les Eclipses, est aussi parmi eux, avec les mesmes termes, & mesme noms, du dragon, ils ont aussi les mots d'Aries, Taurus, Gemini, & les autres pour signifier les signes du Zodiaque. Mais par laps de temps, le vulgaire ignorant, est allé controuuer des fables, qui passent pour choses vrayes. asseurant, que quand le Soleil, ou la Lune sont Esclipsez, ils sont devorez du dragon, état vray cependant qu'ils

M

sont

compense vne terre, comme au cōtraire, s'ils se trompent en leur calcul, ils sont priuez de celles qu'ils auoient autres fois gaignées. Le suiet pour lequel on fait tāt de cas du pronostic des eclipses en ces pays, sont plusieurs superstitions qu'on garde en ces temps-là autour du Soleil, & de la Lune, auxquelles ils se preparent avec beaucoup de solēnité, & d'appareil. Aussi auerti qu'est le Roy vn mois auparauant du iour, & de l'heure de l'Eclipse, il enuoye par toutes les Prouinces de son Estat, l'une apres l'autre pour auiser, que tant les Lettrez, comme le reste du peuple, ayent à se disposer pour ceste iournée, laquelle estant venue, tous les Seigneurs de la Prouince, les Gouverneurs particuliers, les Capitaines, & Caualliers, & le peuple par ses propres Officiers, s'assemblent tous en chasque ville, & terre particulier. Mais la principal assemblée se fait à la Cour, ou sōt lors tous les premiers du Royaume, lesquels sortent tous dehors avec leur armes, & estendars. Le Roy tout le premier, vestu en dueil, puis toute sa Cour, & regardant le Soleil & la Lune, qu'ils voyent s'eclipser, ils luy font vne, deux, & plusieurs fois la reuerence, & l'adorent, disants à ces planetes quelques paroles de compassion sur la peine, & le traual qu'ils endurent. Par ce que

ce que ils estiment que l'Eclipse n'est autre chose, sinon que le Soleil, & la Lune sont engloutis par le dragon, & au lieu que nous disons, la Lune est à moitié ou tout à fait Eclipsée, eux parlent ainsi, *Da an nua, Da an het*, qui vaut autant à dire comme le dragon en a desia mangé la moitié, il l'a desia devorée toute entiere.

Or iagoit que ceste façon de parler soit extrauagante, si fait elle voir cependant le fondement des Eclipses qu'ils tiennent prouenir du mesme principe que nous, qui n'est autre, que l'intersecion de la ligne Eccliptique vraye voye, & chemin du Soleil, avec celle que fait la Lune en sa course, qui sont les deux points, que nous appellons la teste, & la queue du dragon, comme scauent les Astronomes, d'où il est aisé de conclurre, que la mesme doctrine, que nous auons touchant les Eclipses, est aussi parmi eux, avec les mesmes termes, & mesme noms, du dragon, ils ont aussi les mots d'Aries, Taurus, Gemini, & les autres pour signifier les signes du Zodiaque. Mais par laps de temps, le vulgaire ignorant, est allé controuuer des fables, qui passent pour choses vrays. asseurant, que quand le Soleil, ou la Lune sont Esclipez, ils sont deuorez du dragon, estât vray cependant qu'ils

M

sont

sont en ce temps-là, à la teste ou à la queue du dragon astronomique.

Mais pour reuenir à la grande compassion, que prennent ces peuples, de ces planetes en leur trauail, ayans mis fin à leurs adorations, on n'entend qu'arquebusades, mousquetades, coups de canon, qu'on lasche & descharge premierement au palais du Roy, puis par toute la ville, toutes les cloches se sonnent, les trompettes iouent, on bat les tåbours, bref on n'oublie aucun instrument, nō pas mesmes iusques aux chauderons, & autres vtenfiles de la cuisine, qu'on ne remue en ce temps, avec vn merueilleux fracas, & tintamarre. Et cela se fait, disent-ils, à ce qu'on empesche par ce bruit, & chariuari, que le dragon n'engloutisse tout à fait le Soleil, & la Lune, ou pour le contraindre à rendre gorge, & vomir ce qu'il en a desia deuoré.

Tout cela presuppposé, ce que i'ay maintenant à dire de particulier, est touchant l'Eclipse de Lune, qui auint l'an 1620. le 9. Decembre, à vnze heures astronomiques, c'est à dire vne heure deuant la minuit. Environ ce temps-là, ie me trouuay en la ville de Nouëcman de la Prouince des Pulucambis, ou se trouua vn Capitaine de la rue, ou quartier ou nous auions nostre maison, le fils duquel
s'estoit

s'estoit fait Chrestien, & encore que le Pere, comme lettré, & homme vain, mesprisast fort nostre sainte foy, & nostre doctrine, si en souhaitions nous passionément la conuersion, dans l'esperance que nous auions, que s'il embrassoit la loy Chrestienne plusieurs du quartier, gens du commun, y seroient attirez par son exemple. Il vint vne fois pour nous visiter, quelques iours auparauant qu'arriua l'Eclipse de Lune, de laquelle il se trouua occasion de parler dans nos discours, luy, asseuroit que ceste Eclipse ne deuoit point arriuer, & nous le contestoit asprement, bien que nous luy en fissions voir la verité par nostre calcul, & mesme la façon comme elle deuoit arriuer, toute tracée dans nos liures. Cependant il ne fut iamais possible de luy faire croire, tant il estoit aheurté, & se tenoit fort, sur ce que, si telle Eclipse deuoit estre, le Roy en auroit donné l'auis, qui se donne en tels cas, selon la coustume par tout le Royaume, vn mois deuant, & qu'il n'y auoit plus que huit iours, iusques au temps qu'il disoit, & que partant rien n'en ayant esté mandé par le Royaume, c'estoit vn signe euident, qu'elle ne deuoit pas estre. Et comme il persistoit tousiours opiniastrément, à maintenir le contraire, de ce que nous luy disions, il voulust faire

gajeure contre nous, à condition, que celuy qui perdrait, dōneroit au vainqueur vn Cabaiia, qui est vne sorte d'habit de foye. Nous nous y accordāmes bien volontiers, à tel si, toutesfois que si nous perdions, nous estions contens de luy bailler la robbe. qu'il demandoit: mais aussi que venans à gagner, il fût obligé au lieu de la robbe, de venir durant huit iours ouir la doctrine Chrestienne en nostre maison, & ce qui appartient à nostre sainte foy, l'en suis content, dit-il, & non seulement cela, mais encore à ce mesme tēps que i'auray veu l'Eclipse, ie me feray Chrestien, d'autant disoit-il, que si en choses si cachées & cœlestes, telles que sont les Eclipses, vostre science est si certaine, & assuré, & la nostre trompeuse, infailliblement vostre loy, & la cognoissance que vous auez du vray Dieu, ne sera pas moins veritable, & la nostre entierement fausse. Le tēps de l'Eclipse que nous auions predict estant, venu ce Capitaine vint sur le soir en nostre maison, ayant avec soy force escoliers, & persōnes lettrées, pour estre tesmoins de ce qui arriueroit mais parce que l'Eclipse ne deuoit arriuer qu'à vnze heures astronomiques, ie m'en allay iusques à ce temps-la dire mon office, tournāt cependant vn horloge de sable, à vn heure pres du

du temps qu'il faudroit. Ces gens venoient souuent à moy, m'appeller, & m'inuiter, comme par brauade, à voir l'Eclipse, pensant que ie me fusse retiré, non tant pour dire mon Breuiaire, que pour me cacher de honte que i'auois, de ce que veritablement elle ne deuoit point arriuer, ils ne laisserent pourrât de se bien estonner, de ce que ie leurs respõdois, avec tant d'asseurâce, que l'heure n'estoit pas encore venuë, qu'ils eussent vn peu de patience, iusques à ce que mon horloge, qu'ils contemploient, comme vne chose venuë de l'autre monde, se fût escoulé. Et alors sorti que ie fus dehors, ie leur fis voir, que desia le cercle de la Lune, n'estoit pas si parfaite à ce commencement d'Eclipse, qu'il deuoit estre, & puis s'obscurcissant peu à peu, il s'esclaircirent de la verité que ie leurs auois predite. Le Capitaine, & les lettrez estonnez de la chose, commanderent aussi tost, qu'on courut par les maisons du quartier, & par toutes les ruës de la ville donner les nouuelles de l'Eclipse, à ce que chascun accourût pour rendre par leur tintamarre les deuoirs, & seruices accoustumez pour le soulagement de la Lune patissante, publians par tout, qu'il n'y auoit point d'autres hommes au monde, dont la doctrine fût plus assurée, que celle des Peres, puis que

ils auoient prédit si à point nommé l'Eclipse que pas vn de leurs Astrologues n'auoit pas mesme aperceue. Et pourtant le Capitaine pour s'acquiescer de sa promesse, se fit non seulement Chrestien, avec ceux de sa maison: mais encore plusieurs autres du quartier, & des plus doctes, & lettrez de la ville, & autres personnes de consideration.

Vn cas semblable arriua en mesme temps, bien qu'entre des personnes, & en vn lieu beaucoup plus considerable. Iagoit que les Mathematiciens du Roy, n'eussent point aperceu ceste Eclipse, ceux toutefois du Prince s'y estans employez avec plus d'estude, la recogneurent à Cacciam, mais avec vn erreur tres notable, ne s'estans pas melcontez de deux ou trois heures seulement, mais d'un iour entier, qu'ils publierent qu'on auoit la pleine Lune, & par consequent l'Eclipse, vn iour deuant qu'elle deust venir. Le P. Francois de Pina qui estoit pour lors en Cour, en aduertit vn Courtilan, lequel approche de plus près le Prince qu'aucun autre, se trouuant par tout avec luy, comme luy seruant de Maistre des ceremonies appellé pour ceste charge Omgné, & luy dit, que l'Eclipse ne pouuoit estre au temps qu'auoient dit les Astrologues du Prince, ains la nuit suivante
comme

comme l'auoit dit le Pere Christophe Borri, qu'il donnast cet auis au Prince son Maistre, & luy fit scauoir l'erreur de ses Astrologues. L'Omgné neantmoins ne prenant pas assés de creance au dire du Pere, & n'y adioustant vne pleine foy, n'en voulust point parler. Enfin l'heure venue que les Astrologues auoient marquée, le Prince sort avec toute sa Cour pour contempler l'Eclipse à leur façon, & donner le secours à la Lune, qui auoit, comme ils pensoient, à s'eclipser. Mais le Prince trouuant par experience, qu'il estoit trompé s'indigna contre ses Mathematiciens, & commanda qu'on eust à leur retrancher vne ville du reuenu qu'ils auoient selon la coustume, dont nous parlions n'agueres, quand ils ont manqué. La dessus l'Omgné prist occasion de dire au Prince que le Pere European luy auoit dit cela, deuant qu'il aduint, & qu'elle deuoit arriuer la nuit suiuiante. Le Prince monstra prendre grand plaisir, d'oïr que les Peres eussent asseuré, ce que ses Mathematiciens n'auoient peu deuiner.

Alors l'Omgné s'en vint au Pere, pour scauoir asseurement le point de l'Eclipse, le Pere luy fit voir par horloges, & autres instrumens, qu'elle deuoit estre iustement à vnze heures de la nuit suiuiante. Cependant il ne se tenoit

point encore asseuré, & dans son doute, il ne voulust point esueiller le Prince, qu'il n'eust veu clairement l'Eclipse se commencer : car pour lors il s'en court l'esueiller, & luy sortât hastiuement, avec quelque siens Courtisans, se met à faire les reuerences, & adorations accoustumées en tels rencontres. Il n'en voulut point poutant publier l'euehement de peur d'oster tout à fait le credit à les Mathematiciens, & à leurs liures, encore bien que tous spfissent vñe grande opiniõ de nostre doctrine, & particulièrement l'Omgne, qui depuis ce temps la vint vn mois durant, ouir tous les iours le Catechisme, apprenant avec vn soin particulier, tout ce qui appartient à nostre sainte foy. Mais il ne fut pas baptisé, pour ne s'estre peu resoudre à franchir la difficulté, de s'abstenir de la pluralité des fèmes, ausi bien que l'Ambassadeur Ignace. Il ne laisse pas poutant d'aller publiant haut, & clair, avec vne grande ferueur, qu'il n'y a que la seule doctrine, que nous enseignons, qui soit vraye, & que toutes les autres estoient fausses, & disoit pour conelasion, qu'il ne deuoit mourir autre que Chrestien, desquelles paroles plusieurs furent portez à demander le Baptesme.

Après auoir parlé de l'Eclipse de Lune,
nous

nous acheuerons par vne autre du Soleil, qui arriua le 22. de May, de l'année 1621. laquelle les Astrologues du Roy predirent deuoir estre, & durer deux heures. Mais pource que on s'estoit formé vne tres. bõne idee de nous autres en ceste matiere, ils vinrent pour plus grande assurance, sçauoir de nous ce qui en estoit. Le leur respondis pour lors, qu'il n'y auoit rien plus vray, que de dire qu'il y auroit vne Eclipsé, leur en faisant voir de plus la figure imprimée dans nos Ephemerides. Le ne leur dis point cependant pour lors, tout à dessein, qu'à raison de la parallaxe de la Lune avec le Soleil, elle ne se pourroit point voir en la Cochinchine, ils ne sçauoient que c'estoit que parallaxe, d'où prouient le plus souvent leur tromperie, ne retrouvans pas punctuellement le temps, selon que disent leurs liures, & calculs, afin que leur erreur estant publié, nostre doctrine fut plus prisee. C'est pourquoy ie leur demanday temps pour considerer le point precisely, leur disant en termes generaux qu'il estoit besoin de mesurer le Ciel avec la terre, pour pouoir examiner si ceste Eclipsé deuroit estre en leur Royaume, & de ceste sorte ie me desis d'eux, differât la response, iusques à tant que le tẽps fut venu de la publication de l'Eclipsé. S'estans

dre Si bien que pour le deliurer de ceste incertitude, il enuoye encore vne fois à moy, pour sçauoir ce que i'en disois asseurement, ma responce fût qu'ayant fait tous mes calculs, & supputations tres soigneusement, ie trouuois qu'infailiblement ceste Eclipse ne paroistroit en aucun endroit de son Royau-me, & que par ainsi il fut hors de soucy de la faire publier, qu'au reste ie luy promettois avec toute verité, & a ses Mathematiciens en ceste occasion, la victoire sur son Pere, & sur ses Mathematiciens. Se fiant en fin sur ma parole, il ne tint conte de faire sçauoir ceste Eclipse dans son ressort, avec l'estonnement bien grand de toute la Cour, & des Astrologues Royaux, lesquels s'enquerās de ce peu de preuoyance du Prince, n'eurent autre responce, sinon que dans la Cour, il y auoit de meilleurs Mathematiciens, qu'en celles du Roy son Pere. D'où ils entendirent fort bien qu'asseurement il y auoit la quelque vn de nos Peres, & qu'il auoit suiuy leur opinion, laissant celle du pays. Mais comme il n'estoit plus temps de contremander ce qui en auoit esté desia publié de leur part, on se disposa par tout, ainsi que porte la coustume, au iour donné pour l'Eclipse, lequel estant venu, & l'heure qu'ils disoient, l'experience

publia

publia leur erreur, à toute le monde, qui se trouva deceu.

Ce iour fut beau, clair, & net, sans qu'il parust la moindre nuée dans le Ciel. Et iajoit que ce fut au mois de may, ou le Soleil en ces pays bat à plomb dessus la teste, & enuiron les trois heures d'apres midy, qu'elle deuoit arriuer à leur conte, auquel temps tout le monde deuoit brusler de chaud. Le Roy neantmoins ne laissa pas de sortir de s^{on} Palais, avec ses courtisans, supportant fort long temps ceste fatigue, en attendant l'heure: mais se voyant depuis morqué, esmeu qu'il estoit tant à cause du chaud du iour qu'il auoit souffert, qu'indigné de l'ignorance qu'il voyoit en les Mathematiciens, il les rança bien verement, & reprît tres-aigrement. Ils apporterent pour leur excuse, que l'Eclipse deuoit tresasseurement arriuer, mais qu'en leur supputation ils s'estoient trompez d'un iout touchant la conionction de la Lune, & qu'il n'y auoit doute aucun, qu'elle ne deust comparoistre le lendemain à mesme heure. Le Roy les creut, & le iour d'apres à la mesme heure, il ne gaigna autre chose, que bien du chaud, comme le iour d'aparauant, au grand mespris, & confusion de ses Mathematiciens, qui n'en demeurerent pas là sans punition. Car il

ne

ne commanda pas seulement qu'on les priaſt de toutes les terres, ſur leſquelles leur reuenu eſtoit aſſigné, mais outre plus pour les baſſoüer d'auantage il ordonna, qu'ils euſſent à ſe tenir vn iour entier à deux genoux au beau mitan de la cour de ſon Palais Royal, teſte nuë expoſez au hale, & ardeur du Soleil, comme auſſi aux moqueries, & riſées de tous les Courtiſans, qui les alloient gabans. Noſtre Prince ſe voyant auoir le deſſus, & que la victoire luy demeurait, eſcriuit vne belle lettre à ſon Pere, tout en riant, en laquelle il luy mandoit que n'eſtant que ſon fils, il n'auoit pas laiſſé de mieux rencontrer que luy, pour le fait de l'Eclipse, & qu'il auoit de bien plus habiles gens que luy, en ſa Cour.

Il ne ſe peut dire combien ce rencontre releua noſtre credit, & autorité aupres des perſonnes doctes, & lettrées. Si bien que ces Mathematiciens, tant du Roy que du Prince nous vinrent trouuer, & demander à grande inſtance, que nous les vouluſſions receuoir pour nos Eſcoliers, & nos Peres gaignerent par tout ſi vniuerſellement, vne telle reputation, qu'ils preferoient, non ſeulement noſtre Aſtronomie à la leur, mais auſſi la loy que nous leurs allions publians argumentans

CHAPITRE VIII.

*Comme Dieu ouvrit vne troiesme porte au
Christianisme par le moyen des Prestres,
& Onfais de ceste Gentilité.*

DIEU voyant combien il estoit importât
pour la conuersion de ces pauvres Ido-
latres, que quelques vns de leurs Prestres ou
Onfais se conuertissent, à cause de l'autorité
qu'ils ont aupres de tout le peuple, sa diuine
Majesté voulut encore ouuoir ce chemin à la
saincte foy. Vn Onfai nommé Ly, qui de-
meuroit presque tout contre nous, & auoit le
soin & l'intendance d'un temple d'Idoles,
d'où vint que le voisinage luy donna plusieurs
occasions de traiter avec nous & de prendre
beaucoup de cognoissance de nos façons de
faire, & manières de viure; ce qu'il en reco-
gneust luy donna tant de satisfaction, que
passant plus auant, il voulût estre instruit de la
foy du Dieu que nous adorions, dont nous
luy rendîmes cōte tout du long, luy particu-
larisant tous nos mysteres. Mais comme nous
vîmes

vîmes à luy enseigner, que le fils de Dieu estois resuscité, afin de faire aussi que tous les hommes resuscitassent, au dernier iour, l'Onsay Ly eust tant de contentemēt à ouir cecy, qu'illuminé de Dieu, il fit instance, qu'on luy dōna le Baptisme qu'il receut luy, & toute sa famille, la nuit de Noel qu'il passa à deux genoux, en vne longue oraison, arrousé de ruisseaux de larmes, qui couloïēt de ses yeux, disant ces paroles *Tuiciam Biet*, c'est à dire ie ne sçauois pas, cōme s'il eust voulu dire: Pardonnez-moy Seigneur, si i'ay demeuré iusques à presēt, sans vous cognoistre, & s'arrestant pour vn peu de temps comme en contemplation, il reprenoit de nouueau les mesmes paroles, qui rendoient vne douce, & agreable musique au petit enfāt nouueau né. Il demeura si affectionné en nostre endroit depuis le Baptisme, qu'il prist resolution d'amener chez nous tout son meſnage, pour viure sous nostre Regle, & direction. Mais comme nous luy eûmes fait entendre, que cela ne se pouoit, veu qu'il auoit vne femme avec soy, il fit son dessein de loger au plus pres de nous qu'il pourroit, pour conduire, & regier ses actions, au son de nostre clochette, ainsi qu'il fist tres exactement, iusques la, que de dire les litanies des Saints à mesme temps que

que nous, à son oratoire, selon que nous le pratiquons en nostre Compagnie, ou nous auons coustume de les dire en commun chaque iour. Et ce qui est de plus gracieux, c'est que s'estant apperceu, qu'en vne certaine heure, nous souliôs dire nostre chappelet en nous pourmenant, il se pourmenoit aussi a mesme heure, ce qui sembloit bien estrange à ceux du pays, qui trouuent fort ridicule de se pourmener de la sorte. Car ils ne feroient iamais vn seul pas, qu'en intention de faire quelque chose, ou de s'en aller à l'esbat, tenans pour action tout a fait oiseuse d'aller d'un bout de chambre, de sale, ou d'allée à l'autre, sans autre dessein, que de retourner d'un bout à autre, & reuenir sur ses pas, de maniere qu'on accouroit regarder ces pourmenades, avec beaucoup d'admiration, & à la veuë de ceste nouueauté, n'oyoit on que gens qui s'entredisoient, *Onsai dilay, le Pere va & reuiet, le Pere va & reuiet.* Mais cela n'empescha pas que nostre Onsai Ly, n'allast tousiours son mesme train, & qu'il ne retint inuiolablement sa coustume, depuis sa deliberation prise, de se conformer en tout, & par tout à nous, en toutes ses actions. Il n'auoit qu'une femme, & iusques à trente ans, qui estoit son âge, il auoit vescu avec tant de con-

formité

formité à la loy de nature, qu'ainsi qu'il disoit il n'auoit iamais iusques à cet heure delibere-
ment fait chose d'importance, qui contreuint
à ce qui luy sembloit estre de iustice, & rai-
son. Et que s'il auoit adoré les Idoles, ç'auoit
esté pource que par ignorance, il croioit que
ce fût contre la raison de ne le pas faire. De la
nous voyons combien est veritable, ce qu'en-
seignent les Theologiens, que Dieu ne man-
que iamais par sa prouidēce, à vn infidele qui
vit moralement bien, & conformement à la
raison, & à la loy naturelle, & qu'il luy fera re-
cevoir le baptesme, ou par le moyen des hom-
mes, comme à celuy cy, ou bien par l'entre-
mise d'un Ange. Cet Onsañ Ly se consacra, &
dedia tellement au seruice de Dieu, qu'osté le
necessaire pour l'entretien de sa famille, tout
son trauail, & de ceux de sa maisō s'employoit
entierement au seruice de nostre Eglise, son
principal soin estant de la tenir bien nette, &
bien rangée, & d'en parer tres bien, & agencer
proprement l'Autel. Dieu demandoit quel-
que chose de plus de ce sien bien aymé serui-
teur, & ne se contentoit pas de ceste deuotion
qu'il auoit, car il luy embraza le cœur, d'un
zele si ardent, qu'il se mit à prescher publique-
ment la foy de IESVS-CHRIST. Il prenoit pour
sujet plus ordinaire, de ses discours, le myste-

N

re-

re de la glorieuse Resurrection , par lequel il attira, & conuertit non seulement plusieurs du commun ; mais aussi plusieurs autres On-faïs. Car encore bien qu'il ne fut pas des plus doctes , son zele ce neantmoins si ar-dant , suppleoit au defaut de doctrine, & il fit si bien, qu'entre les autres qui deman-derent le baptême, il y en eust vn des plus doctes , & renommez du Royaume, par l'autorité & à l'aide duquel refutant les sectes paganesque, il ne se peut dire com-bien grand estoit le fruct ou'il en retira. Pource que cet homme pût a tasche de rembarrer les obiections des autres idolatres, qu'il conuainquoit aisement, comme n'igno-rant pas les fondemens, sur lesquels ils s'ap-puyoient, nous deschargeant d'autant, nous autres Peres, qui ne pouvions pas si aysement sapper par le pié les fondemens de leurs se-ctes, pour n'en auoir pas tant de cognois-sance que luy,

Eten verité nous auions besoin d'un tel homme pour nostre secours, d'autant qu'il y a vne telle varieté, & difference des On-faïs en ce pays, qu'il semble que le diable à voulu faire entre les Gentils, cōme vn pourtrait de la belle, & agreable diuersité des Religions, qui se voyent en l'Eglise Catholique. Ils vont
vestus

vestus diuërsément, selon leur diuërses professions. Car quelques vns sont vestus de blanc, les autres de noir, d'autre bleu, les autres d'une autre couleur. Ceux cy. viuent en commun, ceux la comme Chappelains, Chanoines, & Prebendez: les autres font profession de pauvreté, & ne viuent que d'aumosnes: les autres vaquēt aux œuures de misericorde, traittent les malades, ou avec medecines naturelles, ou par art magique, & ce gratuitement sans en retirer aucun profit, ny payement: les autres entreprennent des œuures pies, dont ils se chargent, comme seroit de construire des ponts, & autres choses semblables, qui vont au bien public, bastir des Eglises, cherchans à cet effet des aumosnes en des pelerinages, qu'ils font, iusques au Royaume mesme du Tunchim: les autres enseignans la doctrine de leur loy, & ceux la sont grandement riches, tenans escoles publiques pour enseigner tous ceux, qui les veulent ouir, comme Lecteurs publics pour tout le Royaume. Il se trouue encore de ces Onsaïs, qui exercent l'art des Mareschaux, & qui par compassion naturelle, prennent soin de penser les Elephans, les Bœufs, & les Cheuaux, sans prendre aucune recompense de ceux a qui ces animaux appartiennēt, se con-

tenant seulement de ce qu'on leur veut donner. Il y en a d'autres en fin, qui prennent charge des monasteres, & cloistres de femmes, qui vivent en commun, & ne donnent entrée à personne autre, qu'à cet Onlai, qui a soin d'elles, & qui sont toutes à luy.

Il y a de tres-beaux temples, avec de hautes tours, & clochers. Chasque terre, pour petite qu'elle soit, à son temple ou on adore les Idoles, lesquels sont des statuës fort grandes, pleines de richesses d'or, & d'argent enfermées & cōseruées, ne plus ne moins qu'un thesor sacré dans la poitrine, ou ventre de la statuë, ou personne n'oseroit mettre la main, n'estoit qu'en vne extreme necessité, quelque larron fouillast dans le ventre de l'Idole, sans auoir esgard à la grandeur du sacrilege, qui se commet en tel cas, car c'est l'opinion qu'on a d'une telle action parmy eux. Et qui est bien d'auantage, ils portent à leur col des chapellets, & rosaires, & font autant de processions, ez festes & solempnitez dediées à leur faux dieux, que nous en voyons faire entre les plus deuots Chrestiens. Il y a de plus entre les Onlays, quelques uns qui respondent aux Abbez, Euesques, & Archeuesques iusques à porter des bastons dorez, & argentez, fort peu differents de ceux, dont on se sert
parmy

parmy nous dans l'Eglise. Tellement que quelqu'un venant de nouveau en ces pays, pourroit quasi bien croire, que la anciennement il y a eu des Chrétiens, tant le diable s'est fait singe de nos actions.

A ceste occasion qui s'offre tant à propos, j'inséreray en cet endroit un chapitre des sectes de la Cochinchine, pour donner quelque cognoissance du moyen, qu'on pourra tenir, pour tirer ce peuple des tenebres, ou il est enuélé, & l'esclairer de la belle lumiere de l'Evangile.

CHAPITRE VIII.

BRIEFVE DECLARATION DES diverses sectes de la Cocinchine.

Toutes leurs sectes n'ont pour autre but, que le Dieu qu'elles adorent, ou la gloire, & félicité à laquelle ils aspirent, confessans tantost l'immortalité de l'ame, & tantost assurens, que tout prend fin, avec la mort du corps. C'est sur ces deux principes, que s'establisent tous les gentils Orientaux, dont les sectes ont puisé cōme à leur source dans les escrits d'un certain grand Philosophe, & excel-

lér Metaphysicié, nommé Xaca, natif du Royaume de Siam, bien plus ancié qu' Aristote, & qui ne luy cedit en rien, pour la capacité, & cognoissance des choses naturelles. Celuy-cy avec la subtilité de son esprit, se mit à considérer la nature, & fabrique de l'vniuers, contemplant les principes, & la fin de toutes choses: Mais principalement de la nature humaine, dame, & maistresse de ce grand Palais du monde. A ce sujet ils'en alla gagner la cime d'une montaigne escarpée, d'ou il se mit à considérer bien curieusement l'Estolle du iour, laquelle naissant des tenebres obscures de la nuit, se haussait tout bellement, & peu à peu sur l'horizon, pour puis apres sur le loit se replonger de nouveau dans les mesmes obscuritez. Il consideroit pareillement que le Soleil, apres nous auoir amené, & donné vn beau iour s'alloit cacher & enfoncer dans les ombres de la nuit. Ce que ruminant en son esprit, il vint à dire, que toutes choses venoient de rien, n'estoient rien, & retournoient à rien. Et sur ceste pensée, reuenu qu'il fut en son logis, il se met à composer plusieurs liures, & gros volumes sur ce sujet, intitulez du neant de toutes choses, dans lesquels il monstrois que les choses du monde, eu esgard au temps, & à la mesure de leur durée, ne sont rien,

rien, pource que deuant qu'elles fussent disoit il, elles n'estoient rien, pour l'auenir, elles ne seront rien, quant au presët, qui n'est qu'un instant, que ce mesme instant n'est rien.

Il prenoit pour second fondement la composition de toutes choses. Mettons, disoit il, pour exemple vne corde, laquelle comme elle n'est pas naturellement distinguée de ses parties en tant que ce sont elles qui luy donnent l'estre, & dont elle est composée, aussi trouuera on, que la corde en tant que corde, n'est rien puis que en tant que corde, elle n'a rien de distingué d'avec les filers, dont elle est faite & ces mesmes filets, ne sont rien distingué d'avec le chanvre, dont ils sont faits, & le chanvre n'a point d'autre estre, que celuy des elemens, dont sa substance est composée, de sorte que reduisant ainsi toutes choses aux principes des elements, & ceux cy comme à vne certaine matiere premiere, qui n'est que pure puissance, & par cōsequent riē d'actuel, Il concludoit à la fin que toutes choses, tant les celestes, que celles qui sont sous le Ciel, n'estoient veritablement rien du tout.

Des choses morales il en discouroit en ceste maniere. La beatitude naturelle de l'homme ne consiste point en vn amas positif de tous biens, qui à son auis estoit impossible, mais

plustost en vne negation, & esloignement de tous maux, d'où il inferoit, qu'elle n'estoit autre chose qu'une exemption de toute incommodité & infirmité, & de n'auoir ny peine, ny tristesse, ny affliction, ou trouble quelconque, & que l'homme soit paruenue à vn tel estat, & à vn domaine si absolu de ses passiōs, qu'il ne sente affection aucune, ou repugnance, à l'honneur, ou au deshonneur, à la disette, ou à l'abondance, aux richesses ou à la pauvreté, à la mort, ou à la vie, & que c'estoit là, la parfaite felicité, & vraie beatitude. De tout cela il concludoit, que toutes ces choses n'estant rien, elles prenoient leur origine, d'une cause non pas efficiente, mais materielle, & d'un principe, qui n'estoit aussi qu'un neant, mais vn neant eternelle, vn neant immense, vn neant immuable, vn neant tout puissant, & finalement Dieu vn neant, & caule du neant.

Ce Philosophe auant que d'establi sa doctrine, & donner cours à ceste secte en ietta quelques commencemens, & comme essais expliquant la fabrique du monde sous deux allegories l'une que le monde estoit né d'un œuf, lequel par apres se dilata tellement que de sa coque se fit le Ciel, de la glaire ou du blanc se forma l'air d'où partirent les eaux, & finalement du moyeu ou iaune de l'œuf s'estoit

estoit faite la terre, & toutes les choses terrestres. Il prit son autre allegorie, d'un certain homme de grandeur enorme, qu'ils nomment entre eux, *Banco*, que nous appellerions Microcosme, disant que de ce Geant prodigieux estoit sorty le monde, comme nous le voyons, le Ciel s'estant fait du rest de la teste, le Soleil, & la Lune de ses deux yeux, sa chair s'estoit conuertie en terre, ses os en montagnes, ses cheueux en herbes, & en arbres, son ventre estoit deuenu vne mer, adaptant ainsi par le menu toutes les parties, & operations de l'homme, aussi bien que la forme de son corps, à l'establissemēt, & atirail du monde. Il adiousta encore que les pous de ce Geant, s'estoient chargés en autant d'hommes, qui se disperferent par tout le monde. Et apres qu'il eust bien speculé ceste doctrine du neant, il assembla quelques disciples, au moyen desquels il la sema par tout l'Orient. Mais les Chinois qui recogneurent que ceste secte qui reduisoit tout au neant, estoit fort preiudiciables à l'estat, n'y voulurent point entendre, ny permettre qu'elle eust cours parmy eux, ne pouans tolerer ceste opinion, qui ostoit les peines pour les meschans, & mettoit tout le bonheur des bons, en vne simple, & pure negation des peines de ceste vie. Plusieurs autres

la

la refuserēt aussi, à l'exemple des Chinois, qui se sont acquis vn grand credit, & estime parmy tous les peuples voisins. Ainsi Xaca mal content, de voir la doctrine ainsi delaissee, & sans sectateurs changea d'opinion, & en se retractant, composa de nouveau plusieurs grands & amples volumes, dans lesquels il enseignoit, qu'il y auoit vn principe reel des choses, qu'il y a vn Seigneur du Ciel, vne gloire, vn enfer, vne immortalité pour les ames qui par vne metempsychose ou transmigration passent successiuelement, en des corps ou plus nobles, ou plus mesprisables, conformément aux merites, ou demerites de chascun. Il ne s'oublia pas aussi d'assigner vne certaine sorte de gloire, & vn lieu de tourment pour les ames separées du corps, declarant le tout, sous la metaphore des choses corporelles, & de ce qu'il y a de desirable & de redoutable en ce monde.

Ceste autre doctrine icy ayant esté publiée par Xaca, fut receuë des Chinois, & sur tout des Bonzes, lesquels d'ordinaire sont gens cōtemptibles, & bien moins estimez que ceux du Iapon, qui estans toutes-fois grandement desireux de leur salut, receurent ceste doctrine, & la conseruerent en douze sortes de sectes differentes entre elles, quoy que la plus

plus suivie, & mieux receüe, soit celle, qui tient l'opinion du neant des choses qu'ils nomment *Genfu*. Ceux de ceste secte sont costumiers de sortir tous ensemble, à certains iours à la campagne, pour ouïr le discours de quelque Bonze, sur le sujet de la beatitude, car ils ne prennent gueresiamais d'autre matieres à traiter, le dessein du discoureur n'estant que de persuader à ses auditeurs, que la beatitude de l'homme est le neant, & que celuy la est heureux, qui ne se touche de rien, d'auoir des enfans, ou de n'en point auoir, d'estre riche, ou pauvre: d'estre sain, ou malade: & choses semblables. Et ce Bonze discourt de cela, avec vne si grande force de raisons, & l'enseigne avec vne si grande vehemence de parole, que tous ses auditeurs enforcent conuaincus, & persuadez de ne tenir conte aucun de toutes choses, veu qu'elles ne sont du tout rien, & comme tous hors d'eux mesmes, ils se mettent à faire paroistre à l'exterieur, le contentement qu'il en sentent au dedans, & le bon-heur ou ils se croient en la maniere, que voicy. C'est qu'ils crient par plusieurs fois à pleine teste, tant qu'ils peuuent, *Xin, Xin, Xin*, Neant, Neant, Neant, accompagnât leur clameur du son de certains petits bastons passez être les doigts de l'une des mains, qu'ils vont

vont frappant de l'autre, & avec ce bruit, & tintamarre tres-grand ils perdent esprit, & iugement, comme gens yures, & quād cela leur est arriué, pour lors ils disent, qu'il ont faict vn acte de beatitude.

Or de ceste grande estime, & opiniõ qu'ont les Iaponois, & autres peuples Orientaux de ceste doctrine du neant de toutes choses, aduint que l'autheur estant prest de mourir, fit appeller a soy ses disciples, & leur dit le meisme; que par le passé, & qu'au point ou il se trouvoit pour l'heure, il les aduertissoit que pēdant plusieurs années de son âge, dās les speculations cōtinuelles qu'il y auoit apportées, il n'auoit rien trouué de plus vray, ny opinion mieux fondée, que la secte du neant, & qu'en-core qu'il semblast qu'il eust changé d'auis à la seconde fois, & enseigné vne doctrine differente, ils deuoient pourtant sçauoir, qu'elle n'estoit point autrement contraire, ny vne retractatiõ de l'autre, ains plustost vne preuue, & confirmation de la premiere. Que s'il n'y auoit pas discouru si clairement, elle n'estoit pas cependant moins belle, à raison de ses metaphores & paraboles, qui se peuvent toutes accommoder à l'opinion du neant, comme il leur seroit aisé de le remarquer en ses liures.

Mais il est desormais tēps de retourner à nos

Cochin-

Cochinchinois, qui ne reçoivent point tout à fait ceste forte, & impertinente doctrine, qui nie la forme substantielle, & reduit toutes choses au neant. Ils confessent vniuersellement par tout le Royaume, l'immortalité de l'ame & par consequent la recompense eternelle, des bons, & chastiment perdurable des meschans, broüillâts ceste verité de tout plein d'absurditez, & de faussetez. La premiere desquelles est qu'ils ne mettent aucune distinction entre les ames des meschans separees du corps, & les malins esprits, leur donans indifferemment le nom de Maa, & estimans, que non seulement ceux-cy : mais encore celles la, s'occupent à nuire aux viuans. La seconde est qu'une des recompenses de l'ame qui a bien vescu, est le transport d'un corps, à un autre plus excellent & noble, comme seroit du corps d'un du commun, dans le corps d'un Roy, ou grand Seigneur. La troisieme, que les ames des trespassés ont besoin de nourriture, & entretien corporel d'où vient que quelques fois dans l'année, ils ont coustume de faire des banquets magnifiques, & splendides, les enfans à leurs peres morts, les maris à leurs femmes, les amis à ceux qu'ils cherissoient icy, attendans longuement, que le mort, qu'ils ont conuié

arriue,

arriue, & s'affoye à table pour manger. Nous argumentâmes vn iour contre ceste erreur, premierement par vne raison, que les Philosophes appelleroiét *à priori*, car nous leur disions, ne voyez vous pas que vous vous trompez bien lourdement dans vostre pensée, que les ames mangent, n'ayans comme esprits qu'elles sont, ny bouche, ny aucun des organes materiels necessaires pour pouoir manger. Puis discourans par les effets, & comme on parle dans l'école, *à posteriori*, sans doute sielles mangeoient des viandes, que vous leur seruez, les plats ne demeureroient pas pleins, comme vous les voyez, deuant & apres que le mort a mangé. Mais leur response fût de se rire de nos raisons, se disans les vns aux autres, ces Peres ne sçauent rien, & puis pour satisfaire, à nos deux argumens, ils repartirent, qu'il y auoit deux choses à considerer dans les viandes, l'vne est la substance, & l'autre les accidens, de quantité, qualité, odeur, faueur, & autres semblables. Et que les ames des trespassez prenans pour elles la substance du manger, qui est immaterielle, & spirituelle, elle y auoient vn aliment bien proportionné à leur nature incorporelle, laissant dās les plats les seuls accidens, qui se perçoient des yeux & autres sens corporels, & qu'ainsi les morts n'auoient

n'auoiët pas befoin d'organes corporels pour manger, comme nous leur voulions faire accroire. D'où qui que ce soit comprendra aisément dás la fausseté de ceste responce, la merueilleuse subrilité des Philosophes Cochinchinois, encore qu'en la realité, & substance de la chose, ils errent totalement.

Ils ont encore vn autre erreur, touchant les mesmes ames, adorans celles de ceux qui pédant qu'ils viuoient entre les hommes, furent tenus pour saints, & les mettans au rang des Idoles, dont leurs temples sont remplis, les rangeans d'ordinaire aux deux costez, comme tuyaux d'orgues, les plus petites les premières, les moyennes cõlequemment, & puis les plus grandes, & toutes proportionnées au merite de ceux, qu'elles representent.

Quant au maistre Autel, qui est la place la plus honorable de tout le temple, il demeure vuide tout à dessein, & on n'y void qu'une niche profonde, & obscure, pour faire entendre, que le Dieu qu'ils adorent, & de qui dependent tous les pagodes, qui ont esté hõmes comme nous, mortels, & visibles, est d'une essence inuisible, & en cela consiste, à leur iugement, le plus grand honneur qu'il luy puissent rendre. Et comme à l'occasion de tant d'Idoles, qui passent être eux pour des Dieux,

nous

nous leur eussions voulu faire voir, qu'il n'y en pouuoit auoir si grand nombre, n'y ayant qu'un seul Dieu. Ils respōdirent qu'ils estoient bien aussi de nostre aui : Mais que nous deuions supposer avec eux, que les idoles mises aux costez du tēple, n'estoient point les createurs du Ciel, & de la terre, mais hommes signalez en sainteté, à qui ils rendoient de l'honneur, comme nous faisons, aux Saints Apostres, Martyres, & Cōfesseurs, leur en deferant plus ou moins, selon les degrez de vertu, qu'ils recognoissent en eux, chose que nous pratiquions pareillement enuers nos Saints, en suite dequoy, & pour mieux auer leur dire, ils adioustoient que la partie du grand Autel, qui demeure obscure, & vuide, est le propre lieu du Createur vnique du Ciel, & de la terre, lequel estant inuisible, & tout à fait esloigné de nos sens, ne se pouoit représenter par des images, & figures materielles, ainsi que les Idoles, mais qu'il falloit sous ceste obscurité, & place vuide, luy rendre l'honneur, & le culte qui luy estoit deu, comme a vne nature incompréhensible. Et qu'ainsi toutes ces Idoles qui estoient au tour de luy estoient comme autant d'intercesseurs, qui impetrent beaucoup de graces, & de faueurs à ceux qui employent leur credit enuers Dieu,

Dieu: Mais au bout du conte, i'açoit que conformément à ce qui a esté dit iulques icy, ils recognoissent vn seul Dieu, comme cause efficiente, & intelligente de tout l'vniuers. Cependant qui examinera bien leurs liures, il trouuera pour certain qu'ils n'adorent qu'un element predominant.

CHAPITRE IX.

COMME DIEU INTRODVISIT LE
menu peuple au Christianisme, par la porte des miracles,

RESTE que nous voyons pour conclusion comme Dieu s'accommodât à la portée, & à l'esprit du menu peuple de ce Royaume de la Cochinchine, accoustumé à voir des fantômes, visions, & figures, dans lesquels les demons se faisoient voir fort souuent, a voulu operer quelques œuvres miraculeuses, à ce qu'ayant decredité les illusions, & prodiges diaboliques, il se fit recognoistre pour l'unique Seigneur, & ouvrier de vrayes merueilles. Les diables se monstrent si ordinairement parmy ces idolatres, qu'outre les oracles qu'ils rendent par la bouche de plusieurs

O

Idoles,

Idoles, desquels ces pauvres, aveuglez Gentils font tres-grand cas. Ils vont encore si frequemment par la ville, en forme humaine qu'ils ne sont point redoutez, mais on se trouve bien volontiers avec eux, & ces priuetez passent par fois si auant, qu'ils se trouvent parmy eux plusieurs incubes, & succubes. Et entre les plus qualifiez, & honnestes, les maris se tiennent pour bien fortunez, quand ils sçauent que leurs femmes, (car il est à remarquer pour dire cecy en passât qu'ils ne hâtent d'ordinaire, que les personnes mariées) sont aimées de quelques vns de ces esprits malins, louans tout haut la condition de celles qui meritent de traiter si priuement, avec vne nature d'un ordre si excellent, & releué comme sont les demons. Et arriua de mon temps, qu'une femme de qualité, mere de deux enfans Chrestiens, que les autres enuioient d'auantage, pour cet infame commerce, qu'elle auoit avec le diable, que pour sa beauté, & bonne grace, & que pour neant nous tachâmes d'induire a receuoir le S. baptême, mourut dans le part de deux œufs, d'où elle se deliura, de l'œuvre du diable. Et d'autât qu'il estoient pour tout assuré, que ce demon son incube estoit le Dieu des fleues, le corps de ceste femme morte, ne fût point enterré comme

me

me les autres en quelque grotte à la mode du pays, avec vne chappelle au dessus : mais fût porté en procession solénnelle dans vn fleuve avec les deux œufs, qu'on i'etta, & enseuelit au fond de l'eau, avec ce corps, en disant que celle la, s'en aille au seigneur des fleuves, qui de son viuant a merité de conuerser si priuement avec luy. Le menu peuple ne se tient pas honoré de ces ordures, & vilenies, ains estime pour aussi grande maladie, quand leur femmes sont ainsi molestées du diable, comme seroit parmy nous, de les en voir possédées. C'est pourquoy ayans sceu que la loy des Peres estoit ennemie des diables, ils penserent, qu'ils auroient aussi quelque medecine contre ceste maladie, appellans medecines les choses benistes, ou sacramentales, comme seroyent l'eau beniste, l'Agnus Dei, & autres semblables deuotions. Ils s'en vinrent donc à nostre maison nous prier de leur donner de ces remedes, & par la grace de nostre Seigneur toutes les persônes qui portoiét sur elles, quelque petite piece d'Agnus Dei, ne receurent plus aucune incômodité du diable, avec ceste difference toutefois, que celles qui n'estoient pas Chrestiennes, voyoient venir le diable iusques à leur lict, mais ils n'auoyent pas le pouvoir de s'approcher d'elles, ny de

les toucher. Les Chrestiens les voyoient venir iusques à la porte de leur chambre, sans pouvoir passer outre, ce qui fut cause que plusieurs vinrent pour receuoir le Baptême.

Et combien que ces demons incubes, qui se font voir en forme humaine, soient si courtois & effables qu'ils ne facent aucun tort aux corps, il s'en presente cependant d'autres aucunes fois en figures si horribles, & espouvantables, qu'ils baillēt beaucoup de frayeur. Et les Cochinchinois, qui les voyent si souvent le depeignent à la façon que font les Chrestiens comme seroit avec des ergots de coq, vne longue queue, des ailles de chauvesouris, avec vn visage farouche, des yeux escintellās, rouges, & enflāmez, & lors qu'il se fait voir en ceste figure, on le craint horriblement, ne venant pour lors que pour faire du mal aux hommes, qu'il porte par fois sur le haut des toicts des maisōs, pour les culbuter, & precipiter en bas. Vn iour nous entendīmes vn grand bruit de personnes attrouppées en nostre quartier, qui crioient tant qu'ils pouvoient *Maqui Maquo*, qui veut dire, voila le diable en figure horrible. Et pourtāt quelques vns de ces pauvres idolatres vinrent à nous, tous courans, & effarez, nous disans que puisque nous auions des armes contre ces malins

malinseſprits, que nous priſſions la peine d'aller au ſecours de ces pauvres miſerables, qui en eſtoient infeſtez, & travaillez. Nous allâmes deux Peres que nous eſtions, apres nous eſtre recommandez à Dieu, armez de croix, d'Agnus Dei, & de reliques, au lieu ou eſtoit le diable. Mais comme nous en approchons ſi près qu'il ne reſtoit plus qu'à tourner vn petit coing de rue pour le rencontrer, en moins de rien il diſparût, laiſſant trois de ſes pas, & veſtiges bien imprimez ſur le pavé, leſquels ie vis, longs de plus de deux palmes, avec les marques des ongles, & ergots de coq. Quelques vns attribuerent ceſte fuite du diable, à la vertu de la Sainte Croix, & reliques que nous portions avec nous.

Dieu à l'occaſion des apparitiōs diaboliques, à attiré beaucoup de ces gentils à noſtre ſainte Foy, ne laiſſant pas d'en enuoyer encore de bonnes, comme il ſe verra es rencontres ſuiuans, qui ſont arriuez en ma preſence, tandis que j'eſtois en ce Royaume là. Le premier eſt que comme nous eſtions vn iour dans noſtre maiſō, nous vîmes paroître d'ās vn chāp, vne fort belle proceſſion de grande quantité de perſonnes, qui venoient droit à nous, ou eſtans en fin venus, nous leur demandâmes ce qui les amenoit en ce lieu, & ce qu'ils nous

vouloient. Ils nous respondirent, qu'ils auoiēt veu en leurs pays vne tres-belle dame dans l'air, en vn throsne de nuées resplendissantes, qui leur auoit dit qu'ils allassent en telle ville, ou ils rencontreroient les Peres, desquels ils feroient informez du d'roit, & asseuré chemin de la gloire, & auroient cognoissance du vray Seigneur du Ciel. Tellement qu'apres que nous eûmes rendu nos actions de graces, à la tres-saincte Vierge, comme tenans de sa main liberale ce grand benefice, ils furent instruits, & catechisez pour receuoir le Baptesme, & renvoyez contens dans leurs maisons.

Le second fut que nous en retournans vne autre-fois au logis, le Pere Buzome, & moy no^s vîmes venir d'ũ autre endroit vne sēblable multitude de gens, lesquels nous ayans faits de grandes reuerēces, & tesmoigné beaucoup de courtoisies, dirent au Pere François Buzome, qu'ils estoient venus, à ce qu'il leur enseignast ce que la nuit d' auparauant estant en leur pays, il leur auoit promis. Le Pere s'estonna à ce discours, estāt bien asseuré de n'auoir iamais esté en ce lieu là. Cepēdant cōme i'eū bien examiné le tout de près, ie trouuay que nostre Seigneur par sa grande bonté, & misericorde auoit fait, que quelque Ange en forme du Pere, ou bien en songe, auoit donné
à

à ces personnes cognoissâce de nostre sainte Foy.

Il se conuertit vn si grand nombre de personnes au bruit de ces merueilles, que l'Eglise, que nous auoit bastie le Gouverneur, estât demeurée trop petite, il fut besoin de l'agrandir, & augmenter. A quoy la femme du Gouverneur, ses enfans, & parens, avec plusieurs Chrestiens nous aiderent beaucoup.

CHAPITRE X.

*DES EGLISE, ET CHRESTIENTE,
de Faïso, Turon, & Cacciam.*

LE Pere François de Pina estant allé à Faïso, ville des Iaponois, comme nous auons dit cy-deuant, la il se ioignit au Pere Pierre Marquez, & tous deux ensemble firent vn grand profit en ceste ville la. Celuy cy comme sçauant en la langue Iaponoise, reforma dans peu de temps quelques vns des Chrestiens, qui estoient deuenus fort licentieux, & concubinaires, & amena de nouveau à la foy, beaucoup d'Idolâtres. Celuy la aussi n'estant pas ignorant de la langue Cochinchinoise, en

O 4

appella

appella encore plusieurs de ceste nation au Christianisme, & ayant conuaincu d'erreur quelques Bonzes, & Onfays, plusieurs autres se conuertirent à la foy à ceste occasion, tant des Iaponois, que des Cochinchinois, & marchoiēt tous d'un tel pié, qu'on pourroit dire avec verité, que ceste Eglise alloit du pair, & pour le nombre, & pour les bonnes mœurs, avec celles d'Europe, tant la pieté, & religion, la frequance des saints Sacremens, & autres bonnes œures, y estoient saintement pratiqués. Et quant à l'Eglise de Turon, dont il a esté parlé au second chapitre de ce naré, que les Gentils auoient bruslée durant la premiere persecution, il à pleu à Dieu qu'elle aye esté rebastie, par le moyen des Peres de la Compagnie, & qu'ils ayent plusieurs Chrétiens en ceste ville la.

Plusieurs se sont conuertis pareillement à la sainte Foy en celle de Cacciã, l'Omgné y contribuant beaucoup lequel depuis qu'il eût veu, ainsi que nous auons dit au chapitre 6. de ceste seconde partie, ce que les Peres auoient asseuré de l'Eclipse, ne cessoit de publier par tout, qu'il n'y auoit loy plus certaine, que celle qu'ils enseignoient. Voila en quel estat estoient les affaires en ces pays-la, quand i'en partis pour retourner en Europe l'année mil

fix

fix censvingt & deux.

Depuis, j'apprens par les lettres annuelles qu'en escriuent nos Peres mes compagnons, que le nombre des Chrestiens, s'accroist tous les iours, & qu'on en baptise quelques milles tous les ans, & en particulier à Caccian, ou la Chrestienté a poursuiui de fleurir plus que iamais. Seulement auions nous ouy de nouveau, que le Roy auoit defendu, qu'il ne se fit plus de Chrestiens, & mesme qu'il auoit menacé de chasser les Peres de tout son Royaume, & ce d'autant que les marchands Portugais, n'y venoient plus traffiquer avec leurs vaisseaux. Ce neantmoins nostre bon Dieu a permis que ceste persecutiõ n'aye pas passé plus auant, & que le Roy se soit contenté, qu'un de nos Peres s'é allast à Macao, pour faire en sorte que les portugais continuassent leur trafic, comme il appert qu'il s'est fait depuis, les choses s'estans pacifiées, & les Peres continuans dans leur fonctions, & exercices ordinaires, faisans des Chrestiens comme auparauant.

CON.

CONCLUSION.

IL n'est pas possible, que ceux la mesme qui sont moins portez à la descouverte des nouveaux pays, & qui n'ont affectiō que pour leur propre patrie, & pour leurs maisōs particulieres, ne se sentent picquez par ce petit naré, de quelque desir de voir, non seulement la varieté, mais encore la verité de tant de belles choses, lesquelles bien qu'elles ne passent point la portée, & les bornes ordinaires des choses naturelles, peuvent bien toutes-fois s'appeller miracles de nature. Car telles sont celles que j'ay rapportées, comme les ayant veuë de mes yeux en la Cochinchine. Terre quant à son climat, & pour la varieté des saisons très-agreable en sa demeure. Terre en outre foisonante en ses larges, & riches campagnes, en toute sorte de viures, de ris, de fruits, d'oyseaux, & d'animaux, & dont la mer abonde en poissons de plusieurs especes & d'un goust très-excellent. Terre, où l'air est si benin, que ce peuple ne sçait encore que c'est que de peste. Terre très-riche en or, en argent, en soye, en Calamba, & autres choses de

de tres-grand prix, & valeur, qui s'y retrouvent. Terre, marchande au possible à raison de ses ports, & de l'abord de toutes sortes de nations. Terre en fin ou les peuples sont sociables, affectueux, & liberaux à merueille, & avec lesquels on peut traiter, & viure en toute seureté, non seulement à cause de la valeur, & grandeur de courage des Cochinchinois recogneus pour tels dās tous les Royaumes voisins, & des munitions de guerre dont ils sont bié pourueus, & de toutes sortes d'armes, qu'ils manient avec vne adresse, & dextérité nonpareille: mais encore pour autant que la nature mesme, semble en auoir pris la defense, les ayant entourez d'un costé de la mer, qu'elle leur a baillée pour fossé, & de l'autre des Alpes, & Pyrenees inaccessibles des Kemois. Telle est ceste partie de la terre qu'on appelle Cochinchine, à qui rien autre chose ne manque, pour estre vne partie du ciel, sinon que Dieu y enuoye ses Anges, ainsi S. Iean Chrysostome appelle les hommes Apostoliques, & Predicateurs du S. Euangile. O que la foy s'estendrait aisement & promptement en ce Royaume de la Cochinchine, ou les Peres de nostre Compagnie, qui sont esendus par tout l'Orient, n'ont pas à combattre les difficultez qu'ils esprouuent
en

en tous les autres Royaumes, par ce qu'il n'est pas besoin d'aller en ce pais en habit desguisé, & trauestti, ny de se cacher: Ces beaux naturels estans si faciles à receuoir bien volôtiers toutes sortes d'estrangers en leur Royaume, & estans bien aises que chascun y viue en sa loy, il n'est pas non plus necessaire d'estudier à fond leur sciences, & hieroglyphes auât que de les prescher, en quoy les Peres de la Compagnie qui vont à la Chine, sont contrainsts d'employer & consommer leurs premieres & meilleures années, car il suffit d'apprendre leur langue, laquelle est si aisée, comme nous auons dit, qu'en vn an on la peut parler avec facilité. Les personnes du pays sont encore accostables, elle ne s'efuyent point à la veuë des estrangers, comme les autres peuples des Royaumes de l'Orient: ains ils les caressent, s'affectionnans aux personnes, prisans ce qu'ils apportent, louans, & estimans leur doctrine. D'abondant il n'ont pas parmy eux ce si puissant obstacle à la premiere grace de l'Euangile, ie veux dire, c'est abominable peché contre nature, qui regne avec plusieurs autres, presque par tout l'Orient, du nom duquel, & plus encore de la chose, les Cochinchinois ont vne horreur naturelle. En fin il ne sera mal aisé d'instruire les Cochinchinois

sur

sur les principaux mysteres de nostre sainte foy, puisque comme il s'est veu desia, ils n'adorent quasi qu'un seul Dieu, prenans les idoles pour intercesseurs, enuers celuy qu'ils recognoissent pour vray Dieu. Ils auouët l'immortalité de l'ame. Ils croyët vne eternité de peines pour les mal viuans, & vne beatitude perpetuelle pour les bons, se seruans de temples, sacrifices, & processions. De maniere qu'en changeant seulement les objects, il n'y aura point de difficulté à introduire la cognoissance de la vraye Religio, & culte diuin. Quant au mystere de l'Eucharistie, il se pourra prouuer facilement, de la separation qu'ils font des accidens, d'auec la substance ez viandes qu'ils seruent aux morts, dans les banquets qu'ils leur preparët, comme nous auons dit en ceste secõde partie. Tout cela allumera encore dauantage les enflambez desirs, & le zele ardent des Enfans de la Compagnie de IESVS, lesquels quoy que reserrez dans les Colleges, & maisons que nous auõs en Europe, estendent neantmoins leurs affections sur tout l'vniuers, & brullent d'envie de se voir employez au loing, aux pays plus reculez, à la cõqueste des ames. Car encore que quelques vns d'entre eux y soyent enuoyez de temps en temps, & s'y occupent courageusement assisitez

assiste du Saint Siege Apostolique, qui prend vn soin vrayement paternel de la mission du Iapon, & contribue largement à son entretien, ce que fait aussi de la part, le Roy Catholique pour les Indes Oriëntales, & Occidentales. Toutes-fois il est impossible qu'ils fournissent suffisamment à tous les endroits, & pays, qui tous les iours se descouurent de nouveau. C'est pourquoy mō esperāce est, q̃ Dieu ayant à son seruice, quantité de grandes & nobles ames, qui n'ōt rien plus à cœur que l'auancement de sa gloire, sa diuine prouidence en suscitera quelques vns, qui seront tres aises de secourir d'vne partie de leurs biens, bon nombre d'hommes Apostoliques, qui ne demandent qu'vn simple & religieux entretien, pour aller porter le pain de la parolle de Dieu, à tant de pauvres affamez, non seulement dans la Cochinchine, mais encore dans le grand Tunchim, ou ils pourront fonder vne Eglise, & vne Chrestienté qui ne cederā en rien aux plus illustres, & celebres du monde.

F I N.

A LA PLUS GRANDE GLOIRE DE
DIEU ET DE LA B. VIERGE MARIE.

PRIVILEGE.

IE soub. signé Prouincial de la Compagnie de IESVS au Pais-bas suiuant le Priuilege donné à ladicte Compagnie, par lequel est deffendu à tous Libraires d'imprimer les Liures composez par ceux de ladicte Compagnie sans le congé des Superieurs, ay permis à Pierre de Rache Marchand Libraire à Lille d'imprimer la *Relation de la nouvelle mission des Peres de la Compagnie de IESVS au Royaume de la Cochinchine*, Traduite de l'Italien du R. P. Christofle Borri de la Compagnie de IESVS par le P. Antoine de la Croix de la mesme Compagnie, Et ce pour le terme de six ans. En foy dequoy nous auons signé la presente, & apposé le seal de nostre office le 28. d'Aoust 1631.



IEAN LOBBETIVS.

